

# Id ash d Matthew O'ohana ab Amjed g Jiosh Alidag

---

## Mash hedai d si shohshonaj g Jesus

*An g neid g Luke 3:23-38*

**1** Ia atsh mahsi g Jesus  
Christ jewed dahm k ab d  
amjedkamaj hegai t-kekelibad  
ha-kownalig mash hab chehgig  
David. Kush g Davidbad ab  
d amjedkamaj hegai mash d  
t-shohshon ahchim Tutuligo ch hab  
chehgig Abraham.

In ant wo o'oha g ha-chechgig  
hegam mash d Jesus Christ  
shohshonbad.

<sup>2</sup>Abraham atsh wa an alidit g  
Isaac.

Tsh g Isaac an alidit g Jacob.  
Tsh g Jacob an ha a'alidit hegam  
Judah.

<sup>3</sup>Tsh g Judah an ha a'alidit g  
Perez ch Zerach heg ab mash d  
Tamar.

Tsh g Perez an alidit g Hezron.  
Tsh g Hezron an alidit g Ram.

<sup>4</sup>Tsh g Ram an alidit g  
Amminadab.  
Tsh g Amminadab an alidit g  
Nahshon.

Tsh g Nahshon an alidit g Salmon.

<sup>5</sup>Tsh g Salmon an alidit g Boaz  
heg ab mash d Rahab.

Tsh g Boaz an alidit g Obed heg  
ab mash d Ruth.

Tsh Obed an alidit g Jesse.

<sup>6</sup>Tsh g Jesse an alidit g David.  
David atsh an alidit g Solomon heg  
ab mash d chum hohnigaj g Uriah.

<sup>7</sup>Tsh g Solomon an alidit g  
Rehoboam.

Tsh g Rehoboam an alidit g  
Abijah.

Tsh g Abijah an alidit g Asa.

<sup>8</sup>Tsh g Asa an alidit g Jehoshaphat.  
Tsh g Jehoshaphat an alidit g  
Joram.

Kush ihda Joram d shonaj g  
Uzziah.

<sup>9</sup>Tsh g Uzziah an alidit g Jodam.  
Tsh g Jodam an alidit g Ahaz.  
Tsh g Ahaz an alidit g Hezekiah.

<sup>10</sup>Tsh g Hezekiah an alidit g  
Manassah.

Tsh g Manassah an alidit g Amos.  
Tsh g Amos an alidit g Josiah.

<sup>11</sup>Kush ihda Josiah d ha-shon  
hegam Jeconiah matsh  
eda gam hu hab i e juh g  
t-shohshonbad Babylon  
kihhim wui.

<sup>12</sup>Jeconiah atsh an hahawa alidit g  
Shealtiel.

Tsh g Shealtiel an alidt g Zerubbabel.

<sup>13</sup> Tsh g Zerubbabel an alidt g Abiud.

Tsh g Abiud an alidt g Eliakim.

Tsh g Eliakim an alidt g Azol.

<sup>14</sup> Tsh g Azol an alidt g Zadok.

Tsh g Zadok an alidt g Akim.

Tsh g Akim an alidt g Eliud.

<sup>15</sup> Tsh g Eliud an alidt g Eliazar.

Tsh g Eliazar an alidt g Matthan.

Tsh g Matthan an alidt g Jacob.

<sup>16</sup> Tsh g Jacob an alidt g Joseph.

Kush ihda Joseph d kunaj hegai mo d Jesus je'e ch hab chehgig Mary.

K ihda Jesus hab e a'aga Christ.

<sup>17</sup> Pegih, nt gamai gi'ik an o'oha g ha-chehgig hegam mo d e-o'ogbad am i amjed mash eda am oimmed g Abrahambad ch am hugkam mash eda am oimmed g Davidbad. Kunt hab wa'ap gamai gi'ik an o'oha g ha-chehgig hegam mo d e-o'ogbad heg i amjed ch gam hu hugkam matsh eda gam hu hab i e juh g t-shohshon Babylon wui. Kunt gamai gi'ik an o'oha g ha-chehgig hegam mo d e-o'ogbad heg i amjed ch gam hu hugkam matsh ab mahsi hegai mo hab e a'aga Jiosh si Kehsha (Christ).

**Matsh mahsi g Jesus**

*An g neid g Luke 2:1-7*

<sup>18</sup> Ia ant wo o'oha matsh has e juh matsh eda mahsi g Jesus Christ. Am amtsh i ap'ech matsh idam Joseph ch Mary wo e hohont. Tsh am hahawa s-e mai mat g ali wo bei. <sup>19</sup> K hab chu'ig g chehanig mat chum pi wo ha bei g cheoj matp hab wo wa e juh. Kush g Joseph

am wabsh si s-ap oid g chehanig ch hekaj hab e elid mat pi wo be k wabshaba pi hedai wo ha ahgi. T hab pi wo si e el g Mary.

<sup>20</sup> Sh am oidahim ihda g Joseph. Kutsh am haha wabsh ab wui i e chehgi g anghil am chehchkij ed k hab kajj, "Joseph map ab d Davidbad amjedkam, am g wabsh s-ap e tahtk k wo bei g Mary mat d wo m-wehm kihkamk. Hekia S-ap'ekam Gewkdag at hab juh ihda ali mat g Mary wo bei. <sup>21</sup> Kut d wo cheojk. Kupt hab wo chehch Jesus mo hab d ahga ha-Do'ibiakam. Bat wo chehgigk nat pi wo ha do'ibia g e-hemajkamga ab ha-chu'ijig amjed." Neh, bash kajj g anghil am Joseph wui.

<sup>22</sup> Wehs atsh wa hab e juh ihda hab masma mash wa hab masma heki hu hab kajj g Jiosh. Kelibad Jiosh ha'ichu i tashogiddam atki an o'oha mash wa hab kajj:

<sup>23</sup> Hema g si s-ap chehia at wo bei g cheoj ali pi koi ab hu i miabidk g cheoj.

Kumt hab wo a'agad Manuel mo hab d ahga Jiosh o t-Wehmaj.

*Isaiah 7:14*

<sup>24</sup> Kutsh hekid am i nea g Joseph k atsh am ha hekaj hab e juh mash has i kajj g anghil ab wui matsh an bei g Mary. <sup>25</sup> Sh wabshaba pi am hu hab masma e wehm kih mo g e wehm kihkam am hugkam mat hekid ip bei g ali. Tsh g Joseph hab hahawa chehch Jesus.

**Matsh am ha'i dada hegam mo s-chu a'amichud ab huhu'u t ab**

**2** Jesus atsh am mahsi Bethlehem kihhim t am am

Judea chekshani ch ed. Sh wenog am hema d kownal Judea ch ed ch hab chehgig Herod. Tsh ab ha'i hihi si'al tahgio amjed mash s-chu a'amichud ab huhu'u t ab. K eda g Jerusalem d kownal daikud am t-jewedga ed. Tsh am dada idam k am ha kakke g haha'ichu ch hab kajj, <sup>2</sup>“Bah'o ha'ichug hegai ali matki hemu mahsi matsh d wo ge ha-kownaligk g Tutuligo. Am at dahiwua g hu'u matt heg amjed s-mai g mahsidaj. Kutt heg hekaj ab i hihi matt am hab wo juh g si has t-elida ab wui.”

<sup>3</sup>Kutsh si e kudu g kownal am i kakh. Tsh heg hekaj wehs g kihkam amai hab wa'ap e kudu. <sup>4</sup>Tsh g kownal am ha hekaj i ha hemapai g u'ugchu papal ch chehanig t-mashchamdak ab ha kakke, “Bahtsh ab ha'ab wo mahsi hegai matsh g Jiosh d wo Kehshak mat d wo chum em-kownaligk?”

<sup>5</sup>Sh hab ahg, “Ab Bethlehem t ab id eda chekshani. Batki masma an hema o'oha g kelibad Jiosh ha'ichu i tashogiddam mo g Jiosh hab kajj:

<sup>6</sup>Do al chum kihhim g Bethlehem.

Kut eda am hema wo i wuhsh mat d wo ha-kownaligk ch wo ha wanimedad g ni-hemajkanga.” *Micah 5:2*

<sup>7</sup>Tsh g Herod am s-a'agim i ha wai hegam s-chu a'amichuddam k ab ha amjed s-mai matsh hekid ab i e mahsid hegai hu'u. Tsh am ahgi.

<sup>8</sup>Tsh g Herod am hahawa ha ahgi mat gam hu wo hihi Bethlehem wui hab ha ahgch, “Am g wo hihim k am wo si i gah hegai ali k hekid wo sha chehg k ia wo ni-ahgi. Kunt

ahni am hab wa'ap wo him k ab wo ihm mani ab has elid.”

<sup>9-10</sup>Kutsh gam hu hahawa hihim k gam hu hebai i hihim. Tsh ab ep i e mahsid hegai hu'u mash am wa heki hu neid. Kush si s-hehegig am i neidok. Tsh heg am ha ba'ich him k am dahiwua heg dahm mash am dadha hegam Joseph. <sup>11</sup>Tsh am dada k am i wahp kih ch ed. Sh am wo'o hegai ali. Kush g je'ej am wehmaj. Tsh idam s-chu a'amichuddam am wui i shul g ali k am hab juh g ab si has e-elida k am hahawa i ha wuwhas g s-namkig ha'ichu k ab mah. Sh id d ohla ch hegai s-ap uhwchu mo hekaj e iagchulid ch hegai mo hekaj e huhud g muhki.

<sup>12</sup>Sh g Jiosh am ha ahgid am ha-chehchki ed matsh pi am hu ep wo hihi Herod wui. Kutsh heg hekaj im hu wabsh hihi e-jewedga wui am hema wohg ch ed.

#### Mamtsh am chum mua g Jesus

<sup>13</sup>Tsh ab hahawa i e chehgi g anghil Joseph wui am chehchkij ed k ash hab kajj, “Kownal Herod at am wo i gahghi ihda ali mat wo chum s-mu'am. Mt heg hekaj gam hu wo hihi Egypt jewed wui k am wo ha'ichugkad. Kunt am wo em-ahgi mamt hekid ep wo i hihi.”

<sup>14</sup>Kutsh am ha hekaj i wami g Joseph k am bei g ali ch je'ej k heg wa'i s-chuhugam hihi am Egypt wui <sup>15</sup>k am wa dadha. Id atki am hab e juh mat hekaj s-ap hab wo e juh hegai matki heki hu wa'i o'oha g kelibad Jiosh ha'ichu i tashogiddam. Bo chu'ig g o'ohanaj mash g Jiosh hab kajj:

Am ant wo i wuhshad g  
ni-alidag Egypt jewed amjed.

**Mamtsh g a'al am ha kokda**

*Hosea 11:11*

<sup>16</sup>Pegih, tsh pi am hu ep i hihi Herod wui hegam s-chu a'amichuddam mash wa am ha ahgid g Jiosh. Tsh heg hekaj bagat g Herod. Sh eda idam heki hu ahgid mo am hu d i gohk a'ahidag mat wa am cheh hegai hu'u. Kutsh heg hekaj ha cheha g e-shondalig matsh wehs wo ha kokda g a'al wihpiop mash d gohk ahidkam ch am i wecho amai Bethlehem ch ed ch an i wehgaj. <sup>17</sup>Neh, id atsh wa hab e juh hab masma mash wa g Jiosh heki hu wa'i hab kaj matsh hab masma hab wo e juh. Hegai kelibad Jiosh ha'ichu i tashogiddam mash hab chehgi g Jeremiah atki an o'oha mash hab kaj g Jiosh:

<sup>18</sup>Am ant wo kah g shoshaki

Ramah ch ed.

Rachelbad amjedkam at am wo shoanid g a'al ha wehhejed ch pi ha'as wo shosha nat pi wehs wo e kokda. *Jeremiah 31:15*

**Matsh ab uhpam i hihi hegam**

**Joseph Egypt amjed**

<sup>19</sup>Sh am dadha hegam Joseph g ali wehm Egypt jewed ch ed. Sh am hu hebai, tsh g Herod muh.

Tsh am hahawa ep i e chehgi g anghil am chehchkij ed g Joseph k ash hab kaj, <sup>20</sup>“Muh at hegai mat chum s-mu'am g ali. Mt heg hekaj wo wahpamig k wo uhpam hihi am e-jewedga wui.”

<sup>21</sup>Kutsh am i wami g Joseph k am ha ui g ali ch je'ej k ep hihi am e-jewedga wui.

<sup>22</sup>K wabshaba g Herodbad alidag wenog am d kownal Judea ch ed ch hab chehgi g Arkelaus. Tsh g Joseph am i s-mai mo id d kownal k atsh sha s-ehbeni mas am wo i dahiwua amai. Tsh g Jiosh am ep ahgi chehchkij ed matsh pi am hu ep wo hihi Judea wui. Tsh hekaj imhab ha'ab ep hihi Galilee chekshani wui <sup>23</sup>k am dadhaiwua Nazareth kihhim ch ed. Heki atki hu hema o'oha g kelibad Jiosh ha'ichu i tashogiddam mamt hab wo a'agad ihda “Nazareth t am o'odham.”

**Mash haschu ahgachug g John am  
ha pahl wapkonch**

*An g neid g Mark 1:1-8; Luke*

*3:1-18; John 1:19-28*

**3** Tsh am hahawa jegko i wuhsh Judea chekshani ch ed ihda mash d John ch ha pahl wapkon g hemajkam. <sup>2</sup>John jehnidga ash hab chu'ig, “Gam g hu wo s-ohhod g pi ap e-chegitoi. E o aihim mat in wo i wuhsh g Jiosh kownaltalig.”

<sup>3</sup>Neh, id o hab ahg John hegai kelibad Jiosh ha'ichu i tashogiddam mash hab chehgi g Isaiah mash eda hab kaj:

Hema atsh gam hu jeg ed wo ha mihsmdad g hemajkam hab kajch:

Neh, in atsh wo i wuhsh jewed dahm hegai mo d ge kownal wehs ha'ichu dahm.

Kumt heg wehhejed wo i e nako.

*Isaiah 40:3*

<sup>4</sup>Sh ab e enigadadch g John g ka-mihyo wopo ikuskaj ch ge hogi giwud ch heg wa'i hekaj e gegosid kohktpul ch sit'ol. <sup>5</sup>Kutsh ab wui i hihi g hemajkam miajed ch an i

a'ai wehskojed g Judea chekshani, chum hems ab Jerusalem t amjed. <sup>6</sup>Mu'i ash am ahg g pi ap e-chu'ijig am i kahkch g John. Kush heg am ha pahl wapkon Jordan akimel ch ed.

<sup>7-9</sup>Ha'i atsh am dada hegam mo d Palasi ch hegam mo d Sajusi matsh wo nei ihda pahl wakona. Sh hab ha ahg g John, "Hah, ahpim mam pi ap chegitoidag, bamki e elid mamt wo e do'ibia ab amjed g s-ko'ok e-namkidadag heg wabsh hekaj mam ab d Abrahambad amjedkam. Nt wabshaba wo em-ahgi mamt pi woho wo e do'ibia, heg hi wa mamt am wo e cheghi am hab junihidch g s-ap'ekam mamt gam hu s-ohhod g pi ap e-chegitoi. Wehs hegam mat gam hu wo s-ohhod g pi ap e-chegitoi at d wo Jiosh hemajkamgak ch hekaj hab masma wo e kuint mo d Abrahambad amjedkam, chum wa g nahnko mahs hemajkam. <sup>10</sup>Kumt ahpim gam hu wo s-e ohhod hab masma mat g pi kehg bahidkam u'us mamtp pi gam hu wo s-ohhod g pi ap e-chegitoi k pi am hu hab wo junihid g s-ap'ekam."

<sup>11</sup>Kush hab ep kaij g John, "Pi g hab wo ni-elid manis ahni d si ha'ichu. Ab at hema wo i wuhsh ni-oidk k d wo si ha'ichuk. Ahni ani hi wa em-pahl wapkon mamt eda gam hu wo s-ohhod g pi ap e-chegitoi. T wabshaba heg ab wo em-mah g Hekia S-ap'ekam Gewkdag k gam hu hab wo i juh g pi em-ap'ekam hab sha masma mat g mehi wo mehi g sha'i. <sup>12</sup>Nam hig pi nehnichud g pilkan mamt g mohgaj gam hu wo i gawulkad k

wo mehid k g pilkani ged hu wo i ba'iha. Pegih, t hab wa'ap am a'ai wo i ha gawulkai g hemajkam am lodaita ch ed ihda mani em-ahgid k wo ha do'ibia g s-ap'ekam k g pi ap'ekam s-ko'okam wo ha namkid. T g ha-namkidadag pi hekid wo huhug." Neh, bash kaij g John.

**An g neid g Mark 1.9-11; Luke 3.21-22**

<sup>13</sup>Jesus atsh ab hahawa i hih Galilee chekshani t amjed mo hebai d i kihkam k ab jiwia Jordan akimel t ab matsh wo e pahl wako. <sup>14</sup>Sh g John chum pi pahl wakonamk hab kaijch, "Nis haschu ahgk wo m-pahl wako nap pi d hekia s-ap'ekam? Ahpi apt wo chum ni-pahl wako."

<sup>15</sup>Sh hab kaij g Jesus ab wui, "Bapt wo ni-juh no pi g Jiosh hab d elida."

Tsh heg hekaj hab juh g John. <sup>16</sup>Tsh am haha wabsh i chum wuhsh g Jesus shuhdagi t amjed. Tsh g dahm kahchim gam i e kuhpi'o. Tsh ab i hud g Hekia S-ap'ekam Gewkdag ab ab g Jesus hab sha masma mat g hohhi. <sup>17</sup>Sh ab neok g Jiosh ab dahm kahchim t amjed ch hab kaij, "Id o d si ni-tatchuidch ni-alidag ch am si ni-tatchui oidch hab masma."

**Mash g ge Jiawul am chum s-wuimk g Jesus pi ap'ekam ch ed**

*An g neid g Mark 1:12-13; Luke 4:1-13*

**4** Sh g Hekia S-ap'ekam Gewkdag hab hahawa ahg g Jesus mat gam hu hejelko wo hih mo am d tohono jewed matsh wo e a'appe. Tsh heg hekaj gam hu hih g Jesus <sup>2</sup>k am ha'ichugkahim gi'ikko

wehst-mahm tash ab pi ha'ichu ko'adch nash pi e ho'ige'idahun ab Jiosh wui.

<sup>3</sup>Kutsh ab wui jiwia g jijawul ha-ge'ejig am chum s-wuimk pi ap'ekam ch ed k hab kajj, "Bap chum e elid map d Jiosh alidag. Pegih, ab g hig chehani idam hohodai mat wo e pahnc h naptki pi bihugim."

<sup>4</sup>Kush hab kajj g Jesus, "Pi ant hab wo juh. An o hab chu'ig Jiosh o'ohana ed:

Jiosh ne'oki o ba'ich d i si s-has ha'ichu mo hi g ha'ichu hugi. Kut g o'odham hemho ab wo wa s-wohog elidad."

*Deuteronomy 8:3*

<sup>5</sup>Kutsh g ge Jiawul am hahawa wuhpuj tahgio i mahsid g ge'e cheopi. Heg o am kehk amai mo hab e a'aga Si Hekia S-ap'ekam Kihhim ch d Jerusalem. <sup>6</sup>Kush hab ahg, "Mapt wo ho d wo Jiosh alidagk, pegih, am g i dah'i amjed mo gan hu si uhgk kihtas. No hig pi hab chu'ig an Jiosh o'ohana ed:

Jiosh at ab wo ha cheha g mu'i anghil mat wo m-nuhkud.

Kut an hu wo m-u'ukchid mapt nih g sha'i e-tahtad ab hu wo shul hohodai t ab." *Psalms 91:11*

<sup>7</sup>Sh hab kajj g Jesus ab wui, "Pi ant wo pip'ich g Jiosh. An o hab chu'ig o'ohanaj ed:

Pi g wo sha'i pip'ichudad g e-kownalig Jiosh."

*Deuteronomy 6:16*

<sup>8</sup>Kutsh am hahawa wuhpuj tahgio wehs i mahsid g kokownaltalig ch kaistalig jewed dahm <sup>9</sup>k ab wui hab kajj, "Wehs ant am wo m-mah ihda mapt

ab ni-wui wo i gehsh k ab wo ni-ihmad."

<sup>10</sup>Kush hab kajj g Jesus, "Gam g hu hihm, ahpi ge Jiawul. An o hab chu'ig Jiosh o'ohana ed:

Heg amt wa'i Jiosh ab wui wo i gehsh k ab wo ihmad ch heg ab wo wa'i s-wohog elidad."

*Deuteronomy 6:13*

<sup>11</sup>Kutsh wa woho gam hu hih g ge Jiawul. Tsh g anghil ab wui hihi g Jesus k am i wehmt.

**Matsh g Jesus am i himch g e-chikpan Galilee chekshani ch ed**

*An g neid g Mark 1:14-15; Luke 4:14-15*

<sup>12</sup>Am hu hebai amtsh am kuh hegai John mo am wa ha pahl wapkon. Kutsh am i kah g Jesus mamtsh kuh k atsh gam hu hahawa hih Galilee chekshani wui <sup>13</sup>k am jiwia Nazareth t ab. K am hema ep d kihhim mo d Capernaum ch an hugidaj an g Galilee kahchki. Kutsh am i dahiwua g Jesus. <sup>14</sup>Neh, heki atki hu wa'i o'oha g Isaiabad matsh id am hab wo e juh. K hegai o'ohanaj hab chu'ig:

<sup>15</sup>Si ha'ichu at am hab wo e juh Galilee ch ed.

Ihda chekshani o an hab chu'ig kahchki hugid an ch am huduni tahgio amjed g Jordan akimel.

K an kihdag hegam mo d Zebulonbad amjedkam ch hegam mo d Naphtalibad amjedkam ch hegam ehp mo d gawul mahs hemajkam.

<sup>16</sup>Bo sha mahs mo am dadha s-chuhugam k ed no ge mahch g Jiosh.

K g muhkig ab ha wui him.

T wabshaba wo nei mat am  
ha'ichu wo i wuhshani k hab  
wo sha masmak mo g si ge'e  
tonlig. *Isaiah 9:1,2*

Neh, bash wa kajj g Isaiabad.

<sup>17</sup>Kutsh wa woho am i wuhsh g  
Jesus k am i ahgahi g ha'ichu e-ahga  
hab kajjch, "Gam g hu wo s-ohhod g  
pi ap e-chegitoi. E o aihim mat in wo  
i wuhsh g Jiosh kownaltalig."

**Matsh g Jesus ab ha'i ha wai g  
waptopi ha u'udam mat wo wehmajk**

*An g neid g Mark 1:16-20, Luke 5:1-11*

<sup>18</sup>Sh an him g Jesus Galilee  
kahchki hugid an. Kush am ha'i  
oiopo g waptopi ha u'udam ch  
am wuhpa g chuagia shuhdagi ch  
ed ch hekaj am ha u'u g waptopi.  
Hema ash d Simon ch hab hahawa  
e chechcheg Peter. Kush hema d  
wehngaj ch hab chehgig Andrew.

Jesus atsh am i ha nei idam <sup>19</sup>k  
hab ha ahg, "Ab g wo i ni-oid k  
wo ni-wehmajkad. Kunt ahni wo  
em-mashcha mamt g hemajkam wo i  
ha wanchkwua am s-ap'ekam wui."

<sup>20</sup>Kutsh am ha hekaj wabsh i  
dagito g e-chikpan k am i oi.

<sup>21</sup>Tsh am sha'i hihi ha'as hu'i. Tsh g  
Jesus am i ha nei idam James ch John.  
Idam o hab wa'ap d e-wepngam ch ash  
am chikpan g e-ohg wehm wahlko ch  
ed ch am ap'echud g e-chuagia. Tsh g  
Jesus ab ha wai mat am wo wehmajk.

<sup>22</sup>Kutsh am ha hekaj wabsh i dagito g  
e-ohg ch e-chikpan k am i oi g Jesus.

**Mash gam hu ha mihshmdahim g  
Jesus Galilee chekshani ch ed**

*An g neid g Luke 6:17-19*

<sup>23</sup>Kush idam am hahawa hahasko  
oiopo Galilee chekshani ch ed.

Kush g Jesus am ha mashcham g  
hemajkam ha-chechopi ed ch am ha  
ahgidahim g s-kehg ha'ichu ahgaj g  
Jiosh ab amjed g kownaltaligaj ch  
am ep ha dodajid g nahnko mahs  
kok'odam. <sup>24</sup>Tsh an wehsko i kaida  
g ha'ichu ahga ab amjed am Syria  
jewed ch ed mo heg eda g Galilee  
d chekshani. Tsh g hemajkam  
heg hekaj wehs ab ha u'apa wui  
hegam mo nahnko masma kok'o  
ch hegam mo ha'ichukaj e kudut  
ch hegam mo g jijawul an u'ukch  
g ha-chegitoidag ch hegam mo  
s-ha chuhugchud ch hegam mo pi  
himdag. Tsh g Jesus wehs ha dodaj.

<sup>25</sup>Kutsh g hemajkam wehskojed  
i hihim k am oid g Jesus. Idam  
ash ha'i d Galilee t am o'odham  
ch ha'i ab amjed mo hab e a'aga  
Wehst-mahm Kihhim ch ha'i ab  
Jerusalem t amjed ch an wehskojed  
g Judea chekshani k ch ha'i ga hu  
aigojed g Jordan akimel.

**Mash haschu am ha mashcham  
g Jesus kawulk t an**

**5** Tsh am i ha nei g Jesus idam  
mu'i hemajkam k ab i chesh  
kawulk t ab mat ab ha wui wo neo.  
Kutsh an wehgaj i e hemapai hegam  
mash ab si wecho e mashcham.

<sup>2</sup>Tsh g Jesus am i ha mashcha.

**Matsh wo chum si s-ap e tahtkk g e  
do'ibiakam**

*An g neid g Luke 6:20-23*

Kush id d mashchamdaj:

<sup>3</sup>Mt wo chum si s-ap e tahtkkad  
ahpim mam ab e sho'igchud  
Jiosh wui.

Do em-wehhejedkam g Jiosh  
kownaltalig.

- <sup>4</sup> Mt wo chum si s-ap e tahtkkad ahpim mam hemuch pi ap e tahtk ab amjed g pi ap'ekam. Jiosh at ab wo em-mah g s-ap tahhadkam.
- <sup>5</sup> Mt wo chum si s-ap e tahtkkad ahpim mam ab wabsh i e sho'igchudch. Wehs at ab wo em-mah g Jiosh hegai mo an o'ohanas mo ab em-makiog am jewed dahm.
- <sup>6</sup> Mt wo chum si s-ap e tahtkkad ahpim mam am si e gahgid mamt d wo s-ap'ekamk. Bat wo em-juh g Jiosh mamt d wo si hekia s-ap'ekamk.
- <sup>7</sup> Mt wo chum si s-ap e tahtkkad ahpim mam s-ha ho'ige'id g hemajkam. Jiosh at hab wa'ap wo s-em-ho'ige'idad.
- <sup>8</sup> Mt wo chum si s-ap e tahtkkad ahpim mamt gam hu s-ohhod g pi ap e-chegitoi. Am o hiwgidas mamt ab wo neidad g Jiosh.
- <sup>9</sup> Mt wo chum si s-ap e tahtkkad ahpim mam am ha dodolimachud g hemajkam. Mt wo s-em-mahchk mam d a'aligaj g Jiosh.
- <sup>10</sup> Mt wo em-sho'igch ahpim mamt hab wo junihid g Jiosh tatchui. K wabshaba d em-wehhejedkam g Jiosh kownaltalig. Kumt heg hekaj wo si s-ap e tahtkkad.
- <sup>11</sup> Mt wo s-ko'okam has em-ahgad ch wo em-sho'igchudad ch nahnko masma hab wo wuad g iattogig ab em-ab nam pi ab s-ni-wohochud.

Kumt wabsh wo si s-ap e tahtkkad

- <sup>12</sup> ch wo si s-hehgigk no pi ge'e ha'ichu ab em-makiog g Jiosh. Heg at wa oidk am hihi g kekelibad Jiosh ha'ichu i tashogiddam.

### On ch tonlig

*An g neid g Mark 9:50; Luke 14:34-35*

- <sup>13</sup>“Neh, s-mahch am mat pi wo e padch g chuhkug mamtp wo si onmad. Pegih, mt hab wa masma ha'ichu wehhejed wo s-kehgajk am ha shahgid hegam mo pi mahch g Jiosh. Jiosh at gam hu hab wo i em-juh mamtp pi ha'ichu wehhejed wo s-kehgajk hab masma mamt hab wo juh g on matp wo kahko.

<sup>14</sup>“Ahpim mam ab si ni-hiwig amt wehs wo ha tonolidad g hemajkam. Heg o wa wepo mam d tonlig am ha wehhejed. Pi g am wo ehstokch hegai mamt haschu hab wo junidad g Jiosh. Neh, no hig pi woho mat pi ap wo e ehsto g kihhim matp am wo dahmkad g tohnik. <sup>15</sup>T g lahmpa hab wa'ap pi wo e ehsto ha'ichu wecho. Mt an wo dai mat hebai wo em-tonolidad. <sup>16</sup>Pegih, mt ahpim pi wo ehsto g s-em-ap'ekam k wabsh wo ha hiwgidad g hemajkam mat wo nei. Kut hekaj ab wo si has elidad g em-ohg Jiosh.

**Mash g Jesus am ba'ich ha'ichu ha mashcham ab amjed g ha-chehanig**

<sup>17</sup>“Pi ant hab ahgk ia jiwia jewed dahm manis gam hu hab wabsh wo i juh hegai chehanig ch mashchamadag matsh wa g kekelibad Jiosh ha'ichu i tashogiddam ab bei Jiosh t amjed.



Heg eda o an o'ohanas mant has wo masmak ch has wo ni-juh k wo nahto g ni-chikpan. <sup>18</sup>Nt wo si shel em-ahgi mat pi hekid gam hu hab wo i e juh g Jiosh chehanig. Wehs at s-ap wo e nahto hegai mo an o'ohanas mat koi wo huhug g dahm kahchim ch jewed kahchim, chum hems g si al chu'uchum ha'ichu. <sup>19</sup>Kut d wabsh wo pi ha'ichuk am Jiosh nena ed hegai mat hedai pi am hu wo wohog elidad g Jiosh chehanig ch wo ha mashcha ha'ijj ehp mat hab wa'ap pi ab hu wo wohog elidad. Kut heg d wo si ha'ichuk am Jiosh nena ed mat hedai ab wo wohog elidad g Jiosh chehanig ch wo ha mashcha ha'ijj ehp mat ab wo wohog elidad. <sup>20</sup>Bo e elid g chehanig em-mashchamdam ch Palasi mo s-ap oid g Jiosh chehanig. Nt wabshaba wo em-ahgi mamt hemho wa ha ba'ich i s-ap wo oidad mamtp am s-wahpkim Jiosh kihdag ed.

**Mash ha mashcham ab  
amjed g bagatalig**

<sup>21</sup>“S-mahch am mo hab chu'ig g heki hu chehanig mamt pi wo ha mua g hemajkam. Kut hemho wa wo e lodai matp hedai wo sha ha mua. <sup>22</sup>Kunt ahni am ba'ich hab wo i ah mamt am wa hugkam ab wo moht g chu'ijig mo g ha mu'akam mamt chum hems wabsh wo bagat ab hema i wui k hab wo ah mo d wabsh pad ha'ichu. Ab o em-wui him mat g Jiosh wo em-lodai heg hekaj k gam hu wo i em-wua Jiawul kih ed.

<sup>23</sup>“Am g wo ha'asa e ho'ige'idahun mamtp wo s-chegito

mamt hema i pi ap dohdada. Pi at ab hu wo em-kaiha g Jiosh. <sup>24</sup>Wehpeg amt am wo i e ap'ech heg wui mamt pi ap dohdada k am haha wo e-ho'ige'idahu. <sup>25-26</sup>Mtp hems wo em-lodai mamtp pi am hu s-hohtam wo i e ap'ech. Kumt wo e kuhpach am hugkam mamt wehs wo namkid wehhejed mamt has i juh. Ba'ich at wo i s-ap'ek mamt wehpeg hejel am wo i e ap'ech a'ai e wui.

**Mattsh pi wo ha ehs g  
ha-wehm kihkam**

<sup>27</sup>“S-mahch am mo hab chu'ig g heki hu chehanig mamt pi wo ha ehs g ha-wehm kihkam. <sup>28</sup>Kunt ahni am ba'ich hab wo i ah mo heg wa wepo mamt ha ehs mamtp am wabsh wehmaj wo s-wo'iwuim hegai mo pi d em-wehm kihkam. <sup>29</sup>Kut d wo em-wuikamk mamt gam hu wo i e wua Jiawul kih ed. Ba'ich at wo i s-ap'ek mamt chum hems wo heb hu wua g e-nendag. <sup>30</sup>Do em-wuikam mamt am hu wo i e wua Jiawul kih ed chum ams haschu pi ap'ekam hab wo juh. K ba'ich i s-ap'e mamt chum hems wo heb hu wua g e-nowi.

**Mattsh pi wo chum s-ohhod g  
t-wehm kihkam**

*An g neid g Matthew 19:9; Mark  
10:11-12; Luke 16:18*

<sup>31</sup>“S-mahch am mo hab chu'ig g heki hu chehanig mamt hemho wa am wo i wuhshad g ohhoda tapial e-hohnig wehhejed mamtp wo s-ohhod. <sup>32</sup>Nt wabshaba am wo em-ahgi mat d wo pi ap'ekamk mamt wo s-ohhod, heg hi wa mamt wo s-mai am i chum hohntk mat

heki hu ha wehm wo'iwua. Kut d wo pi ap'ekamk mat g em-ohhoda hema ep wo kunt. Id at d wo em-chu'ijigk mamtp wo s-ohhod. Kut hegai mat wo hohnt hab wa'ap wo juh g pi ap'ekam.

### **Mattsh pi wo ha iattogidad**

<sup>33</sup>“S-mahch am mo hab chu'ig g heki hu chehanig mamt pi wo ha iattogidad ch hemho am hab wo wa juh mam haschu ha ahgid ch chehcheg g Jiosh. <sup>34</sup>Nt wabshaba am wo em-ahgi mamt hemho am hab wo wa juh g e-ne'oki. Pi o ap'e mams wabsh chum haschu wehhejed wo gewkaj g e-ne'oki. Neh, am am wabsh pehegia gewkaj g e-ne'oki am chehchegch g dahm kahchim. K eda g dahm kahchim d Jiosh kihdag. K hab wa masma mamtp hems g Jiosh am chehch. <sup>35</sup>Kum am ep chehcheg g jewed. K eda heg d Jiosh nahtoi ch heg wa wepo mo d keishpakudaj. Kum am ep chehcheg g Jerusalem. K eda heg d kihhimaj g Jiosh. <sup>36</sup>E-mo'o am hab wa'ap a'aga hab kaijch mamt wo moht g chu'ijig mamtp pi hab wo juh g e-ne'oki. T eda g Jiosh wo wa'i e nako mat wo em-mohto'i g chu'ijig. Id o wehs hab masma mamtp hems am chehch g Jiosh. <sup>37</sup>Neh, bamt wo chum juh g e-ne'oki, chum ams pi wo gewkaj am chehchegch g Jiosh. T d wabsh wo ge Jiawul amjedkamk mamtp wo ha iattogi.

### **Mattsh pi wo t-agwuim**

*An g neid g Luke 6:29-30*

<sup>38</sup>“S-mahch am mo hab chu'ig g heki hu chehanig mamt wo

ha lodai mat hedai s-ko'okam has em-juh. T ab wui hab epai wo e juh mat has i em-juh. <sup>39</sup>Nt wabshaba am wo em-ahgi mamt pi wo sha'i e agwuim. Tp hems hema ab wo em-shonihi em-kahm ab. Pegih, mt wabsh wo hiwigi mat ab ep wo em-shonihi. <sup>40</sup>Kumt ba'ich ha'ichu ab wo mah hegai matp hedai wo em-lodai ha'ichu s-em-wohppo'idamch. <sup>41</sup>Kumt gam hu wo si ba'iwich mam haschu chikpan em-mohto'id wabsh s-ap e tahtkch. <sup>42</sup>Pi g wo sha'i da'id matp haschu i tatchua g sho'igkam.

### **Mattsh ab wo si tatchuad g t-obga**

*An g neid g Luke 6:27-28, 32-36*

<sup>43</sup>“S-mahch am mo e ahgachug mamt ab wo si ha tatchuad g e-naipijju ch wo s-ha keh'idad g e-obga. <sup>44-47</sup>Nt wabshaba am wo em-ahgi mamt pi hegam wa'i ab wo si ha tatchuad e-naipijju. Chum o hems g pi ap hemajkam ab si ha tatchua g e-naipijju ch wabshaba pi heg hekaj wo e do'ibia. Neh, ahpim amt chum hems g e-obga wo si ha tatchuad ch am ha wehhejed wo e ho'ige'idahunad Jiosh wui. Jiosh o chum hems g pi ap hemajkam ab si ha tatchua ch ab ha mahk g tash tonlig ch juhki. Kumt ahpim hab wo chum masmak mo g Jiosh nam pi d a'aligaj. <sup>48</sup>Em-ohg Jiosh o d si hekia s-ap'ekam. Pegih, mt ahpim hab wa'ap d wo si hekia s-ap'ekamk.”

### **Mattsh pi wo t-chehgidam matt haschu s-ap'ekam hab wo juh**

**6** Kush hab ep kaij g Jesus, “Am g wo s-e nen'oidad mamt

pi am hu hab wabsh wo wuad g ha'ichu s-ap'ekam hab ahgk mat g hemajkam wo neidad mam haschu am hab junihim. Jiosh at pi ab hu wo em-mah g s-kehg mahkigdag mamtp hab masma wabsh wo s-e chehgidam.

<sup>2</sup>“Pi g wo s-e chehgidamk mamt hekid wo i ha wehmt g sho'igkam. Hegam mo s-e chehgidamk mo i ha wehmt o am hab wua em-namki ed ch an kahya ch ed. K g hemajkam ab si has ha elid. Neh, id o d ha-namkidadag. Nt wo si shel em-ahgi mat g Jiosh pi ab hu has wo ha el. <sup>3</sup>Ahpim amt wabsh s-a'agi wo i ha wehmtad g sho'igkam mat pi hedai wo s-mahchk. <sup>4</sup>T g em-ohg Jiosh wo em-neid k ab wo si has em-elidad.

#### **Ho'ige'idahuna mashchamadag**

*An g neid g Luke 11:2-4*

<sup>5</sup>“Pi g wo s-e chehgidamk mamt hekid wo e ho'ige'idahu. Hegam mo s-e chehgidamk at wo gegokiwua k wo e ho'ige'idahu am em-namki ed ch an kahya ch ed. Kut wehsijj wo ha neid k ab wo si has ha elidad. Neh, id o d ha namkidadag. Nt wo si shel em-ahgi mat g Jiosh pi ab hu has wo ha elidad. <sup>6</sup>Ahpim amt am wo i wahp e-kih ed k ab wo si i kuh g kihjeg k am wabsh hejelko wo e ho'ige'idahu Jiosh wui. Kut heg wo wa'i em-neidad ch ab wo has em-elidad.

<sup>7</sup>“Hegam mo pi mahch g Jiosh o am wabsh mu'ikko e dahm hab ha'ichu chech'e hab elidch mat hab wa'i masma wo ha kah g Jiosh. Mt wabshaba ahpim pi hab masma hab wo e junihid. <sup>8</sup>Jiosh o d em-ohg

ch heki hu s-mahch mam haschu i tatchua mam wa chum koi ab hu tahni ha'ichu. <sup>9</sup>Bamt masma am wo e ho'ige'idahunad:

T-ohg Jiosh, an ap kihdag dahm kahchim ch ed.

Kuch ab si has m-elid ch si ha'ichuchud g m-chehig.

<sup>10</sup> Ab ach m-tahni mapt wo i ge'edaj g e-kownaltalig ia t-shahgid mat g m-tatchui am hab wo e junihid ia jewed dahm hab masma mo an hab e wua m-kihdag ed.

<sup>11</sup> Ab g i s-t-ho'ige'id k ab wo t-mahkad g ha'ichu hugi wehs tashkaj.

<sup>12</sup> Gam g hu hab i juhni g pi ap t-chu'ijig hab masma mach gam hu pi chechegitod g ha-chu'ijig hegam mat hedai pi ap has chu'i ab t-wui.

<sup>13</sup> Pi g am hiwid g Jiawul mas am wo t-shul pi ap'ekam ch ed. [Aphi ap d kownal wehs ha'ichu dahm ch wehs edgid g gewkdag.

Kutt ab wo si has m-elidad chum hekid.]

<sup>14</sup> Neh, bamt masma am wo e ho'ige'idahunad Jiosh wui wabsh pi chegitok g pi ap ha-chu'ijig. T g Jiosh gam hu hab wo i juh g pi ap em-chu'ijig. <sup>15</sup>T wabshaba g em-chu'ijig pi gam hab wo i e juh mamtp pi wo pi chegito g ha-chu'ijig.

**Mamtsh hebaichujj wo dagito g e-gegosig mamt wo si e ho'ige'idahu**

<sup>16</sup>“Pi g wo s-e chehgidamk mam pi ap e tahtk mamt hekid he'ekio pi wo e gegos e ho'ige'idahunch. Hegam

mat wo s-e chehgidam at wo nei g e-namkidadag mat g hemajkam ab wo si has ha el. Nt wabshaba wo si shel em-ahgi mat g Jiosh pi ab hu has wo ha el. <sup>17</sup>Am g wo wakon g e-wuhiosha k ab wo si i gaswua g e-m'o'o. <sup>18</sup>T hab pi wo mahchk g hemajkam ab i em-neidk mam pi e gegosid. T heg wo wa'i s-mahchk em-ohg Jiosh ch ab wo si has em-elidad.

### **T-kaisdag an Jiosh kihdag ed**

*An g neid g Luke 12:33-34*

<sup>19</sup>“Pi g an hu wo e to'idahid g s-kaisdag id dahm jewed. Tp hems wabsh wo padt o atp hems hema wo em-ehs. <sup>20</sup>Mt wabshaba wo hekaj g e-kaisdag am Jiosh wehhejed. T heg wo wa wepok mam heg an e to'idahim Jiosh kihdag ed. T pi hekid wo padt. Kut pi hedai wo em-ehs. <sup>21</sup>Kumt am wo s-hihimim no pi g em-tatchuidag am ulinig mo hebai ha'ichug mam haschu hab i elid mo d em-kaisdag.

### **Mash t-tonlidch g t-amichudadag**

*An g neid g Luke 11:34-36*

<sup>22</sup>“Em-wuhpui at s-ap am wo i wahki g tonlig matp wo s-mamsk <sup>23</sup>k wabshaba pi am hu wo i wahki matp pi wo mamsk. Kum heg hekaj s-ap nuhkud. Pegih, wahm amt wo si s-ap nuhkudad g ha'ichu e-amichudadag mat heg s-ap am wo i wahki g wohokam. Dat wo si ge'e s-chuhugamk em-wehhejed matp pi wo ap'ek g em-amichudadag.

### **Matt pi ab hu ha'ichu t-eniga ab wo si pihk t-elidad**

*An g neid g Luke 16:13; 12:22-31*

<sup>24</sup>“Pi at hedai wo e nako mas ha wepo hab masma ab wo ha neidad

g gohk e-a'amo. Hemho wa atp hems hema ba'ich wo i s-wohog elidad. Em-kaisdag o heg wa wepo mo d em-ahmo mamtp heg hekaj ba'ich wo i pihk e elidad mam hi g Jiosh.

<sup>25</sup>“Neh, nt heg hekaj hab wo em-ah mamt pi wabsh wo i e kudutad heg hekaj mams haschukaj wo e gegos o mams haschukaj wo e enigadad. Jiosh at ab em-mah g em-doakag, pegih, k ab hab wa'ap wo em-mah mamt haschukaj wo e dagio'idad. <sup>26</sup>An g wo i ha neid hegam u'uwhig mo an nen'e. Idam o pi ha'ichu e'eshad ch pi od g ha'ichu esha ch pi gan hu e to'idahim g ha'ichu bahidag. K wabshaba g em-ohg Jiosh ha nuhkud. Kum eda ahpim ba'ich d i si ha'ichu mo g u'uwhig. <sup>27</sup>Pi amt wo e nako mams am ba'ich wo i himch g e-a'ahidagga, chum ams hems wo si e kudutad am chegitokch.

<sup>28</sup>“Pi g am wo si e kudutad ab amjed mams haschu ab wo enigat. An g wo i neidad g ha'ichu heosig m an wehsko chuhch. Heg o wa wepo mo si s-kehg e enigadadch ch eda pi ha'ichu sha'i shohshom. <sup>29</sup>Solomonbad o pi hab masma s-kehg e enigadadch, chum as d si s-kais kownal. <sup>30</sup>Neh, ha'ichu wuhshanig o wabsh al he'ekia tash an hab chu'ig. K eda g Jiosh si s-kehg an wuhshad. Kum ahpim ba'ich d i ha'ichu am wehhejed. Kut woho ab wo em-enigadad. Pegih, mt heg hekaj ab wabsh wo si hiwgad <sup>31</sup>ch pi am hu wo e kudutad ab amjed mams hebai wo bei g e-gegosig o g e-wehshuga.

<sup>32</sup>Hegam mo pi mahch g Jiosh o id am wa si oid. M eda ahpim d Jiosh a'aliga. K heg s-mahch mam tatchua wehs ihda. <sup>33</sup>Wehpeg g am wo i e dagitok Jiosh wui k hab d wo s-ap'ekamk. Kut heg wehs ab wo i em-mah mam haschu i tatchua.

<sup>34</sup>“Pi g am wo sha'i e kudutad heg amjed mat haschu has wo i e juh ba'ich tash. Am o wa ha'ichug g em-kudutadag id i tashkaj ch pi hab chum mahs mams g si'alim kudutadag ab wo i wehnad.

**Pi g am wo s-ko'okam has ha ahgad**

*An g neid g Luke 6:37, 41-42*

**7** “Pi g am hedai has wo ahgad nat pi ab uhpam wo i e nodagi em-wui. <sup>2</sup>Mamt has i masma wo has ha ahgad, t ab wo i nod em-wui g has ahgadag hab masma. Ab at wo i e nodagi em-wui mamt has i masma ab wo neidad hema.

<sup>3</sup>“Pi g am wo si s-nen'oidad g hema chu'ijig. Tp hems ba'ich i ge'ej g hejel em-chu'ijig. Id at heg wo wa wepok mam g chum ha'ichu ab i s-wuhshdamk wuhij ed mo eda ba'ich i ge'e ha'ichu ab wo'o em-wuhi ed. <sup>4-5</sup>Do iattogi mamtp hab wo chei mamt ha'ichu ab wo i wuhshad wuhij ed mo eda g ba'ich i ge'e ha'ichu ab wo'o em-wuhi ed. Hemho wa amt wehpeg wo i ap'ech g pi e-ap'edag k haha wo e nako mamt wo i ap'ech g hema pi ap'edag.

<sup>6</sup>“Pi g ab hu wo ha ahgid g Jiosh ha'ichu ahga hegam mo pi ab hu tatchua. Heg at wo wa wepok mamt g s-ta ke'idam gogogs ab wo ha mah g hekia s-ap'ekam ha'ichu o g kokji ab wo ha mah g si s-namkig

babiuga. Gogogs at hi ab wabsh wo i nehni k wo s-ko'okam has wo em-juh. T g kokji hi wabsh wo kehiwia g babiuga.

**Mamt has masma wo bei ha'ichu**

*An g neid g Luke 11:9-13*

<sup>7-8</sup>“Ab g wo ha tahnid ha'ichu k ab wo bebhed. Am g wo e gahgidad ha'ichu k wo cheh. Ab g wo shontpagad. T ab wo i e kuhipi'o g pualit em-wehhejed. <sup>9</sup>Ahpim o'og, namt hig wabsh g hodai wo mah g e-alidag mat g simito wo em-tai <sup>10</sup>o wabsh g wamad wo mah mat g watopi hidod ab wo em-tai? <sup>11</sup>Chum ams d pi ap'ekam ch eda s-mahch mamt s-kehg ha'ichu wo ha mah g e-a'aliga. Wahm hig g em-ohg Jiosh at woho ba'ich i s-kehg ha'ichu ab wo em-mah mamt ab wo tahnid ha'ichu.

<sup>12</sup>“Am g hab wo ha juhkchid g hemajkam mam has i chum ha elid mat hab wo em-juhkchid. Bamt masma wehs am hab wo juh mo haschu an o'ohanas Jiosh heki hu o'ohana ed.

**Mash s-hasig matt am wo i wahp Jiosh kihdag ed**

*An g neid g Luke 13:24*

<sup>13-14</sup>“Am g wo i e dagitok Jiosh wui k ab wo s-wohog elidad. Id at heg wo wa wepok mamt am i wahp al aj kihjeg t amjed k am aj wohg oidch hihim. Pi o mu'ijj hab masma hab e wua. Kumt hab wa'i masma am wo bei g pi ha huhugedam doakag. (13) Pi o hasig mamt hab wabsh wo junihid g hejel e-tatchui. Id at heg wo wa wepok mamt ab s-tadani kihjeg t amjed i wahp k am

s-tadani wohg oidch hihim. Mu'ijj o hab masma hab e wua ch hab ab aihim g Jiawul kih.

**Mamtsh has masma wo s-mai mas  
hedai s-wohom d s-ap'ekam**

*An g neid g Luke 6:43-44*

<sup>15</sup>“Mu'i at an wo i wuwaha g s-chu i'attomkam k hab wo e a'agad mo d Jiosh ha'ichu i tashogiddam. Am g wo s-ha nen'oidad mat pi am hu wo i em-shul pi ap'ekam ch ed. T wo s-em-padchudam hab masma mat g sheh'e wo s-mu'am g kahwal. <sup>16</sup>Mt wo s-mahchk mo pi d wohokam am neidch mo has masma. Nat hig wo e nako g ho'i sha'i mat wo bahidagt g uhdwis o g suhna? Pegih, t hab wa masma pi wo e nako hegam s-chu i'attomkam mas wo em-oidk hab wo e juh. <sup>17</sup>Neh, heg at wo wa'i s-kehg bahidagt s-kehg ha'ichu wuhshanig. <sup>18</sup>T g pi kehg wuhshanig pi kehg wo bahidagt. <sup>19</sup>Kumt wo shonch k gam hu wo mei. <sup>20</sup>Neh, mt hab wa masma wo ha mai mas hu wa woho d Jiosh ha'ichu i tashogiddam mamt wo nei mas wa woho ab s-wohog elid g Jiosh.

**Matsh ha'i hab wabsh wo chum e el  
mo ab si hiwig g Jesus**

*An g neid g Luke 13:25-27*

<sup>21</sup>“Mu'ijj at hab wo chum ni-a'agad mani d s-ap'ekam ha-kownalig ch wabshaba pi am hu hab wo junihid g ni-ohg Jiosh tatchui. Kut g Jiosh pi am hu wo i ha wahpki e-kihdag ed.

<sup>22</sup>“T ab wo i e ai g lodaita tash. T idam hab wo chum kaijjid ab ni-wui, 'S-ap'ekam ni-kownalig,

m-gewkdgakaj ach am ahgachug g Jiosh ha'ichu ahga ch gam hu i ha wuwhasid g jijawul ch am hab junihim g s-hasig ha'ichu.’

<sup>23</sup>“Kunt hab wo chei ab ha wui, 'Pi ani hekid sha'i s-em-mahch. Gam g hu wo hihim ab ni-amjed ahpim mam hab junihim g pi ap'ekam.' T hemho wa gam hu wo hihi.

**Mattsh has masma s-wihnam wo  
shondad g t-doakag**

*An g neid g Luke 6:47-49*

<sup>24</sup>“Ab g wo s-wohog elidad g ha'ichu ni-ahga. T hab wo s-ap'ek g em-doakag. Id at heg wo wa wepok matp hems hema s-wihnam wo shondad g e-kihta. <sup>25</sup>T hab pi wo i gei mat hekid wo hewed k juh k wo s-gewkam mel g shuhdagi. Pegih, mt hab wa masma s-wihnam wo gegokkad mo ihda kih mamtp ab wo s-ni-wohog elidad.

<sup>26</sup>“T wabshaba pi wo ap'ek g em-doakag mamtp pi ab hu wo wohog elidad g ha'ichu ni-ahga. Heg at wo wa wepok matp hems hema pi wihnam wo shondad g e-kihta. <sup>27</sup>T wo si hewed k juh k s-gewkam wo mel g shuhdagi. Kut g kihj wo i gehsh k am wabsh wo i e padch. Pegih, t hab wa masma wo i e padch g em-doakag mo ihda kih mamtp pi ab hu wo ni-wohog elidad.”

**Jesus gewkdgag**

<sup>28</sup>Neh, tsh am i ha'asa ha mashcha g Jesus. Tsh g hemajkam si has i el <sup>29</sup>no pi s-e mamachim ha mashcham. Sh eda hegam mo d chum chehanig ha mashchamdandam pi hab masma s-e mamachim ha mashcham.

**Matsh g Jesus hema doaj mash g  
chuhkugaj wabsh muhkchim**

*An g neid g Mark 1:40-45; Luke 5:12-16*

**8** Tsh ab hahawa i hud g Jesus kawulk t amjed. Tsh ab i oi hegam mu'i hemajkam mo an wehmaj.

<sup>2</sup>Tsh am hema jiwia g o'odham mash mumku heg hekaj mumkidag mo g chuhkugaj muhkchim k atsh ab i gei Jesus wecho k hab kajj, "S-ap'ekam ni-kownalig, ab g si i s-ni-ho'ige'id k i ni-doajid, pej maptp wo tatchuad."

<sup>3</sup>Tsh g Jesus ab tahtam k hab kajj, "Am o wa s-ap'e. Doajini."

Tsh am ha hekaj i doa.

<sup>4</sup>Sh hab hahawa kajj g Jesus ab wui, "Neh, pi apt hedai wo ahgid k wabshaba am ha hekaj wo hih pahl wui. T am wo m-chechga k wo wohokamch mapt doa. Pt am hab haha wo juh hegai iagchulida mo wa g Jiosh em-chehani Mosesbad o'ohana ed. T hab wo s-mahchk g hemajkam mapt woho doa."

**Matsh g Jesus hema doaj ahmoj  
wehhejed**

*An g neid g Luke 7:1-10*

<sup>5</sup>Kutsh gam hu hahawa hihi idam Jesus k am dada Capernaum t am.

Sh amai am hema d shondal ha-ge'ejig ch ab Rome t amjed am d ha kehsha ch ab si tahni g i wehmtadag ch hab kajj,

<sup>6</sup>"S-ap'ekam ni-kownalig, mumku at g ni-pionag k ab wo'o ni-kih ab ch pi e nako mas an has wo i e juh k mu'i e sho'igchud."

<sup>7</sup>Sh hab kajj g Jesus, "Am ant wo wa i him k wo doaj."

<sup>8</sup>Sh hab kajj hegai shondal ha-ge'ejig, "Pi ani am hu hugkam d ha'ichu maps am wo i wah ni-kih ed. Am apt hab wabsh wo chea. T wo doa g ni-pionag. <sup>9</sup>Bo wa masma ab ha'ichu ni-chehani g ni-ge'ejig. Kuni ab s-wohog elid. K g ni-shondalig hab wa'ap ab s-ni-wohog elid. Hema ant hab wo ah, 'Am g hihm.' T am wo hih. Nt hema hab ep wo ah, 'Ab g i hihm.' T ab wo i hih. Kuni g ni-pionag hab ep a'aga mat ha'ichu hab wo ni-juni. K am hab wua."

<sup>10</sup>Kutsh si has i el g Jesus am i kaiok k hab kajj ab ha wui hegam mo an wehmaj, "Neh, ab o si ni-hiwig ihda gawul mahs o'odham. Pi ani hekid sha'i kah mas hab masma ab si ni-hiwig g Tutuligo. <sup>11</sup>Kunt hab wo em-ahgi mat mu'ijj ab wo i hihi si'al wecho amjed ch hudunig wecho amjed k am wo wehmaj dadhaiwua g Abrahambad ch Isaacbad ch Jacobbad an Jiosh kihdag ed. <sup>12</sup>Id o d chum ha-ap'edag g Tutuligo. T wabshaba mu'ijj pi am hu wo i wahp no pi pi ab hu ni-hiwig. T g Jiosh gam hu wo ha shul s-chuhugam k ed. Kut chum hekid am wo shoanid ch ga hu wabsh wo i si e ki'ishch nat pi wo sha'i si s-ko'ok ha'ichu nakogad."

<sup>13</sup>Kush hab hahawa kajj g Jesus heg wui shondal ha-ge'ejig, "Gamai g hihm uhpam. T heg am hab wo e juh map haschu ab ni-tahni nap pi ab si ni-hiwig." Kutsh heg wa'i ohla ab doa g piongaj.

**Matsh g Jesus mu'i ha doaj g  
hemajkam**

*An g neid g Mark 1:29-34; Luke 4:38-41*

<sup>14</sup>Kutsh amjed gam hu ha'i hihi idam Jesus Peter kih wui. Sh am

wo'ok ch mumku g Peter hohnig je'e ch g s-toni iajidch. <sup>15</sup>Kush g Jesus an taht g nowij. Tsh ha hekaj huhug g s-tonjig ab ab. Kutsh am i wamig k ha hihidol.

<sup>16</sup>Tsh gam hu i juh. Tsh g hemajkam mu'i am ha u'apa g kok'odam ch hegam mo g jijawul an ha u'ukch. Tsh g Jesus am i ha wuwhas g jijawul k am wehs ha doaj g kok'odam. <sup>17</sup>Heki atki hu wa'i o'oha g Isaiabad matsh id am hab wo e juh. K hegai o'ohanaj hab chu'ig:

Heg at ab wo moht g  
t-mumkidag k im hu hab wo i  
juh ab t-amjed.

**Mash ha'i chum s-wohog elidamk g  
Jesus**

*An g neid g Luke 9:57-62*

<sup>18</sup>Sh mu'i hemajkam an ha wehgaj. Sh heg hekaj hab ha ahg g Jesus hegam mo si ha mashcham mat wo e nako. T gan hu aigojed wo i chehchsh g sikod shuhdagi.

<sup>19</sup>Tsh wabshaba am hema jiwia g chehanig ha mashchamdak k hab kaj, "T-mashchamdak, ni-nahtokch ani mant am wo m-oi."

<sup>20</sup>Sh hab kaj g Jesus ab wui, "Napt hig wo e nako? Neh, chum o hems g gagso ch u'uwhig ge koksh. Ni wabshaba ahni Jiosh si Kehsha pi sha'i ha kih ia jewed dahm. K heg hekaj s-hasig maps am wo ni-oi."

<sup>21</sup>Sh hema hab kaj hegam mash ab wecho e mashcham, "S-ap'ekam ni-kownalig, chum ani hi wa am i s-m-oidamk idani. T wabshaba ho'ipki hekid muh g ni-ohg. Nt wo hiashpok haha wo m-oi."

<sup>22</sup>Sh hab kaj g Jesus, "Am g ha hiwigid hegam mo pi u'ukch g wechij doakag mat wo ha hiash g ko'i. Pt ahpi hi ab wo i him k wo ni-wehmajk."

**Matsh g Jesus dodolimach g hewel  
ch shuhdagi to'otonk**

*An g neid g Mark 4:35-41; Luke 8:22-25*

<sup>23</sup>Sh g Jesus an hahawa dahiwua wahlko ch ed am ha wehm hegam mash ab si wecho e mashcham k am gahi i shul. <sup>24</sup>Kutsh haha wabsh si s-gewkam ab i meh g hewel shuhdagi dahm k ab i to'otonkai g shuhdagi matsh gam hu si i chesh wahlko dahm. Sh g Jesus am wo'ok ch kohsh. <sup>25</sup>Kutsh am wui hihim k am wuhan k hab kaj, "T-kownalig, t-do'ibiani. Ttki wo t-ko'ij."

<sup>26</sup>Sh hab kaj g Jesus ab ha wui, "Shahchu amt ahgk si e totods. Pi amki ab hu si ni-hiwig." Bash kaj ch am wamig k ab si chehani g hewel ch shuhdagi to'otonk mat wo dodolimat. Kutsh gam hu wabsh i pi shahm.

<sup>27</sup>Tsh wehsijj si has i elid k hab kaj, "S has mahs d o'odham ihda mo chum hems g hewel ch shuhdagi to'otonk ab s-wohog elid."

**Matsh gohk ha amjed gam hu hab i  
ha juh g jijawul**

*An g neid g Mark 5:1-20, Luke 8:26-29*

<sup>28</sup>Tsh am aigo dada. K amai d ha-chehshani g Gadarene hemajkam. Sh am ge chehchog mo am g ko'i e to'aw. Tsh gohk ab i wuwha g chechoj. Kush g jijawul an ha u'ukch. Kush sha'i s-ta ehbidama. Sh chum hedai s-ehbid matsh am ha'ab wo i bij.



<sup>29</sup>Tsh idam an ha nam k si s-kaidam hab kajj ab Jesus wui, “Shahchu apt ahgk ab t-wui i hih, ahpi Jiosh alidag. Napt wo s-ko'okam t-namkid mat wa chum koi e ai g tash?” Bash kajj nash pi g Jesus s-ha wuwhasidamk g jijawul.

<sup>30</sup>Sh eda mu'i an oiopo g kokji kawulk bahsho ch e gegosid. <sup>31</sup>Sh idam jijawul ab si tahni g Jesus ch hab kajj, “Pt hig wo t-hiwigi matt am wo i wahp hegama ha eda kokji.”

<sup>32</sup>Sh hab ha ahg g Jesus, “Hijiwo.” Tsh wa woho gam hu i wuwha k am wahp kokji ha eda. Kutsh wehsijj idam kokji am agshp i wohp k am shul shuhdagi ch ed k wachkk.

<sup>33</sup>Kutsh hegama mash am ha nuhkud idam kokji gam hu si wohp k am dada kihhim t am k am ha ahgid mat haschu has e juh am ha tahgio idam o'odham mash g jijawul an ha u'ukch. <sup>34</sup>Kutsh mu'ijj ab amjed hegai kihhim am i namkhi g Jesus k am i chehg k hab ahg mat wo si s-ha ho'ige'id k gm hu wo hih ab ha-chehshani amjed.

### Matsh g Jesus hema doaj g pi himidkam

*An g neid g Mark 2:2-12; Luke 5:17-26*

**9** Tsh an hahawa gahi ep hihi g wahlkokaj idam Jesus k am dada Capernaum t am mo am kih. <sup>2</sup>Tsh am ha'i dada hema wo'ichughch wahkus ch ed nash pi ab wabsh i s-moik ch pi himid. Sh am neid g Jesus mo ab si hiwig idam mat am wui u'apa ch hab kajj ab wui g mumkudam, “Am g si e gewkaj, ni-nawoj. Gm ant hu hab i juh g pi ap m-chu'ijjig.”

<sup>3</sup>Sh ha'i gegok g chehanig ha mashchamdama ch hab kajj ab a'ai

e wui, “Ih, sho'o wa'i si pi ap neok hab masma e wepogidch g Jiosh.”

<sup>4</sup>Kush g Jesus s-mahch mo haschu am chegito ch hab kajj ab ha wui, “Am am g pi ap'ekama ha'ichu chegito <sup>5</sup>hab elidch mani hab wabsh kajj ch pi woho edgid g gewkdag mant gam hu hab wo i juh g pi ap ha-chu'ijjig. Bam elid mo s-pehegim hab e kajj, ‘Gm ant hu hab i juh g pi ap m-chu'ijjig,’ no ge hedai s-mahch mas s-wohom gam hu hab i e juh. <sup>6</sup>Pegih, nt wo em-chehgi mani woho ge gewkdag ch hab wua mani has i kajj ahni Jiosh si Kehsha,” k hab hahawa kajj ab wui ihda mo ab wabsh i s-moik, “I g wamig k am beh'i g e-wahkus k hihm am uhpam.”

<sup>7</sup>Kutsh am i wamig k gam hu hih uhpam. <sup>8</sup>Kutsh am i nei g hemajkam ihda k si s-ehbeni k ab si has i el g Jiosh natki pi ab mah g Jesus ihda gewkdag.

### Matsh g Jesus ab i wai g Levibad (Matthew)

*An g neid g Mark 2:13-17; Luke 5:27-32*

<sup>9</sup>Tki amjed am hih g Jesus k am hu hebai himad ch ni-cheh ahni Matthew. Nid wa eda am chikpan mo am g kownal ha kowlant g hemajkam g lial. D hab kajj g Jesus ab ni-wui, “Ab g i hihm k ab si ni-wecho wo e mashchamad.” Nid am ha hekaj i wuhshani k am i oi.

<sup>10</sup>Am hu hebai amjed, nid ab ha wai hegama Jesus mat am wo e gegos ni-kih am. D ab i hihi. Kud mu'i am dada k am t-wehm e gegosid g lial ha kowlantdam ch hegama mo pi am hu si oid g t-shohshon ha-himidag.

<sup>11</sup>Dki am ha'i dada g Palasi. Kuchd eda am t-gegosid. D idam hab kajj ab t-wui, "Ih, k haschu ahgch g em-mashchamdam ha wehm e gegosid g pi ap hemajkam, chum hems g lial t-kowlantdam?"

<sup>12</sup>D g Jesus am i ha kaiok hab kajj ab ha wui, "Idam pi ap hemajkam o s-e do'ibiamk hab masma mat g kok'odam wo s-e doajidam. Hegam mat hab wo e elidad mo s-ap'e at pi wo tatchua g mahkai. <sup>13</sup>Pi ant hab ahgk ia jiwia jewed dahm manis wo ha do'ibia hegam mo pi e do'ibiamk. Neh, an o o'ohanas mash wa hab kajj g Jiosh:

S-ap am hab wua g iagchulida ab ni-wui.

K wabshaba ba'ich d i si ha'ichu mamt wo s-hehemajimak.

*Hosea 6:6*

Pegih, am g wo s-amichud mo haschu hab ahg ch hab kajj."

### **Ha-himdag mash he'ekko pi e gegosid**

*An g neid g Mark 2:18-22; Luke 5:33-39*

<sup>14</sup>D am ha'i dada hegam mo ab si wecho e mashcham hegai John mo wa ha pahl wapkon k ab kakke g Jesus ch hab kajj, "Neh, mu'ikko ach pi t-gegosid hab ahgch matt wo t-ho'tige'idahu. K hegam Palasi hab wa'ap e wua. K eda haschu ahgch idam pi hab masma hab e wua mo ab si m-wecho e mashcham?"

<sup>15</sup>D hab kajj g Jesus ab ha wui, "Nat hig pi wo e gegos g wo ha hohntam naipijju mat eda heg am wo ha wehmajk? T am wo i e ai mat pi am hu wo ha wehmajk. T am hahawa pi wo e gegos. Pegih, bat

wo wa e juh idam ni-naipijju mant hekid pi ia hu wo ha wehmajk."

<sup>16</sup>D am hahawa chum ha tashogid g Jesus mat g wechij mashchama pi ap wo wehnad g heki hu himdag hab kajjch, "Pi at hedai g wechij ikuskaj wo shohsho g hekiuchij lihwa mat wo s-e wia nat pi wo i dahiwua hegai wechij ikus k ba'ich wo i wantp g hekiuchij. <sup>17</sup>K hab wa'ap pi hab mahs machs am wo toa g wechij uhdwis wadag am hekiuchij ha'ichu elidag kostal ch ed nat pi wo wantsh g hekiuchij am i e ak. Kut wo e iawua g uhdwis wadag. Wechij uhdwis wadag at am wo e toa wechij kokstal ch ed mat wehs wo s-ap e nuhkud."

### **Matsh hema uhpam chegitoich g chehia muhki g Jesus**

*An g neid g Mark 5:21-43; Luke 8:40-56*

<sup>18</sup>D am wabsh kia ha wehm neok g Jesus. Kud am hema jiwia g t-haha'ichuga k ab i gei wui k hab kajj, "Ni-chehiaga atp hems heki hu muh. Pt wabshaba ab wo i him k ab wo taht. T wo e chegito." <sup>19</sup>Kud gam hu wehmaj hih g Jesus. Kuchd ahchim gam hu ep ha oi.

<sup>20</sup>Kudki eda am hema ha'ichug g uwi mash gamai gohk ahid ab wa'i mumku heg hekaj mo g eh'edaj jegwoni. Kuchd am hihim. Kudki ab i hih Jesus wui k ab taht g kahbaj hugidag <sup>21</sup>nash pi hab e elid matp hems an wabsh wo taht k wo doa.

<sup>22</sup>D g Jesus am sikol i kekiwua k neidok hab ahg, "Pegih, ni-uwiga, ab g si i e gewkad. Am apt wa doa napt pi ab i s-ni-wohoch." Kud amjed gam hu s-doa.

<sup>23</sup>D amjed gam hu hih g Jesus k am i wah heg kih ed matsh g chehiagaj muh. Sh am si s-nankosig g mumsigo ch shoanidam. <sup>24</sup>Sh hab kajj g Jesus ab ha wui, “Gam g hu wo i wuwlaki wehsijj. Heg o wa wepo ni-wehhejed mo wabsh kohsh g chehia.” Kush wehsijj si s-ko'okam ash nash pi s-mahch matsh muh. <sup>25</sup>Kumtsh am wabsh i chum ha wuwhas. Tsh g Jesus am i wah mo am wo'o g chehia k ab bei nowij ab. Kutsh i wami. <sup>26</sup>Kum amjed an a'ai wehsko a'agahim mat has e juh.

**Matsh g Jesus gohk ha nench g pi neneadam**

<sup>27</sup>Kuchd am hu hebai ep hihim. D gohk pi neneadam o'odham ab i oi g Jesus k si s-kaidam hab kajj, “Ab g si i s-t-ho'ige'id ahpi mapsh d t-kownaligbad David amjedkam.” <sup>28</sup>Kuchd ged hu i wahp kih ch ed. D idam gohk pi neneadam am dada wui g Jesus.

Kud heg ab ha kakke ch hab kajj, “Nam s-wohochud mant wo ni-nako mant wo em-nench?”

D hab kajj idam, “Heu'u, ab ach si m-hiwig, s-ap'ekam t-kownalig.”

<sup>29</sup>Kud g Jesus ab ha taht g ha-wuhpui k hab kajj, “Am at hab wo e juh mam has i masma ab s-wohochud.”

<sup>30</sup>Kud wa woho ab bei g e-nendag.

D g Jesus ab si s-gewkam ha ahgid, “Pi g am hedai wo sha'i ahgid ihda.”

<sup>31</sup>D wabshaba am wabsh i chum dagito k gam hu hihim k am a'ai i ahgahi wehsko anai ab amjed g Jesus.

**Matsh g Jesus doaj g muhyo**

<sup>32</sup>D am hahawa ha'i ep dada g hemajkam Jesus wui am hema

u'apadch mo pi ha neok nash pi jiauwul an u'ukch. D g Jesus gam hu wabsh chum i wuhshad g jiauwul ab amjed. <sup>33</sup>Kud ha hekaj wabsh neo ihda o'odham.

D wehsijj si e todsid k hab kajj, “Pi ach hekid ha'ichu hab sha'i masma neid am t-shahgid.”

<sup>34</sup>Kud wabshaba g Palasi hab kajj, “Jijawul ha-ge'ejig o ab mahkch g gewkdag. Kuki heg hekaj e nakog ch ab i ha wuwhasid g jiauwul.”

**Matsh g Jesus si pi ap e taht ha hekaj g hemajkam**

<sup>35</sup>Am achd hahawa hahasko oiopod ch am daiw wehs kihhim ch ed. Kud g Jesus am ha mashcham g hemajkam ha-chechopi ed ch am ha ahgidahim g s-kehg ha'ichu ahga ab amjed g Jiosh kownaltalig ch am ep ha dodajid g nahnko mahs kok'odam. <sup>36</sup>D mu'i ab wui e chehm g hemajkam. Kudki g Jesus si i s-ha ho'ige'el no pi si e kudut ch e sho'igchud hab sha masma mat g kakawal hab wo e wuad pi e nuhkudch.

<sup>37</sup>D hab kajj g Jesus ab t-wui, “Neh, mu'ij o hegam mo e nahtokch mat wo e do'ibia. Kuch eda pi mu'ij ahchim mach am ha ahgidahim g do'ibiadag ahga. Id o heg wa wepo mat hebai g ha-hihka wo si ge'ejk. T g ha-pionag pi wo mu'ijk. <sup>38</sup>Ab g wo si tahnid g Jiosh mat mu'i wo i ha chuhcha mat am wo i ha ahgidahid g s-kehg ha'ichu ahgaj ch ab wo i ha ba'ihamad hegam mo e nahtokch.”

**Matsh gamai gohk am i ha chuhcha g Jesus**

*An g neid g Mark 3:13-19; Luke 6:12-16*

**10** Ab ad hahawa i t-wai g Jesus ahchim mach ab

si wecho t-mashcham k ab t-mah g gewkdag matt gam hu wo i ha wuwahas g jijawul ab ha amjed hegam mo an ha u'ukch k wo ha dodaj g kok'odam.

<sup>2</sup>Dachd gamai gohk ahchim mach d si chuhchajj. Simon o d wehpegkam ch hab ep chehgi Peter. K g Simon shehpij hab wa'ap d Jesus kehsha ch hab chehgi Andrew. K ha'i ep d James ch John ch d e-wepngam. K g ha-ohg hab chehgi Zebedee. <sup>3</sup>K ha'i ep d Philip ch Bartholomew ch Thomas. Ni ahni hab wa'ap d kehshaj ch hab chehgi Matthew ch wa d ge lial ha kowlantdam. K hema d hegai James mo g ohgaj d Alphias. K hema hab chehgi Thaddaus. <sup>4</sup>K hema hab ep chehgi Simon ch d hema hegam mo tatchua matt ahchim Tutuligo hejel wo himchudad g t-kownaltalig. K hema hab chehgi Judas Iscariot ch d ihda matki wo gagda g Jesus.

**Matsh g Jesus chuhchai gam hu ahgachug g ha'ichu ahgaj**

*An g neid g Mark 6:7-13; Luke 9:1-6*

<sup>5</sup>D g Jesus am hahawa i t-shelini ahchim gamai gohk matt gm hu wo ahgachugad g ha'ichu ahgaj hab kaijch, "Pi g am hu wo hihim gawul mahs hemajkam ha wui ch Samaria hemajkam ha wui ia'i idani. <sup>6</sup>Am amt wo wa'i hihi hegam ha wui e-wehm Tutuligo. Idam o hab sha masma mo g heb hu hihimkam kahwal. <sup>7</sup>Am g wo hihim k id am wo i ha ahgidahi mat am wo i himch g Jiosh g e-kownaltalig jewed dahm. <sup>8</sup>Mt wo ha dodaj g kok'odam k ab uhpam wo i ha chehegi toich hegam mat wabsh

chum koi k g jijawul ab wo i ha wuwahas ha amjed hegam mo an u'ukch k wo ha dodaj hegam mo kok'o heg hekaj mo g ha-chuhkug wabsh muhkhim. Ab ant wabsh em-mah ihda gewkdag. Kumt pi ha'ichu wo ha kowlantad am hab ha junidch.

<sup>9-10</sup>"K wabshaba ab d ha-wuikam hegam mat ab wo em-kaiha mat ab aigo wo i em-wehmaj k wo em-dagio'i. Mt heg hekaj ab wabsh wo e enigadadch ch wo hihi pi ha'ichu u'adch mams hekaj wo e dagio'i o ams wo ha namkid. T g Jiosh wo em-nuhkud. Kumt pi wo u'ad g cheowikud mamt hekaj wo e nuhkud.

<sup>11-14</sup>"Mt am wo i wahp kihhim ch ed k an wo i ha gahghi hegam mat hedai s-ap ab wo i em-nei k ab ha wui hab wo chei, 'Jiosh o ab em-makiog g si ge'e s-ap tahhadkam.' Kut am wo i em-wahpkid k wo em-dagio'i am hugkam mamt hekid gm hu ba'ich ep wo i hihi. Kutp hems hebai pi ap ab hu wo i em-nei g kihkam. Kumt am wo si i shahmud g jewed ab e-tahtad ab k hab wo ha chehgi mamt wo ha dagito. <sup>15</sup>Nt wo si shel em-ahgi mat g Jiosh ba'ich i s-ko'okam wo ha namkid hegam mat pi ab hu wo kaiha ihda s-kehg ha'ichu ahgaj matsh hi hegam hab ha juh pi ap hemajkam mash am kih Sodom ch Gomorra kihhimbad ch ed.

**Matsh ab wo i hih g sho'igchuda**

*An g neid g Mark 13:9-13; Luke 21:12-17*

<sup>16</sup>"Neh, am amt wo oiopod ha shahgid g hemajkam. Kut ha'i wo

s-ta ehbidamak am em-wehhejed hab sha masma mo g shesh'e am ha wehhejed g kahwal. Mt wo si s-e nen'oidad hab masma mo g ban ch wo si s-hehemajimak hab masma mo g hohohi. <sup>17</sup>Ab o him g tash mamt an wo em-u'u k wo em-lodait k atp hems ep wo em-gewitta am chechopi ch ed. <sup>18</sup>Am amt wo em-lodai ha tahgio g haha'ichu ch kokownal heg hekaj mam ab ni-hiwig. Kumt wo s-ni-mahch k ah am ha tahgio ch am ha tahgio g gawul mahs hemajkam. <sup>19</sup>Pi g wo sha'i e kudut ab amjed mamt has masma e wehhejed wo neo. <sup>20</sup>Hekia S-ap'ekam Gewkdag at wo em-ahgi mamt has wo chei.

<sup>21</sup>“Haha'ichu at wo em-kokda. Kut ab ha wui wo em-gagda chum hems g em-wepnag o g em-jehj o g em-a'aliga. <sup>22</sup>Mu'i hemajkam at wo s-em-keh'idad ni-hekaj. Kumt wo sha e nakog k wo gahi wuwha g e-sho'igdag. T g Jiosh am wo i em-wahpki e-kihdag ed. <sup>23</sup>Neh, mtp hems wo em-sho'igch hasko. Pegih, mt wo ahho heg amjed kihhim k gam hu ba'ich kihhim wui ep wo hihi. Nt wo shel em-ahgi mant ep wo jiwia ahni Jiosh si Kehsha mamt koi wo ha chehmo g e-wehm o'odham ha-kihhim.

<sup>24-25</sup>“E mashchamd am o ab wabsh wecho hegai mo d ha mashchamd ch heg hekaj wepo wo nako ha'ichu. T g pion hab wa'ap wepo ha'ichu wo nako g e-ahmo. Kumt ahpim hab wa'ap ni-wepo wo nako ha'ichu. Neh, bo ni-a'aga ha'i mani d ge Jiawul ch wahm s-ko'okam has wo em-ahgad

ahpim mam ab si ni-wecho e mashcham.

### **Mamtsh hedai wo s-ha ehbidad**

*An g neid g Luke 12:2-7*

<sup>26</sup>“Pi g wo sha'i ha ehbidad g hemajkam nat pi wehs wo i e ma'ishpi'o mo haschu i e ma'ishch ch wehs wo s-e mai mo haschu s-e a'agchud. <sup>27</sup>Si amt tasho wo i ahgahi wehsko mani haschu ab si hejel em-ahgid. <sup>28</sup>Pi g wo sha'i ha ehbidad hegam matp hedai wo chum s-em-kokdaim. Pi at wo e nako mas ba'ich i s-ko'okam has wo em-juh em-kokdak. Heg at wa'i Jiosh wo e nako mat am wo em-da'ich Jiawul kih ed mamtp pi am hu wo wohog elidad. Kumt heg ab wo wa'i si has elidad.

<sup>29-31</sup>“K wabshaba g Jiosh si s-hemajima ch pi tatchua mas wo s-ko'okam em-juh. Am g wo oidahim mo chum hems g al u'uwhig s-ap ha nuhkud. K eda chum alo pi ha'ichu namkig idam. Kum ahpim d si ha'ichu am tahgio. Jiosh o wehs ha'ichu s-mahch ab em-ab. Mt heg hekaj pi ha'ichu wo sha'i ehbidad ab wui e dagitokch.

### **Mamtsh wo tasho e ah mam ab hiwig g Jiosh si Kehsha**

*An g neid g Luke 12:8-9*

<sup>32</sup>“Neh, am amt wo s-ni-mahch k ah hemajkam ha tahgio mam d ni-wohochuddam. Kunt ahni hab wa'ap wo s-em-mahch k ah am tahgio g ni-ohg Jiosh. <sup>33</sup>Kutp wabshaba hedai pi wo ni-mahch k ah am ha tahgio g hemajkam, nt ahni hab wa'ap pi wo mahch k ah am tahgio g ni-ohg Jiosh.

**Matsh g hemajkam ab e wui wo gegokiwua heg hekaj Jesus**

*An g neid g Luke 12:51-53; 14:26-27*

<sup>34</sup>“Pi g hab wo e elidad mat wo dodolimat g hemajkam mant ia jiwia. Ab at em-wui wo gegokiwua hegam mo pi ab hu has ni-elid.

<sup>35</sup>Wihpiop atp hems wo s-keh'idad g e-ohg ch g chetcha g e-je'e o g e-kahkma je'e. <sup>36</sup>Em-wehm kihkam atp hems d wo si em-obgak.

<sup>37</sup>“Pi at ha'ichu wo namkigk g em-wohochudadag mamtp pi ba'ich wo i ni-tatchua mam hi g e-ohg ch e-je'e ch e-a'aliga. <sup>38</sup>Mt gam hu wo dagito g hejel hab e elida k ahni hab ni-elida hab wo junihid ni-wehhejed e sho'igchudch. Heg at wo wa wepok mam ab mohto g kots ch ab ab wo e muhkid. Kut pi ha'ichu wo namkigk g em-wohochudadag mamtp pi hab masma ab wo i ni-oi. <sup>39</sup>Pi amt wo heki wua g e-doakag mamtp wo hekaj am ni-wehhejed. Heg at wo heki wua g e-doakag matp hedai wo chum s-da'ad.

**Mash hedai d ha wuikam g s-kehg mahkigdag**

*An g neid g Mark 9:41*

<sup>40</sup>“Heg o wa wepo mo s-ap ab ni-neid ahni matp hedai ahpim s-ap ab wo em-neidad. K hab wa'ap s-ap ab neid g Jiosh matp hedai s-ap ab wo ni-neidad. <sup>41</sup>Hegai mat hedai s-ap ab wo i ha nei g ni-chuhchai at ha wepo wo bei g s-kehg mahkigdag. Kut hegai mat hedai s-ap ab wo i nei g s-ap'ekam o'odham heg wepo wo bei g s-kehg mahkigdag. <sup>42</sup>Kut heg s-wohom

ab wo bei g s-kehg e-mahkigdag mat hedai chum hems g s-hehpi shuhdagi ab wo hema ha wasibi idam al a'al am hema em-wehhejed ahpim mam ab si ni-wecho e mashcham.”

**Mamtsh has masma wo s-amich g Jiosh si Kehsha**

*An g neid g Luke 7:18-35*

**11** Am ad i ha'asa ha'ichu t-shelini g Jesus ahchim gamai gohk e-chuhchai k gam hu hahawa him k atsh an i ha mashcham k ha mihshmad mo an a'ai mia kihhimag.

<sup>2</sup>Kumd wa eda am wabsh kia kuhpch hegai John mad am i shonwuich g pahl wakona. Sh hegam mad ab si wecho e mashcham am ahgid mo haschu chikpan hab wua g Jesus. Kutsh am ha'i ha cheha mat am wo hihim k ab wo kakke mas woho d Jiosh si Kehsha.

Kudki am dada <sup>3</sup>k ab kakke g Jesus ch hab kaj, “Ab o t-chehani g John matt ab wo m-kakke maps woho d Jiosh si Kehsha aha nat ab hahawa hema wo i wuhsh mat d wo hegaik.”

<sup>4</sup>D eda g Jesus am ahg g e-kehg ha'ichu e-ahga ch ha dodajid g kok'odam ch hab hahawa kaj ab ha wui hegam John chuhchai, “Am g uhpam wo hihim k wo ahgi g John mam haschu i kah ch haschu i neid. <sup>5</sup>Ha ani dodajid g pi ha dodajidam kok'odam ch pi neneadam ch pi hihimidkam ch pi chechkaidkam ch ha chehegitoichud g ko'i ch am ha ahgid g sho'igkam mat g Jiosh wo ha do'ibia. <sup>6</sup>T g Jiosh ab wo

s-em-ho'ige'idad mamtp hedai ab wabsh wo ni-hiwgad.”

<sup>7</sup>Neh, d amjed gam hu uhpam hihi.

D g Jesus am ha'ichu ha ahgid g hemajkam ab amjed g John ch hab kajj, “Neh, am amt wa hihim k ab kaiha g John. K wa eda am oimmelhim pi apkokam jewed ch ed. Kumt pi woho am hu wo i wuwha wui matp d wabsh s-pehegi o'odham ch am gawul wo wuad g e-ne'oki. Pi o an a'ai e wanchkwua g John. <sup>8</sup>Kumt pi hema s-neidam mo s-kakaisim e enigadadch. Hegam mo hab masma e enigadadch o si s-kakaisim kih. <sup>9</sup>Neh, heg amt s-kaim ha'ichu i tashogiddam k heg wa woho kah. K g John am ba'ich ha'ichu k ed ep kehk. <sup>10</sup>Heg o hab ahg g Jiosh ch hab kajj:

Am ant wo hema i maskogi mat am wo i ha ap'ech g hemajkam am wehhejed g si ni-Kehsha jiwhiadag am jewed dahm. *Malachi 3:1*

Neh, bash kajj g Jiosh. <sup>11</sup>Kunt wo em-ahgi mo g John wehs hemajkam ha ba'ich d i si s-has ha'ichu. T wabshaba am wo i e chehgi g Jiosh kownaltalig id dahm jewed. T hahawa chum hems g si pi ha'ichukam Jiosh ab hiwigdam ba'ich d wo i s-has ha'ichuk mo hegai John. <sup>12</sup>Mu'i hemajkam, chum wa g pi ap hemajkam, o am i wahpk Jiosh kownaltalig ed ab i amjed mat g John ab i ahgahi g ha'ichu e-ahga. <sup>13</sup>Wehsijj g kekelibad Jiosh ha'ichu i tashogiddam o am ahgachug mat wo e chehgi g Jiosh kownaltalig. K

hegai t-chehanig mat g Mosesbad ab bei Jiosh t amjed hab wa'ap tashogid mat wo e chehgi. <sup>14</sup>Neh, heki ash hu si ha mihshmad hegai kelibad Jiosh ha'ichu i tashogiddam mash hab chehgig Elijah. K g Jiosh o'ohana hab chu'ig matsh hema ep wo i wuhshani k hab wo masmak mash wa hegai. Pegih, ihda John o d hegai mat an wo i wuhsh. <sup>15</sup>Neh, am g wo s-ap i a'amichud ihda.”

<sup>16</sup>D hab ep kajj g Jesus, “Hegam mat pi ab hu wohog el g John k pi ab hu ni-bei o hab masma pi ta wepoma mo g a'al. Neh, tp hems am wo chichwid g a'al ch hab wo ha ah, <sup>17</sup>‘Am att em-gehged g e hohontam ha-piastakaj. Kumt pi e waila. Am att nei g muhki ne'i. Kumt pi sha'i shoshani.’ <sup>18</sup>Id ani hab ahg mat g John ab i wuhshani k pi ih'e g nawait ch mu'ikko pi e gegosid e ho'ige'idahunch Jiosh wui. K mu'ijj hab kajj mo g jiauwul an u'ukch g chegitoidaj. <sup>19</sup>Nt ahni ia jiwia Jiosh si Kehsha k wabsh chum hedai ha wehm ni-gegosid. K mu'ijj hab kajj mani s-banma ch s-i'idag ch d ha-nawoj g s-ta keke'idamakam lial ha kowlantdam ch hegam mo pi ap oid g t-chehanig. Neh, bo masma pi ta wepoma ch im hu hab wabsh i juh g Jiosh amichudadag. K wabshaba hegam mo ab s-wohochud g wohokam am chehgidch mo d wohokam.”

**Mash si s-ta ehbidama mamt pi ab hu wo wohoch g Jesus**

*An g neid g Luke 10:13-15*

<sup>20</sup>Mu'i kihhim ed ad wa am hab junihim g s-hasig ha'ichu g Jesus. D eda mu'ijj pi gam hu s-ohhod g

pi ap e-chegitoi ab kahk. D g Jesus si s-ha keh'id <sup>21-22</sup>ch ab kaij, "Mu'i s-hasig ha'ichu ant am hab juh Korasin ch Bethsaida kihhim ch ed. Kutki eda muij amai pi ab hu ni-wohochud k heg hekaj ab wo bei g s-ko'ok e-namkidadag ge'e lodaita tash ch ed. Hegam mo am kih Tyre ch Sidon t am ch pi ge'e mahch ab amjed g Jiosh at pi am hu hugkam wo bei g s-ko'ok e-namkidadag. Tp hems ab wo i e sho'igchud k gam hu wo s-ohhod g pi ap e-chegitoi matp wo nei ihda s-hasig ha'ichu. <sup>23</sup>Capernaum t am hemajkam o ab si e haschud. T wabshaba g Jiosh gam hu wo shul Jiawul kih ed. Hegam mash wa am kih Sodobad t am at gam hu wo s-ohhod g pi ap e-chegitoi matp wo nei ihda s-hasig ha'ichu. Kut pi wo chum padch g ha-kihhim. <sup>24</sup>Idam at pi am hu hugkam wo bei g s-ko'ok e-namkidadag mat g Capernaum t am hemajkam mat hekid wo e ai g ge'e lodaita."

**Ab g wo i hihim ni-wui k wo e uh'ulinihogi**

*An g neid g Luke 10:21-22*

<sup>25-26</sup>D g Jesus am hahawa e ho'ige'idahun k hab kaij, "Ni-ohg Jiosh, dap kownal wehs ha'ichu dahm. K hab d m-elida mat pi hedai wo e nako mas hejel wo s-amich g ha'ichu m-ahga. E o ehstokch am ha wehhejed g s-chu a'amichuddam ch ha'ichu s-mahchim. Kup wabshaba am ha chegid idam mo ha'ichu s-mahchimk hab masma mo g a'al. Ni heg hekaj ab si m-ho'ige'id."

<sup>27</sup>D hab ep kaij ab ha wui g hemajkam, "Ni-ohg at wehs ha'ichu

ab ni-mah. Pi o hedai s-ni-mahch ch heg wa'i ni-ohg s-ni-mahch. K pi hedai mahch g ni-ohg. Ni ahni wa'i s-mahch ch hegam ehp mani hedai i ha wui tashogid.

<sup>28</sup>"Ab g wo i e dagito ni-wui wehsijj ahpim mam d gewpkokam. Kunt ahni ab wo i em-mah g ulinihogig. <sup>29-30</sup>Pi o hasig g ni-himdag ch pi wechima wo i em-mohto'i ha'ichu. Si ani s-hemajima ch ab wabsh ni-sho'igchud. Kumt ab ni-amjed wo s-mahch k wo e ulinihogidad. Hegai mant ab hehe'ejel wo em-mohto'i at wo s-hawkk nant pi am wo i em-wehmajk hab sha masma matt wo t-makodadch g yehwakaj." Neh, bo kaij g Jesus.

**Mamsh ab ha abchud mash chikpan mihshmda tash ed**

*An g neid g Mark 2:23-28; Luke 6:1-5*

**12** Kuchd am hu hebai hihim t-mihshmda tash ed. K am eshas g pilkani wohg huhugid an. Kutt bihugk k hekaj ab ha wohni g pilkani ch i mohon ch ko'a. <sup>2</sup>Kudki t-neid hegam Palasi ch hab kaij ab Jesus wui, "Neh'e, melchkwua o g t-chehanig mo id hab wua mihshmda tash ch ed."

<sup>3</sup>D g Jesus hab kaij ab ha wui, "Bo wabsh masma hab e wua matsh wa g Davidbad. Pi amtiki chegitoi matsh heg has e juh am si i bihugimk. Bo chu'ig g Jiosh o'ohana <sup>4</sup>matsh am i wah ge'e cheopi ch ed k am ui g pahn k huh hegam ha wehm mash am wehmaj. K d hegai pahn mo am e to'aw k ch hegam d wa'i ha-wuikam papal. T eda hemho wa am hab e juh. K heg hekaj am wa s-ap'e.



<sup>5</sup>“Am g ep wo oidahim mo g papal am hab junihim g e-chikpan ge'e cheopi ch ed mihshmda tash ed. K eda g Jiosh pi ha mohto'id g chu'ijig no pi hemho wa am hab junihim g e-chikpan ge'e cheopi ch ed. <sup>6</sup>Kuni ahni ba'ich d i si ha'ichu mo g ge'e cheopi.

<sup>7</sup>“An o o'ohadag mo hab kajj g Jiosh:

S-ap am hab wua g iagchulida ab ni-wui.

K wabshaba ba'ich d i si ha'ichu mamt wo s-hehemajimak.

*Hosea 6:6*

Neh, pi amt ab hu wo ha mohto'i g chu'ijig hegam mo pi d chu'ijkam mamtp woho wo s-amichudad ihda. <sup>8</sup>Pi am amichud mani ahni d Jiosh si Kehsha ch gewkdag am dahm g mihshmda tash.”

**Matsh ha doaj g Jesus mihshmda tash ed**

*An g neid g Mark 3:1-6; Luke 6:6-11*

<sup>9</sup>D am ha dagito g Jesus. Kuchd gam hu hihi hema wui g cheopi. <sup>10</sup>D am hema daha g o'odham mad g nowij mahnikodag.

D am ha'i g o'odham ab ha'ichu s-abchudamk g Jesus ch ab kakke, “No hiwigidas am t-chehanig ed mamt wo ha doaj mihshmda tash ed?”

<sup>11</sup>D hab kajj g Jesus ab ha wui, “Matp hems hema g em-kahwaliga am wo gei wag ch ed mihshmda tash ed. Namt hig pi wo chikpan k wo i wuhshad? <sup>12</sup>O'odham o ba'ich d i si ha'ichu mo g kahwal. Pegih, k g t-chehanig am t-hiwgid matt am hema wo i wehmt mihshmda tash ed.”

<sup>13</sup>Neh, bad kajj ch hab hahawa ahg g mahnikokam, “Ab g si i shelin g e-nowi.” Kud am wabsh i chum shelin k am wa'i hekaj ap'et. <sup>14</sup>D amjed gam hu hihi g Palasi k e wehm a'aga mat has hig masma wo mua g Jesus.

**Jiosh si Kehsha**

<sup>15</sup>D am i kah g Jesus mash am s-mu'amk k gam hu hih ab amjed amai. Kud mu'i hemajkam am i oi. D wehs ha dodaj g kok'odam <sup>16</sup>ab si ha chehanich mat pi hedai ha'ichu wo ahgidad ab amjed. <sup>17</sup>Neh, bad wa masma hab e juh hegai matki g Isaiaabad heki hu wa'i o'oha matsh hab wo e juh. O'ohanaj o hab chu'ig mash g Jiosh an a'aga g si e-kehsha ch hab kajj:

<sup>18</sup>Id o d si ni-Kehsha mat d wo ni-pionagk.

Ab ani si tatchua.

K si ni-tatchui oidch hab masma.

Ab ant wo mah g Hekia

S-ap'ekam ni-Gewkdag.

Kut am wo ha ahgi g wehs

hemajkam mant s-ap wo ha

a'appe.

<sup>19</sup>Pi at wo ha ne'owinad ch pi wo hihnkad ch pi wo s-kaidam amogad am kahya ch ed.

<sup>20</sup>T wo ha do'ibia hegam mat chum alo pi wo e nako hab masma mamtp hems ahpim wo do'ibia g e-e'es mo i gehsim.

Am at wo ha gewkadch am

hugkam mat wo gewito g pi ap'ekam.

<sup>21</sup>T wehs nahnko mahs hemajkam ab ab wo i e gewpkai.

**Mash g Jesus g Jiawul wehm ab a'ai e cheggia**

*An g neid g Mark 3:20-30; Luke 11:14-23*

<sup>22</sup>D ha'i g hemajkam am hema u'apa g o'odham Jesus wui. Kudki id pi nead ch pi ha neok nadki pi g jiawul an u'ukch. D g Jesus doaj ihda o'odham. D hahawa e nako mad neok k ep ha'ichu neid.

<sup>23</sup>D g mu'i hemajkam ab si has i el ihda k hab kajj, "Shahag wepo mo id d hegai Davidbad amjedkam mach ab nenida."

<sup>24</sup>D am i ha kah hegam Palasi k hab kajj, "Moki g jijawul ha-ge'ejjig ab mahkch g gewkdag. Kuki heg hekaj gam hu hab i ha wua g jijawul ab ha amjed hegam mo an ha u'ukch."

<sup>25</sup>D g Jesus s-mahch mo haschu am chegito ch hab kajj ab ha wui, "S-mahch am mat g o'odham wo padch g hejel e-jewedga o g hejel e-kihchim mat ab a'ai wo e cheggia. T g e-wehm kihkam hab wa'ap wo padch g hejel e-kihdag mat ab a'ai wo e cheggia. <sup>26</sup>Pegih, t has hig masma g ge Jiawul pi wo padch g hejel e-kownaltalig matp ab wo sha ni-mah g gewkdag mant am wo i ha wuwhas g piongaj.

<sup>27</sup>Neh, hegam mo ab si em-wecho e mashcham o hab wa'ap i ha wuwhasid g jijawul. Kum eda pi hab masma hab ha elid mo g Jiawul ab ha mahkch g gewkdag. Pegih, id o am wohokamchud mo pi wohe hegai mam hab chum elid. <sup>28</sup>Hekia S-ap'ekam Gewkdag o ab ni-mahkch ihda gewkdag mani hekaj gam hu hab i ha wua g jijawul. K id am wohokamchud

mat heki hu in i wuhsh g Jiosh kownaltalig em-shahgid.

<sup>29</sup>"Neh, wohppo'id ani g ge Jiawul hegam mo an ha u'ukch. Kum s-mahch mat pi hedai wo e nako mas am hu wabsh wo wah hema kih ed mat wo s-ha'ahamak k am wo ui g enigaj, heg hi wa matp wehpeg wo wulsh.

<sup>30</sup>"Hegai matp hedai pi ab hu wo i ni-wehmajk o ab ni-wui kehk ch wabsh ha gantan hegam mani s-ha do'ibiamk. <sup>31</sup>Wehs o gam hu hab i junihog g pi ap ha-chu'ijig g Jiosh. K wabshaba si ge'ej g em-chu'ijig mamtp ab wo has ah g Hekia S-ap'ekam Gewkdag. T g Jiosh pi hekid gam hu hab wo i juh. <sup>32</sup>Im at hu hab wo i juh g Jiosh g chu'ijigaj hegai mat ab wo has ni-ah ahni Jiosh si Kehsha k wabshaba pi hekid gam hu hab wo i juh g chu'ijigaj hegai mat wo has ah g Hekia S-ap'ekam Gewkdag.

**Mas hedai s-wohom d s-ap'ekam**

*An g neid g Luke 6:43-45*

<sup>33</sup>"Mt wo s-mai mas hedai d s-ap'ekam o'odham hab masma mamt wo s-mai mas s-kehgaj g bahidkam uhs. S-kehg uhs at wo s-kehg bahidagt. T g pi kehg uhs wo pi kehg bahidagt. <sup>34</sup>Ahpm Palasi am hab sha masma mam d kokk'oi ch pi wo sha'i e nako mams s-kehg ha'ichu hab wo chei nam pi d pi ap'ekam ch hemho wa am hab wo chei mo haschu am hab i chu'ig em-ihbdag ed. <sup>35</sup>S-kehg ha'ichu o am hab chu'ig ihbdaj ed g s-ap'ekam o'odham. Kut heg s-kehg ha'ichu hab wo kajjid. K pi kehg ha'ichu am hab chu'ig ihbdaj ed

g pi ap'ekam o'odham. Kut heg pi kehg ha'ichu hab wo kaijjid.

<sup>36-37</sup>“Id ant hab wo chei mat hemho wa wehs ha'ichu am wo mahsko e wua lodaita tash ch ed mam haschu has i kaij id dahm jewed. Jiosh at wo hekaj g hejel em-ne'oki mat wo em-lodai, chum hems g s-pehegi em-ne'oki.”

### **Mamsh s-neidamk g s-hasig ha'ichu**

*An g neid g Mark 8:11-12; Luke 11:29-32*

<sup>38</sup>D am ha'i ha'ichug g chehanig t-mashchamdahm ch Palasi ch hab ahg g Jesus, “Ha mashchamdahm, ab g t-chehgid g s-hasig ha'ichukaj maptp woho d Jiosh si Kehsha.”

<sup>39</sup>D hab kaij g Jesus, “Si o hig woho pi ap'e ch mehk ab amjed g Jiosh hegahm mat pi ab hu wo ni-hiwgam k ho'ip nei g s-hasig ha'ichu. Heg ant ab wo wa'i ha chehgi mant am oidk hab wo ni-juh hegai Jiosh ha'ichu i tashogiddam mash hab chehgig Jonah. <sup>40</sup>Id ash wa waik tash oidam am ha'ichug ge'e watopi wohk ed. Neh, nt hab wa masma waik tash oidam am wo kahchk hiha'ini ch ed ahni Jiosh si Kehsha.

<sup>41</sup>“Jonabad ash wa am ha ahgid g Ninevah t am hemajkam g Jiosh ha'ichu ahga. Kutsh wa gam hu s-ohhod g pi ap e-chegitoi k hab pi ab hu wo e chu'ijigch ge'e lodaita tash ch ed. Ni ahni ba'ich d i si ha'ichu mo g Jonabad. Kum eda pi ab hu ni-kaiham ch heg hekaj ab wo motoig g chu'ijig lodaita tash ed.

<sup>42</sup>“Mehkjed atsh ab i hih g uwi kownal ab Sheba jewed t amjed matsh ab wo kaiha g Solomonbad ha'ichu mahchig. Ni ahni ba'ich

d i si ha'ichu mo g Solomonbad. Kum eda pi ab hu ni-kaiham ch heg hekaj ab wo motoig g chu'ijig lodaita tash ed.”

### **Matsh g jiauwul has masma an uhpam ep wo bei g o'odham**

*An g neid g Luke 11:24-26*

<sup>43</sup>Kud hab ep kaij g Jesus, “Matp hems g jiauwul an wo hema u'ukch g o'odham k wabsh wo dagito mat am hebai ep wo e ul. Kut hegai o'odham wo i chum kegch g e-doakag. T wabshaba g jiauwul pi hebai wo chehg. <sup>44</sup>K hekaj hab wo i e ah, ‘Mo hig woho d ni-kih hegai o'odham. Nt hig am uhpam wo hih wui.’ Kut wa woho am wo uhpam him k wo cheh mo am wabsh jeg ch si kegchudas ch hehosimhunah. <sup>45</sup>T am haha wo him k wewa'ak ep wo ha u'apa g jiauwul. T idam ba'ich wo i pi ap'ek ch am wehmaj wo i chiwia. T ihda o'odham ba'ich wo i pi ap'ek mo wa ga hu i heki hu. Neh, bat wa masma hab wo e juh hegahm mat pi gam hu wo s-ohhod g pi ap e-chegitoi.”

### **Mash g je'ej ch wepngaj s-neidamk g Jesus**

*An g neid g Mark 3:31-35; Luke 8:19-21*

<sup>46</sup>Am ad wabsh kia ha wui neok g hemajkam g Jesus. Kud am haha wabsh dada g je'ej ch wepngaj s-neidamk. D wabshaba si mu'ij g hemajkam an wehgaj. Kud heg hekaj gam hu wabsh mehk gegok.

<sup>47</sup>D hema hegahm mo an wehgaj gegok g Jesus hab kaij ab wui, “M-je'e ch m-wepnag ash am hu gegok ch s-m-neidamk.”

<sup>48-49</sup>D g Jesus hab ahg, “Neh, idam mo ab ni-kaiham o heg wa

wepo mo d ni-je'e ch ni-wepnag.  
<sup>50</sup>Hegam mat hab wo junihid g  
 ni-ohg Jiosh tatchui o hab masma  
 mo d ni-wepnag ch ni-je'e."

**Ha'ichu wepogida ahga ab amjed g  
 ha'ichu eshdam**

*An g neid g Mark 4:1-9; Luke 8:4-8*

**13** Heg wa'i tash ed achd gam  
 hu hihi Galilee Kahchki  
 wui. D am i chum dahiwa g Jesus  
 mat wo t-mashcha. <sup>2</sup>Kud wabshaba  
 sha'i mu'i hemajkam an e hemapai  
 wehgaj. D heg hekaj gan hu i  
 chesh g Jesus wahlko ch ed k an  
 dahiwa k amjed ha mashcham.  
 D g hemajkam an gegok shuhdagi  
 koa an ch amjed ab kaiham.  
<sup>3</sup>Kud mu'i ha'ichu ha tashogid g  
 wepogida ahgakaj ab amjed g Jiosh  
 kownaltalig. Id o d ha'ichu ahgaj  
 mo hab kaij:  
 "Am ant he'es wo i em-tashogi g  
 Jiosh kownaltalig wepogidch mat  
 hema an i chum gantad g e-kaichka  
 e-oid ed. <sup>4</sup>T ha'i gan hu shul wohg  
 ch ed. T g u'uwhig am dada k ko'ito.  
<sup>5</sup>T ha'i gan hu shul waw t ab mo pi  
 ge'ej g jewed k ab ha hekaj hi wa  
 chum i wuhsh no pi pi an hu juhk  
 g jewed. <sup>6</sup>T ab i chesh g tash. Kut  
 wabsh gaksh no ge mehk tat. <sup>7</sup>T  
 ha'i gan hu shul sha'i ch ed. Kut  
 g sha'i ab i ge'ege k ha kokda g  
 ha'ichu esha. <sup>8</sup>T wabshaba hegama  
 mat an s-ap shul moihuna ch ed  
 an wuhshani k mu'i ab kait. Ha'i  
 at siant ab kait ch ha'i chuhdpo  
 wehst-mahm ch ha'i waikko  
 wehst-mahm." <sup>9</sup>Kud hab hahawa ep  
 kaij g Jesus, "Neh, am g wo s-ap i  
 a'amichud ihda."

**Mash haschu ahgch g wepogida  
 ahgakaj ha mashcham**

*An g neid g Mark 4:10-12; Luke 8:9-10*

<sup>10</sup>D am hahawa i e hejelko. Kuchd  
 am wui hihim k ab kakke mas  
 haschu ahgch pi ta amichudam ha  
 mashcham g ha'ichu wepogidakaj.

<sup>11</sup>D hab kaij, "Nt wo em-ahgi  
 mo has d ahga no pi g Jiosh  
 em-hiwgid mamt wo s-mai mo  
 haschu hemu am maskogid  
 ab amjed g e-kownaltalig. Ni  
 wabshaba heg wa'i ha ahgid ha'ichu  
 wepogida ahga hegama mo pi ab  
 hu wohochudamk. T hab pi wo  
 amich ha'ichu ab amjed g Jiosh  
 kownaltalig. <sup>12</sup>Hegama mat s-ap  
 wo hekaj g e-ap'ledag at ba'ich ep  
 wo i nei. T hegama mat pi ap wo  
 hekaj wabsh wo heb hu wua. <sup>13</sup>Heg  
 ani hekaj g ha'ichu wepogidakaj  
 ha'ichu ha ahgid:

Mat pi wo amich, chum as wo  
 ha'ichu neid k wo ha'ichu kah  
<sup>14</sup>K hekaj am wohokamchud hegai  
 mo an hab chu'ig Isaiabad o'ohana  
 ed mash wa hab kaij Jiosh. Bo  
 chu'ig:

Chum am hekid ab kah g  
 ha'ichu ni-ahga ch ab  
 neidchug g ni-ap'echuda ch  
 wabsh pi amichud  
<sup>15</sup>no pi g em-chegitoidag wabsh  
 s-kohmagi.

Heg o wa wepo mamt am si ha  
 kuhkp g e-wuhpui ch e-nahnk  
 mamt pi wo neid k pi wo kah  
 k pi wo amich nam pi pi e  
 nohnogidamk ab ni-wui.  
 Kunt heg hekaj pi am hu wo i  
 em-ap'ech. *Isaiah 6:9-10:*

Neh, bo chu'i g g Jiosh o'ohana.  
<sup>16</sup>Kum eda ahpim pi hab sha'i mahs mo hegam mash pi amichud. Jiosh o ab s-em-ho'ige'id. Kum s-ap s-amichud mam haschu i neid ch kah. <sup>17</sup>Nt wo si shel em-ahgi mo mu'ijj g kekelibad Jiosh ha'ichu i tashogiddam ch Jiosh hemajkamga chum si tatchua mat wo neid k wo kah ihda mam haschu i neid ch kah idani. K wa wabshaba pi hab mahs am ha wehhejed.

**Mash g ha'ichu ahgdam hab masma mo g ha'ichu eshdam**

*An g neid g Mark 4:13-20; Luke 8:11-15*

<sup>18</sup>“Am ant haha wo em-ahgi mani haschu chum em-mashcham id hekaj ha'ichu ni-ahga ab amjed g ha'ichu eshdam. Heg kaichka ani wepogid g Jiosh ha'ichu ahga. Id o am e gantan ha shahgid g hemajkam hab masma mo g ha'ichu kai. <sup>19</sup>K eda ha'i pi amichud no pi g ha-i'ibdag s-kawpk hab sha masma mo g wohg. K g Jiawul am wabsh s-pehegi ha wohppo'id mo haschu i kah.

<sup>20</sup>“K ha'i g ha-i'ibdag hab sha masma mo hebai pi ge'ej g jewed ab waw t ab. K idam si s-hohho'id ch kah g Jiosh ha'ichu ahga <sup>21</sup>ch wabshaba pi wihnam ab hu u'ukch ch am hi wa he'es wo i s-chegitokahimch. T oi wa g kudutadag ab ha wui wo i hih. Kumt wo ha sho'igch id hekaj Jiosh ha'ichu ahga. T ha hekaj wabsh wo ta'i i shul.

<sup>22</sup>“K ha'i g ha-i'ibdag hab sha masma mo hebai s-sha'ig. K am ha sha'ijidch g pihk ha-elidadag ch s-ha-kaisdag. Kut pi ha'ichu

wehhejed wo s-kehgajk am Jiosh wehhejed.

<sup>23</sup>“K ha'i g ha-i'ibdag s-moik hab sha masma mo g moi'huna. Idam at wo s-amich g Jiosh ha'ichu ahga k am wo ahgachugad matp hems ha'i siant ab ep wo ha ba'iha k atp hems ha'i chuhdpo wehst-mahm k ha'i g waikko wehst-mahm ab ep wo ha ba'iha.”

**Ha'ichu wepogida ab amjed g sha'i**

*An g neid g Mark 4:26-29*

<sup>24</sup>Jesus ad am hema ep ha ahgi g hemajkam g ha'ichu wepogida hab kaijch, “Am ant ba'ichu ep wo i em-tashogi g Jiosh kownaltalig wepogidch mat hema ei g s-kehg kai e-oid ed. <sup>25</sup>T am hu hebai haha wabsh hema jiwia g obgaj chuhug ch ed mo wehsijj kohksh k g sha'i kai am ei ha shahgid g pilkani k gam hu hahawa ep hih. <sup>26</sup>Kut am i wuhsh g e'es k ab i mudadt. T am hahawa s-masma i wuhsh g sha'i.

<sup>27</sup>“K hab kaij g eshdam pionag, ‘S hebai amjed i wuhsh g sha'i mapt wa eda t-mah g s-kehg kaichka.’

<sup>28</sup>“K hab kaij am ha wui, ‘Ni-obga at hab juh ihda.’

“K hab hahawa ep kaij g piongaj, ‘Natt am wo i ha huhpsh hegam sha'i?’

<sup>29</sup>“K hab ha ahg, ‘Pia'a. Mt wo am hu wabsh g pilkani ha huhpsh. <sup>30</sup>Am g wabsh wo hiwigid mat am e wehm wo wuwaha. T ab wo e ai mat wo e hih. Kunt hab haha wo ha ahgi g hihkdam mat g sha'i wehpeg am wo ha huhpsh k am wo i hemapad k ged hu wo mehid k am haha wo i hemapai g pilkani k ged hu wo i ba'iha.’ Neh, bo kaij g ha-ahmo.”

**Matsh has masma wo i ge'eda g  
Jiosh kownaltalig**

*An g neid g Mark 4:30-32; Luke 13:18-19*

<sup>31</sup>D am hema ep ah g ha'ichu wepogida g Jesus hab kaijch, "Am ant he'es wo i em-tashogi g Jiosh kownaltalig am wepogidch g ha'ichu kai. <sup>32</sup>Neh, heg am e'esha mo al chumaj ch oi wa am wo wuhshani k ha'as wo i ge'eda mo g s-ehheg uhs. Tp hems g u'uwihg an ab wo koksht. Pegih, t hab wa masma wo ge'e i ge'eda g Jiosh kownaltalig, chum as al chum am wo shonwua."

**Matsh wo chehmo g jewed g Jiosh  
kownaltalig**

*An g neid g Luke 13:20-21*

<sup>33</sup>D am hema ep ah g ha'ichu wepogida g Jesus hab kaijch, "Jiosh kownaltalig o hab wa'ap wepogidas mo g jewajidakud. Heg amt wo be k am wo wah wehnadk g chu'i k am he'es wo i dai. T wo chehmo g wahga mat wehs am wo i kopodka. Pegih, t g Jiosh kownaltalig hab wa masma wo chehmo g jewed."

**Mash heg wa'i wepogida ha ahgid g  
Jesus g hemajkam**

*An g neid g Mark 4:33-34*

<sup>34</sup>Jesus ad haschu i ha ahgid g hemajkam ch heg wa'i hekaj ha'ichu wepogida ahga. <sup>35</sup>Heki atki hu wa'i o'oha g kelibad Jiosh ha'ichu i tashogiddam mat id am hab wo wa e juh. K hab chu'ig g o'ohanaj:

Ha'ichu wepogida ant wo hekaj k am wo ha ahgi g hemajkam hegai mo pi hekid sha'i s-e

mahch ga hu i shohshonk amjed. *Psalm 78:2*

**Matsh g Jesus am i tashogi g  
wepogida ahga ab amjed g sha'i**

<sup>36</sup>D g Jesus gam hu ha dagito g hemajkam k ged hu i wah kih ch ed. Kuchd am wehmaj hihim k ab hahawa kakke mas has d ahga hegai wepogida ahga ab amjed g sha'i mo am t-ahgid.

<sup>37</sup>D hab kaij, "Heg ani wepogidas mo g ha'ichu eshdam ahni Jiosh si Kehsha. <sup>38-39</sup>K g oidag d ihda jewed. K g s-kehg kai d hegam mat wo e do'ibia k am wo ha'ichugk Jiosh kownaltalig ed. K g ni-obga d jijawul ha-ge'ejig. K g eshaj d hegam mat pi wo e do'ibia. Hihka tash o d lodaita tash. K hegam mat hab wo juh g hihka d anghil.

<sup>40</sup>"Hegai sha'i mehidda o hab d ahga mat g pi ap hehemajkam gam hu wo i e shul jiwul kih ed mat hekid wo i e ai g lodaita tash. <sup>41</sup>Am ant wo i ha chuhcha g anghil ahni Jiosh si Kehsha. Kut ab wo i hihi jewed wui k gam hu hab wo i juh hegai matp haschu am wo i em-wua pi ap'ekam ch ed <sup>42</sup>k gam hu wo ha shul g pi ap chu'ijkam mei ch ed. T idam wo si shoanid ch ga hu wabsh wo i si e ki'isch nat pi wo sha'i si s-ko'ok ha'ichu nakogad. <sup>43</sup>T am hahawa wo si tondad g s-ap'ekam hemajkam e-ohg Jiosh kownaltalig ed. Neh, am g wo i a'amichud ihda ahpim mam kah!"

**Mash g Jiosh kownaltalig heg  
wepogidas mo g si ge'e s-kaisdag**

<sup>44</sup>D am hema ep ah g Jesus g ha'ichu wepogida ahga hab kaijch,

“Jiosh kownaltalig o heg wepogidas mo g s-namkig ha'ichu mat am hema ehsto oidag ch ed k hahawa muh. T am hema haha wabsh chehg k am wabsh uhpam i ma'ishp k si s-hehgig ch am i wehs gagda g ha'ichu e-eniga k am hahawa uhpam ep him k wabsh wehs ha nolawt ihda oidag.”

**Mamtsh wehs ha'ichu ha ba'ich wo i s-behim g Jiosh kownaltalig**

<sup>45-46</sup>Kud hab ep kaij g Jesus, “Bamt masma wo s-behim g Jiosh kownaltalig mat g s-namkig hohodai nolawtdam wo s-behim hegai mat wehs ha ba'ich wo i s-kehgajk. Heg at wehs wo gagda g ha'ichu e-eniga mat wo e nakog k wo ha nolawt hegai s-namkigchu.”

**Mash g Jiosh kownaltalig heg wepogidas mo g waptopi u'ikud**

<sup>47</sup>D hab ep kaij g Jesus, “Am ant he'es wo i em-tashogi g Jiosh kownaltalig am wepogidch g waptopi u'ikud chuagia. Heg at am wo wua g waptopi ha u'udam shuhdagi ch ed. T am wo e ba'iha g nahnko mahs waptopi. <sup>48</sup>Kut am wo i wanchkwua shuhdagi hugid an k am wo dahiwua k wo i ha gawulkad k hegam wo e to'i mo s-kehgaj k g pi kehg waptopi gam hu wo nehnich. <sup>49</sup>Bat wo wa masmak mat hekid wo i e ai g lodaita tash. Anghil at am wo a'ai hihim k am wo i ha gawulkai g pi ap'ekam hemajkam <sup>50</sup>k ged hu wo ha shul mei ch ed. T idam wo si shoanid ch ga hu wabsh wo i si e ki'ishch nat pi wo sha'i si s-ko'ok ha'ichu nakogad.”

**Mamtsh wo ha mashcha g wechij ha'ichu ch ep g hekiukam ha'ichu**

<sup>51</sup>D g Jesus ab hahawa t-kakke, “Namt am wa s-amich wehs ihda?” Kuchd hab kaij, “Heu'u.”

<sup>52</sup>D hab hahawa ep kaij ab t-wui, “Pegih, mt hahawa pi wabsh g Jiosh heki hu o'ohana wo ha mashchamad ch wabshaba id wehnadk ep wo ha mashchamad wechij mashchama ab amjed g Jiosh kownaltalig.”

**Mash g Jesus si kih'amkam pi ab hu tatchua**

*An g neid g Mark 6:1-6; Luke 4:16-30*

<sup>53</sup>D g Jesus am i ha'asa ah idam ha'ichu wepogida ahga. <sup>54</sup>Kuchd gam hu hihi Nazareth wui mo am d si kihkam. D g Jesus am ha'ichu ha mashcham ha-cheopi ed.

D si has elid hegam mo am kah ch ab wabsh a'ai i e kakke, “Kus hebai mai wehs ihda amichudadag ch ihda s-hasig ha'ichu. <sup>55</sup>No hig pi woho d alidaj hegai t-nawojbad mo d huk chikpandam? No hig pi g Mary d je'ej ch g wepngaj d James ch Joses ch Simon ch Jude. <sup>56</sup>Ia o wa kih g u'uwigaj. Kus hebai mai wehs ihda.” <sup>57</sup>Neh, bad kaij ch wabsh pi ha'ichuch.

D hab kaij g Jesus ab ha wui, “Jiosh ha'ichu i tashogiddam at chum hebai ab wo si has e elidad. T wabshaba g si kih'amkam o'odham ch wehmaj kihkam pi ab hu has wo elidad.”

<sup>58</sup>Neh, bad kaij ch pi mu'i s-hasig ha'ichu hab juh amai no pi pi ab hu wohochud idam mas d Jiosh si Kehsha.

**Mamtsh mua hegai John matsh am  
shonwuich g pahl wakona**

*An g neid g Mark 6:14-29; Luke 9:7-9*

**14** D eda am hahasko ha'i d ha-kokownalig g Tutuligo ch d gi'ik. D idam am hema d kownal Galilee chekshani ch ed ch hab chehgig Herod. Kumd eda wehsko a'aga g Jesus. <sup>2</sup>Kush id hab ha ahgid g e-haha'ichuga, "Heg oki d hegai mo wa ha pahl wapkonahim ch hab chehgig John. Mua ant. Kutki wabshaba uhpam e chegito k hekaj hab e nakog mat hab wo juh g s-hasig ha'ichu."

<sup>3</sup>Herod atsh wa an bei g John k wulshp k ged hu si kuh am wehhejed g e-hohnig. Id ash hab chehgig Herodias ch ash d chum hohnigaj g Herod wehnag. Kush heg hab chehgig Philip. Tsh g Herod ehs g hohnigaj.

<sup>4</sup>Sh amjed g John chum hekid hab a a'aga, "Mo pi sha'i hiwgidas maps g e-wehnag hohnig wo ehs." Kush g Herodias heg hekaj ahgid g Herod mat ged hu wo si kuh. <sup>5</sup>Tsh g Herod chum s-mu'am nash pi am ahg g pi ap ha-chu'ijig. K wabshaba g Tutuligo hab kajj mo d Jiosh ha'ichu i tashogiddam. Kush s-ha ehbid ch hekaj pi mua.

<sup>6</sup>Kutsh am i e ai g Herod mahsidag. Sh ge'e piastchud. Tsh g Herodias uwi mad am e waila ha tahgio. Tsh g Herod si s-hohho'i ihda <sup>7</sup>k wehs ha kaichudch si s-kaidam hab kajj mat hemho wa wo mah mat haschu ab wo i tai.

<sup>8</sup>Sh g je'ej hab ahg mat hab wo chei mat ab wo mah g mo'oj g John am hoas-ha'a ch ed dahshk. Tsh wa woho heg ab tai.

<sup>9</sup>Kutsh si pi ap e taht g kownal. Sh wabshaba wehsijj kah mo has i kajj. Tsh heg hekaj pi e nako mas pi am hu hab wo juh <sup>10</sup>k am hahawa hema cheha g shondal mat an wo him k wo shonch g John mo'o.

<sup>11</sup>Tsh wa woho hab e juh k am hahawa u'apa g mo'oj am hoas-ha'a ch ed dahshch k ab mah ihda uwi. Kut ihda gd hu hahawa epai mah g e-je'e.

<sup>12</sup>Kutsh am hahawa dada hegama mad ab si wecho e mashcham g John k am bei g honshpadaj k ged hu chehg k am hahawa hihim k ged hu ahgid g Jesus.

**Matsh g Jesus am ha gegos g hetasp  
mihl chechoj ch mu'i ehp**

*An g neid g Mark 6:30-44; Luke  
9:10-17; John 6:1-14*

<sup>13</sup>D am i kah g Jesus mamt mua g John k am hahawa gam hu hejelko s-himimk. Kuchd an dadhaiwua wahlko ch ed k gam hu aigo i chehchsh ha'abjed. Dki wabshaba kah g hemajkam k gn hu i bihbij wabsh hihimk. <sup>14</sup>Kuchd am dada k am wabsh i chum huhud. D eda mu'ijj am heki hu ha'ichug g hemajkam. D g Jesus si i s-ha ho'ige'id k ha dodaj g kok'odam.

<sup>15</sup>D gam hu si i juh. Kuchd am wui dada g Jesus k hab chum ahg, "Neh, mehk at wa'i juh. K eda ia hu wabsh si jegko. Am g ha ahgid g hemajkam mat gam hu wo hihi kihhim wui k wo ha nolawt g ha'ichu hugi mat wo huh."

<sup>16</sup>D hab kajj g Jesus ab t-wui, "Ahpim amt wo ha'ichu ha mah mat wo huh."

<sup>17</sup>Kuchd hab kajj ab wui, "Pi ach ge'e ha'ichu edgid. Al hetasp



sismo ch gohk waptopi ach am to'akch."

<sup>18</sup>D hab hahawa ep kajj g Jesus, "Ab g wo i u'uka'i." Kud am e u'apa. <sup>19</sup>D am hahawa ha cheha g hemajkam mat am wo dadhaiwua washai ch ed. Kud am dadhaiwua. Kud am ui ihda hetasp sismo ch gohk waptopi k am e dahm i nen k ab ho'ige'el g Jiosh k am hahawa hahain k ab t-mah. Kuchd gam hu a'ai ha mahkhi g hemajkam. <sup>20</sup>Kuchd wehsijj hug k kokwod. Kuchd ahchim chuhchaj an hahawa i u'ihim k u'apa g wihpi'idaj mat am hu'i gamai gohk hoha wo ha shuhshud. <sup>21</sup>Kuchd am hu d i hetasp mihl chechoj ch mu'ijj g u'uwi ch a'al ehp.

**Matsh ab wabsh hih g Jesus shuhdagi dahm**

*An g neid g Mark 6:45-52; John 6:15-21*

<sup>22</sup>D am hahawa t-ahgi g Jesus matt gam hu aigo wo hihi. Tsh heg am wo wi'i k am wo ha ahgi g hemajkam mat gam hu wo hihi e-kihki wui. Kuchd an i chehchsh wahlko ch ed k gam hu hihi. <sup>23</sup>D g Jesus am ha dagito g hemajkam. Kud gam hu himto. D am hahawa hejel i chesh kawulk dahm k am e ho'ige'idahu. D am i hud. D am wabsh kia hejel ha'ichug. <sup>24</sup>D g t-wahlko gam hu si eda i cheka g shuhdagi. Kud g hewel ab si s-gewkam meh ab t-wui. D g shuhdagi to'otonk am si a'ai hab t-wua wehs s-chuhugam oidk.

<sup>25</sup>Kud koi mahsi. D ab hema him t-wui an wabsh shuhdagi dahm. <sup>26</sup>Kuchd ab i neidok si

s-ehbeni ch si hihnk ch hab kajj mo d wabsh kok'oi.

<sup>27</sup>D ab hahawa si t-wui neok ch d Jesus ch hab kajj, "Pi g wo sha'i ni-ehbenid. Dani ahni. Mt oi wo s-ap e taht."

<sup>28</sup>Kud g Peter si s-kaidam hab kajj ab wui, "Ni-kownalig, maptp d wo ahpik ch ab wo i ni-wai. Nt ab wo i hih m-wui an wabsh shuhdagi dahm."

<sup>29</sup>D hab kajj g Jesus, "Oi g ab i hihm."

D wa woho ab i hud wahlko t-amjed k am wui i hih shuhdagi dahm. <sup>30</sup>D wabshaba am wabsh si s-gewkam hewed. D g Peter si s-ehbenid k gam hu wabsh i wachumkahi shuhdagi ch ed k ab si e sho'igchud k hab kajj, "Ni-kownalig, ni-do'ibiani."

<sup>31</sup>D ha hekaj am i wuhshad g Jesus k hab kajj ab wui, "Pi apki ab hu si ni-hiwig."

<sup>32</sup>D ged hu hahawa e wehm i chehchsh wahlko ch ed. D am wa'i hekaj huhug g hewel.

<sup>33</sup>Kuchd ab hahawa si has elid ch ab ihm g Jesus ch hab kajj ab wui, "Woho apki d Jiosh alidag."

**Matsh g Jesus ha dodaj g kok'odam Gennesaret t am**

*An g neid g Mark 6:53-56*

<sup>34</sup>Ga achd hu aigo i chehchsh k ab dada Gennesaret t am. <sup>35</sup>Kud g hemajkam s-amich g Jesus k hekaj ab i ha wai g kok'odam wehsko an heg oidk chekshani. Md ha u'apa Jesus wui <sup>36</sup>k ab si e sho'igchud k ab ahgid mat chum hems wabsh g kahbaj hugidag an wo taht. Kud s-ap ha doda mad hedai an i taht.

**Mash haschu d wabsh hemajkam  
ha-mashchama**

*An g neid g Mark 7:1-13*

**15** D am ha'i dada g Palasi ch chehanig ha mashchamdam ab Jerusalem t amjed k ab kakke g Jesus hab kaijch, <sup>2</sup>“K haschu ahgch g m-pionag pi ab hu wohog elid g ha'ichu ha-mashchamadag g kekelibad? Neh, e o gegosid pi am hu t-himdag oidch ha wapkonk g e-nohnhoi.”

<sup>3</sup>D hab kaij g Jesus ab ha wui, “M ahpim haschu ahgch pi ab hu wohog elid g Jiosh chehanig ch wabsh g hejel e-himdag am hab junihim? <sup>4</sup>Id o d chehanigaj g Jiosh mo hab chu'ig:

Ab g si has wo i ha elidad g e-ohg ch e-je'e, *Exodus 20:12* ch id ehp,

Mat hemho wo wa e muhkid  
hegai mat hedai wo sha  
s-ko'okam has ah g e-jehj.

*Deuteronomy 21:17*

<sup>5</sup>Kum eda ahpim ha mashcham mat pi ab hu has wo ha elidad ch ab ha wui hab wo chei, ‘Mah ant g Jiosh hegai mat haschu ab d wo i chum em-wuikamk.’ <sup>6</sup>Kum hab masma im hu hab wabsh i wua g Jiosh ne'oki ch am ha mashcham hegai mo haschu d wabsh o'odham ha-nahtoi. <sup>7</sup>Bam wabsh s-e junimk mam ab has elid g Jiosh. Kuki wabshaba g Jiosh hab em-ahg ch hab kaij ihda matki g Isaiabad an o'oha:

<sup>8</sup>Ha'i idam mo d chum  
ni-hemajkamga o hab kaij mo  
ab si has ni-elid ch ab ni-ihm.  
K wabshaba g ha-i'ibdag si  
s-kawpk ch si mehk ab  
ni-amjed.

<sup>9</sup>Pi o sha'i wohom ab has ni-elid no pi wabsh g hemajkam ha-chehanig ha mashcham hab chum masma mo d ni-chehanig.”

**Mash haschu uamhun g o'odham**

*An g neid g Mark 7:14-23*

<sup>10</sup>D g Jesus ab hahawa i ha wai g hemajkam k hab kaij ab ha wui, “Ab g wo ni-kaiham k wo s-amich. <sup>11</sup>Pi at im hu hab wo i em-juh g Jiosh heg hekaj mamt haschu wo huh k wabshaba im hu hab wo i em-juh heg hekaj pi kehg em-chegitoidag.”

<sup>12</sup>Kuchd am dada wui ahchim k hab kaij, “Nap s-mahch mat si e taht g Palasi heg hekaj map hab kaij?”

<sup>13-14</sup>D hab kaij g Jesus, “Pi g has wo e tahtkkad ab ha amjed. Do chum em-wanimeddam ch eda hab sha masma mo d pi neneadam ch chum ha wanimed g ha'i ep pi neneadam ch atp hems am wabsh ha wehm wo i shul hiktani ch ed. Ni-ohg Jiosh at gam hu hab wo i ha juh hab sha masma mamt wo huhpsh k gam hu wo nehnich g ha'ichu wuhshdag am e-esha ed.”

<sup>15</sup>D g Peter ab neok ch hab kaij, “Am g t-ahgid maps haschu tashogid ch hab kaij mat pi im hu hab wo i t-juh g Jiosh heg hekaj matt haschu wo huh.”

<sup>16</sup>D hab kaij g Jesus ab t-wui, “Kumt ahpim hab wa'ap pi koi sha'i amich hegai mani em-ahgid. <sup>17</sup>Pi at im hu hab wo i em-juh ab amjed g Jiosh mamtp haschu wo huh. <sup>18</sup>Heg at im hu hab wabsh wo i em-juh ab amjed g Jiosh mat wo

pi ap'ek g em-chegitoi. <sup>19</sup>Heg at hab wo em-juh mamt hab wo juh g ha'ichu pi ap'ekam. Neh, mtp hems wo ha mua o wo ha ehs g ha-wehm kihkam o hab wo juh g s-tohntom ha'ichu o wo ha'ichu ha ehs o wo ha'ichu ha iattogi ab hema i ep amjed o wo pi ap neo. <sup>20</sup>Id o d hegai mat im hu hab wo i em-juh ab amjed g Jiosh. Pi at heg im hu hab wo i em-juh mamt pi am hu ha-chehanig oidk wo wapko g e-nohnhoi k haha wo e gegos."

**Mash g gawul mahs o'odham uwi ab si hiwig g Jesus**

*An g neid g Mark 7:24-30*

<sup>21</sup>Kuchd gam hu hahawa hihi Syria jewed wui k am miabi g Tyre ch Sidon kihhim. <sup>22</sup>D am hema d uwi ch pi d t-wehm o'odham ch am t-wui jiwia k hab kajj ab wui g Jesus, "S-ap'ekam ni-kownalig mapsh d Davidbad amjedkam, ab g si i s-ni-ho'ige'id. Ni-chehiaga o g jiwul an u'ukch ch si sho'igchud."

<sup>23</sup>D wabshaba g Jesus pi ab hu has sha'i kajj wui. Kuchd ab si ahgid mat hig wo cheha mat gam hu wo hih no pi an t-oidahim ch si s-nakosig.

<sup>24</sup>D hab kajj g Jesus ab wui ihda uwi, "Heg o d wa'i ni-chikpan idani mant wo i ha wehmt g Tutuligo hemajkam."

<sup>25</sup>D ab ha hekaj i gei wecho ihda uwi k hab kajj, "Am g hig i ni-wehmt."

<sup>26</sup>D hab kajj g Jesus, "Heg at wo wa wepok mamt ab wo ha mah g gogogs g ha-chechmait g a'al."

<sup>27</sup>D hab kajj hegai uwi, "Woho o wa. T wabshaba chum hems g

gogogs am wo huh g a'al ha-ha'ichu hugi hahainig. Kunt ahni hab wa masma wo si s-ap ni-taht mapt id am hab wo al i ni-juni."

<sup>28</sup>D hab hahawa kajj g Jesus ab wui, "Neh, m-ne'oki o am chehgid map ab si ni-hiwig. T heg hekaj am hab wo e juh ihda map ab ni-tahni." Kutsh am wa'i hekaj doa hegai chehiagaj.

**Matsh g Jesus mu'i hemajkam ha dodaj**

<sup>29</sup>Amjed achd gam hu hahawa ep hihi Galilee shuhdagi babsho. D g Jesus am i chesh kawulk dahm.

<sup>30</sup>Kud mu'ijj am dada g hemajkam k am ha u'apa g pi hihimidkam ch pi neneadam ch pi neneokdan ch mu'i nahnko mahs kok'odam. D g Jesus ha dodaj. <sup>31</sup>Kud si has i elid g hemajkam neidok mo neneok g mumio ch g pi hihimidkam oiopo ch g momjo hahawa ab wehsig ch g pi neneadam s-ap ha'ichu neid. D wehsijj ab si has elid g Jiosh.

**Matsh g Jesus ha gegos g gi'ik mihl chechoj ch mu'i ehp**

*An g neid g Mark 8:1-10*

<sup>32</sup>D g Jesus ab hahawa i t-waid k hab kajj, "Neh, waik tashkaj in o wa'i t-wehmaj idam hemajkam ch heki hu wa'i pi ha'ichu huh. Ni s-ha ho'ige'id. Tp hems ha'i wo s-e chuhugi matp gam hu wo sha hihi pi ha'ichu hugok."

<sup>33</sup>Kuchd hab kajj ab wui, "Kuchs hebai hig wo ui g ha'ichu hugi id eda tohono jewed matt hekaj wo ha gegos g ha'akia hemajkam?"

<sup>34</sup>D hab kajj g Jesus, "He'ekia at am i wih g sismito?"

Chd hab kajj, “Al wewa'ak sismo to ch al he'ekia chu'uchum waptopi.”

<sup>35</sup>D g Jesus am hahawa ha chehani g hemajkam mat wo dadhawiua. Kud am dadhawiua.

<sup>36</sup>D am ha ui hegam wewa'ak sismo to ch waptopi k ab ho'ige'el g Jiosh k am i hahain k ab t-mah. Kuchd an i ha mahkhi g hemajkam.

<sup>37-38</sup>D wehsijj hug k oi wa hi si s-kokwod chum as am hu hebai d gi'ik mihl chechoj ch mu'i ehp mo d u'uwi ch a'al ch pi kuintas. Kuchd an hahawa i u'ihi g wihipi'idaj mat am hu'i wewa'ak hoha wo ha shuhshud.

<sup>39</sup>D g Jesus am hahawa ha ahgi g hemajkam mat gam hu wo hihi. Kuchd gan hu dadhawiua wahlko ch ed k gam hu aigo i chehchsh Magadan chekshani am.

### Mamsh ab chum chehani g Jesus mat am wo ha chehgi g s-hasig ha'ichu

*An g neid g Mark 8:11-13; Luke 12:54-56*

**16** D am ha'i dada g Palasi ch Sajusi k ab ne'owin g Jesus ch ab chum si chehani mat am wo ha chehgi g si s-hasig ha'ichu matp wo ho d Jiosh si Kehsha.

<sup>2-3</sup>D hab kajj g Jesus ab ha wui, “Neh, s-mahch am mat has mahs tash ab wo himad ab wabsh neidch mas hebaijed hewed ch has mahs chewagi i wushke. Pegih, mt hab wa'ap wo chum s-mahchk mo haschu has e junihog ia'i idani am neidch mo haschu hab e junihim.”

<sup>4</sup>D hab ep kajj, “Si o hig wo ho pi ap'e ch meh k ab amjed g Jiosh hegam mat pi ab hu wo ni-hiwgam k ho'ip nei g s-hasig ha'ichu. Heg ant ab wo wa'i ha chehgi mant am

oidk hab wo ni-juh hegai kelibad Jiosh ha'ichu i tashogiddam mash d Jonah.” Bad che'io k am ha dagito k gam hu hih.

### Mattsh pi ha oidk wo ha'ichu chegito g pi wohochuddam

*An g neid g Mark 8:14-21:*

<sup>5</sup>Kuchd am gahi ep i shul wahlko ch ed k ga hu aigo dada k s-mai machdki pi ha'i u'uk g sismo to.

<sup>6</sup>D am wa'i hekaj mad hab kajj g Jesus ab t-wui, “Si g wo s-e nen'oidk mat pi wo em-cheawogi g ha-jewajidakud hegam Palasi ch Sajusi.”

<sup>7</sup>Kuchd am si a'aga ihda k hab kajj, “Heg oki hekaj hab kajj mattki pi ha'i u'uk g sismo to.”

<sup>8</sup>Kudki s-t-amichud g Jesus ch hab kajj, “Pi amki koi amichud mani he'es edgid g gewkdag ch hekaj am a'aga mach pi ha sismitoga. <sup>9</sup>Am am wa chum neid mant al hetasp sismitokaj ha gegos g hetasp mihl chechoj ch mu'i ehp. Ms hu'i pi chegito mamt he'ekia i hoha an i ui g wihipi'idaj. <sup>10</sup>Kum am wa chum neid mant al wewa'ak sismitokaj ha gegos g gi'ik mihl chechoj ch mu'i ehp. Ms hu'i pi chegito mamt he'ekia i hoha an i ui g wihipi'idaj. <sup>11</sup>Pegih, mt wo chum s-mahchk mani pi wabsh g ha'ichu hugi hab ahg ch hab kajj mamt wo s-e nen'oidad ab amjed g Palasi ch Sajusi ha-jewajidakud.”

<sup>12</sup>Kuchd am hahawa i s-amich moki pi heg hab ahg jewajidakud mo hekaj e pahnt ch oki heg hab ahg Palasi ch Sajusi ha-mashchamadag.

**Matsh g Peter am ah mo hedai wud  
g Jesus**

*An g neid g Mark 8:27-30; Luke 9:18-21*

<sup>13</sup>Kuchd gam hu hahawa hihim k am i miabi g Cesaria Philippi kihhim. D g Jesus ab t-kakke ch hab kajj, “Am g wo ni-ahgid Doh'o ni-elid g hemajkam?”

<sup>14</sup>Kuchd hab kajj, “Ha'ijj o hab m-elid map d hegai Johnbad mo wa chum t-pahl wapkonahim ch ha'ijj hab kajj map d Elijabad o Jeremiabad o hema i ep kekelibad Jiosh ha'ichu i tashogiddam.”

<sup>15</sup>D ab hahawa ep t-kakke, “M ahpim hig hedai ni-elid?”

<sup>16</sup>D ihda Simon mamt hab hahawa chehch Peter hab kajj, “Dap Jiosh alidag ch d si Kehshaj g Jiosh,”

<sup>17</sup>D hab kajj g Jesus, “Simon, Jiosh at si s-m-ho'ige'id k am m-chehgi mani d si Kehshaj. Pi at wabsh g hemajkam am m-chehgi.

<sup>18</sup>Kupt ab i s-wohoch g Jiosh k ab si ni-hiwig. Nt heg hekaj hab wo m-chehch Peter (Hodai). Neh, id ab waw ant am wo i kei g ni-cheopiga. Bani ahgch hab kajj mat wehsijj hegam mat hab wa'ap ab wo si ni-hiwigad at d wo ni-hemajkamgak. Kut pi hedai wo sha'i e nako mas wo ha keshwua, chum hems g jiwawul. <sup>19</sup>Kunt ab wo m-mah g gewkdag mapt wo s-mahch k ah g Jiosh ha'ichu ahga k hab wo yahwitpi'o g ap'edag am ha wehhejed hegam mat ab wo s-wohoch. Ab ant wo m-mah g gewkdag mapt hab wo ah mo haschu shohbidas ch haschu hiwigidas am ha wehhejed hegam

mat ab wo ni-hiwigad.” <sup>20</sup>Neh, bad kajj g Jesus ch ab hahawa si t-chehani matt pi hedai wo ahgi mo heg d Jiosh si Kehsha.

**Mash g Jesus am ha ahgid matsh wo  
e sho'igchud k wo e muhkid.**

*An g neid g Mark 8:31-9:1; Luke 9:22-27:*

<sup>21</sup>D am i amjed am hahawa si tasho t-ahgi g Jesus k hab kajj, “Hemho wa ant am wo hih Jerusalem wui. Kut mu'i wo ni-sho'igch g ge'eged ch u'ugchu papal ch chehanig ha mashchamdak k am wo i ni-dagito mant wo ni-muhkid. T wabshaba am wo him k d wo i waik tashk amjed. Nt ab wo uhpam i wuhsh muhkig amjed.” Neh, bo kajj g Jesus.

<sup>22</sup>D g Peter im hu go'olko i be k ab si s-gewkam neok wui hab kajjch, “Pi at woho wo sha'i hiwigi g Jiosh mamt hab wo m-juh.”

<sup>23</sup>D hab kajj g Jesus ab wui, “Pi g sha'i ni-shohbid. Do wabsh hejel hab m-elida ihda. Kup ab wui kehk g Jiosh hab elida hab masma mo g ge Jiawul.”

<sup>24</sup>D hab hahawa ep kajj ab wehsijj t-wui, “Mamtp am wo s-oidam g ni'himdag k hemho wa gam hu wo dagito g hejel e-tatchui k ahni ni-tatchui hab wo junihid ni-wehhejed e sho'igchudch. Heg at wo wa wepok mam ab mohto g kots ch ab ab wo e muhkid. <sup>25</sup>Pi amt wo heki wua g e-doakag mamtp wo hekaj am ni-wehhejed am ahgachugch g Jiosh ha'ichu ahga. Heg at wo heki wua g e-doakag mapt hedai wo chum s-da'ad. <sup>26</sup>Pi at ha'ichu wehhejed wo s-kehgajk

matp g o'odham wehs wo bei mo haschu i tatchua id dahm jewed k wabshaba pi wo e do'ibia. Pi o an hu ha'ichug id dahm jewed mas heg hekaj wo e do'ibia g o'odham.  
<sup>27</sup> Jiosh at ab uhpam wo ni-mah g si ge'e gewkdag an e-kihdag ed. Kunt heg hekaj si s-tondam wo tondad ch ia ep wo jiwia jewed dahm. T mu'i anghil wo i ni-wehmajk. Kunt wehs wo ha namkid g hemajkam heg hekaj mo haschu hab i junihim.  
<sup>28</sup> Nt wo si shel em-ahgi mamt ha'ijj an d wabsh wo kia dodakamk ch wo nei mant s-gewkam am wo chehgi g ni-kownaltalig em-shahgid."

**Matsh am gawul i e chehgi g Jesus ha wui.**

*An g neid g Mark 9:2-13; Luke 9:28-36:*

**17** D am d i chuhdp tash amjed. D g Jesus ab i ha wai g Peter ch James ch John. D am wehmaj ab i chehchsh hema uhgk do'ag t ab k atsh gan hu dada do'ag dahm. <sup>2</sup> Kutsh g Jesus am hahawa gawul e juh. Sh g wuhioshaj hab wa'i masma tonod mo g tash ch g wehschugaj hab masma s-tohta mo g tonlig. <sup>3</sup> Kutsh ab haha wabsh i e chehgi g Mosesbad ch Elijabad k am wehmaj neneok g Jesus.

<sup>4</sup> Sh g Peter hab kajj ab wui g Jesus, "T-kownalig, s-ap'e oki mach ia ha'ichug. Kutt ia waik wo ha chuhcha g al chechopi matt hekaj ab wo si has em-el aphi ch Mosesbad ch Elijabad maptp wo tatchuad."

<sup>5</sup> Neh, sh am wabsh kia neok g Peter. Kutsh g si s-mahs chewagi ab i wuhshani k ab ehka ha dahm.

Tsh g Jiosh ne'oki ab kaida chewagi t amjed k hab kajj, "Jesus o d si ni-tatchuidch ni-alidag. Heg amt ab wo si kaihamad."

<sup>6</sup> Kutsh si s-ehbeni hegam Peter am i kahk g ne'oki k am wabsh si kupal shul jewedo.

<sup>7</sup> Tsh am hahawa jiwia g Jesus k an ha tahtam k hab kajj, "Gegokiwuio. Pi g wo sha'i e todsid."

<sup>8</sup> Tsh am hahawa i chum nenhog. Kush heg wa'i Jesus hejel am kehk. Sh pi am hu ha'ichug hegam gohk.

<sup>9</sup> Sh ab hahawa i huhudkchim do'ag t amjed. Sh ab si ha chehani g Jesus ch hab kajj, "Pi g am hedai wo sha'i ahgid mamt haschu nei, nt ho'ip kia uhpam i wuhsh ab muhkig amjed ahni Jiosh si Kehsha."

<sup>10</sup> Kush hab kajj idam ab wui g Jesus, "Neh, bo chech'e hegam chehanig t-mashchamdahm matsh ia wehpeg wo e maskogi g Elijabad. Tsh g Jiosh si Kehsha ia haha wo e maskogi. Pegih, t haschu ahgk pi ia wehpeg m-ba'ich e maskogi hegai Elijabad?"

<sup>11</sup> Sh hab kajj g Jesus, "Hema at woho wehpeg wo e maskogid k hab wo masmak mash wa g Elijabad ch wehs ha'ichu wo i ap'ech. <sup>12</sup> Kunt wo em-ahgi mat wa woho heki hu jiwia. K Wabshaba mu'ijj pi mahch mo hedai wud ch ab wui hab wabsh juh g pi ap e-tatchui. Pegih, k e aihim mat hab wa'ap wo ni-juh k wo ni-sho'igch ahni Jiosh si Kehsha."

<sup>13</sup> Kutsh am hahawa i amich idam moki heg hab ahg John mat wa am i shonwuich g pahl wakona.

**Matsh g Jesus gam hu hab i juh g  
jiawul ab amjed g ali**

*An g neid g Mark 9:14-29; Luke 9:37-43a.*

<sup>14</sup>D eda mu'i hemajkam am ha'ichug amai machd am wih. Kud am uhpam dada hegam Jesus. D ab hema i tonwua Jesus wui <sup>15</sup>k hab kajj, "Ab g si i s-ho'ige'id g ni-sulijga. Si o pi ap mumku ch hebai am wabsh s-e chuchkagid ch mu'ikko am gegshe nahda ch ed o am shuhdagi ch ed. <sup>16</sup>Kunt ia chum u'apa ha wui idam m-chuhchai. T pi e nako mas wo doaj."

<sup>17</sup>D hab kajj g Jesus ab t-wui, "Sho'o wa'i pi ge'ej g em-wohochudadag. M im hu hab wabsh i si e Juhkch ab ni-amjed. Shahag wepo mant tash ia wo em-wehmajkad ch wo em-nakogad mat haha wo i ge'eda." Bad kajj g Jesus ch hab hahawa ahg hegai o'odham, "Ab g i beka'i g e-alidag."  
<sup>18</sup>D ab hahawa i bei wui. D g Jesus am si s-gewkam chehani g jiawul mat gam hu hab wo i e juh. Kud wa woho hab e juh. D am ha hekaj wabsh i doa g ali.

<sup>19</sup>Kuchd ab hahawa hejelko kakke g Jesus machs haschu ahgk ahchim pi t-nako matt gam hu hab wo i juh g jiawul.

<sup>20</sup>D hab kajj g Jesus, "Heg amt hekaj pi e nako mam pi ab hu wohochud mat hab wo e juh. Nt wo si shel em-ahgi mamt wo e nakog k wabsh chum haschu hab wo juh mamt hab wo chei s-wohochudch mat hab wo e juh. Chum at hems g ge'e do'ag gan hu hab wo i kekiwua mamt wabsh wo ahgi s-wohochudch mat hab wo e juh. [<sup>21</sup>T wabshaba

ihda hab mahs ha'ichu hab wa'i masma gm hu hab wo i juh mamt wo si e ho'ige'idahunad Jiosh wui pi ha'ichu ko'adch.]"

**Mash g Jesus am ep ha ahgid ab  
amjed g e-muhkig**

*An g neid g Mark 9:30-32; Luke 9:43b-45:*

<sup>22</sup>Am achd wabsh kia oiopo Galilee chekshani ch ed. D hab kajj g Jesus ab t-wui, "E o aihim mat wo ni-bei hegam mo s-ni-keh'id k ab wo ni-dagito <sup>23</sup>mant wo ni-muhkid. T wabshaba am wo him k d wo i waik tashk amjed. Nt ab wo uhpam i wuhsh muhkig amjed."

Neh, kuchd wehsijj si pi ap t-taht am i kaiok ihda.

**Matsh has masma ha namkid g  
Jesus g ge'e cheopi kowlanta**

<sup>24</sup>Kuchd ged hu dada Capernaum t am. D am hema jiwia Peter wui hegam mo an hemapad g cheopi kowlanta k ab kakke ch hab kajj, "No ha namkid g cheopi kowlanta g em-mashchamdag?"

<sup>25</sup>D hab kajj g Peter, "Hemho wa," K amjed ged hu i wah kih ch ed.

D g Jesus ab ha hekaj kakke ch hab kajj, "Simon Peter, nap hab elid mat g kokownal ab wo ha'ichu ha kowlant hegam mo d ha wehm kihkam?"

<sup>26</sup>D hab kajj g Peter, "Pia'a."

D hab ep kajj g Jesus, "Pegih, t heg hekaj pi ha'ichu wo ni-kowlant g Jiosh. <sup>27</sup>Ch wabshaba pi tatchua machs wo ha kudu idam hemajkam. Kupt heg hekaj am wo hih shuhdagi wui k am wo wua g waptopi hukshpakud. Kut g si wehpeg watopi mapt wo huksh g lial ab wo

kamshchid mat wo ai hegai cheopi kowlanta an ni-wehhejed ch ep m-wehhejed. Pt am wo be k hekaj wo ha namkid.”

**Matsh hedai d wo si ha'ichuk am  
Jiosh nena ed**

*An g neid g Mark 9:33-37; Luke 9:46-48:*

**18** Kuchd ab kakke g Jesus ch hab kajj, “Doht d wo si s-has ha'ichuk am Jiosh kownaltalig ed?” <sup>2</sup>D eda an hema kehk g al chum ali. D g Jesus am i waid k ab t-ba'ich i kehsh <sup>3</sup>k hab kajj, “Nt wo shel em-ahgi mamt hab wa'i masma am wo i wahp Jiosh kownaltalig ed mamt am gawul wo juh g e-chegitoidag k ab wabsh wo i pi e ha'ichuchud k hab wo masmak mo ihda al chum ali. <sup>4</sup>Hegai mat hab wo juh ihda at d wo s-has ha'ichuk am Jiosh kownaltalig ed. <sup>5</sup>T hedai i s-ap ab wo i ha nei g a'al am ni-wehhejed o heg wa wepo mat ahni s-ap ab ni-nei.

**Mash si s-ta ehbidam hab mahs g pi  
ap'ekam**

*An g neid g Mark 9:42-48; Luke 17:1-2:*

<sup>6</sup>“S-to'o ehbidam hab mahs am wehhejed hegai mat hema am wo i ha wanchkwua pi ap'ekam wui idam al a'al mo ab al ni-hiwig. Ba'ich at wo i s-ap'ek wehhejed matp hems wo e wachumchud k wo e muhkid mat koi hab wo juh ihda chu'ijig. <sup>7</sup>Chum o hekid an hab e wua g pi ap'ekam jewed dahm. K hegam mo hab wua am ha'i ep ha wanchshulig pi ap'ekam wui. T g Jiosh hemho wo wa ha namkid.

<sup>8-9</sup>“Pi at hedai wo e nako mas ab uhpam wo i wuhsh Jiawul kih

amjed. Kut pi hekid wo huhug g ha-sho'igchuda amai. Heg at wo wa wepok mat am mei ch ed wo e sho'igchudad. Mt heg hekaj am wo i e nako mamt pi am hu wo gei heg eda. Ba'ich at wo i s-ap'ek mamt chum hems wo heb hu wua g e-nowi o g e-tad o g e-wuhi matp hema idam hab wo em-juh mamt am wo gei Jiawul kih ed k pi wo bei hegai pi ha huhugedam doakag mo g Jiosh ab em-makiog.

**Ha'ichu wepogida ahga ab amjed g  
heb hu himkam kahwal**

*An g neid g Luke 15:3-7*

<sup>10</sup>“Am g wo s-nen'oidk mamt pi wo s-ha keh'idad idam al chu'uchumchu. Jiosh o ab si has ha elid ch am ha nuhkudachud g anghil. [<sup>11</sup>Ia ant jiwia jewed dahm mant wo ha do'ibia g heb hu hihimkam. ]

<sup>12</sup>“Neh, am g wo i oidahim ihda. Mamtp hems hema ahpim siant wo kahwaligak. Kut hema wo heb hu hih. Namt hig pi woho am wo s-apko ha dagito hegam humukto gamai humukt k am wo hih do'ag oidk k am wo i gahghi g heb hu himkam e-shoiga. <sup>13</sup>Kut woho d wo s-hehgigk mamtp wo cheh. <sup>14</sup>Bo wa masma pi sha'i tatchua g em-ohg Jiosh mat hema wo heb hu hih idam al chu'uchum a'al.

**Hegai em-wehm wohochuddam  
mat hab wo juh g pi ap'ekam**

<sup>15</sup>“Mt heg wa'i hejel wo ahgi e-wehm wohochuddam matp pi ap wo chu'i ab em-wui. Kutp hems ab s-ap wo em-kaiha. Kut ab hahawa ep wo i e hemakoch g



em-chegitoidag, <sup>16</sup>Tp wabshaba pi ab hu wo em-kaiha, kumt hemako o gohk am ha wehm wo him k am wo ah g chu'ijigaj. Kut hab masma gohk o waik wo s-mahchk g chu'ijigaj mo id hab masma an o'ohanas Jiosh o'ohana ed. <sup>17</sup>Kutp eda wa sha pi ab hu wo em-kaiha, kumt am wo ha ahgi wehsijj hegam mam am ha wehm e mihshmad. Kutp pi ab hu wo ha kaiha idam, kumt haha wo dagito hab masma mo pi d em-wehm wohochuddam.

### Shohbida k ch hiwgida

<sup>18</sup>“Nt wo si shel em-ahgi mant ab wo em-mah g gewkdag mamt hab wo ah mo haschu shohbidas ch haschu hiwgidas am ha wehhejed g ni-hemajkamga.

<sup>19</sup>Jiosh at am hab wo em-juni mamt haschu ab wo tahnid e wepo hab elidch. <sup>20</sup>Kunt am wo ha'ichugk em-shahgid mamt hebai am wo i e hemapai, chum ams d wo wa'i gohkk o waikk.”

### Ha'ichu wepogida ahga ab amjed g pi amkam ha-pionag.

<sup>21</sup>D g Peter ab kakke g Jesus ch hab kajj, “Ni-kownalig, nant wewa'akko ab wabsh wo i s-ho'ige'el g ni-wehm wohochuddam matp ha'akkio hab wo juh g pi ap'ekam ab ni-wui?”

<sup>22</sup>D hab kajj g Jesus, “Pi amt wabsh wewa'akko ab wo i s-ho'ige'el. Matp he'ekio hab wo i juh g pi ap'ekam, mt ha'akkio wo s-ho'ige'el. <sup>23</sup>Bo wa e wua g em-kownalig Jiosh ch em-tatchuid mamt am hab wa'ap wo e junihid.

“Id ant am wo em-tashogi em-ahgidch matp hems hema d

wo kownalk ch am wo i ha hoa g e-pionag ha-wulshpadag, <sup>24</sup>Kumt am hema u'apa g piongaj, K id ab ab e wulshch g mu'i mi-yohn pihsh. <sup>25</sup>Kuki ihda pi am hu hugkam edgid g lial mat wo namkid g e-wulshpadag. T hekaj g ahmoj am ha cheha mamt wo gagda k g wehmaj kihkam ch a'aligaj ch ha'ichu enigaj ep wo ha gagda. T d wabsh wo neneholk.

<sup>26</sup>“Kut ihda ha-pionag ab i gei e-ahmo wui k ab i tahni mat ab wabsh wo i s-ho'ige'el. Kut wo wa wehs ha namkid. <sup>27</sup>T am i s-ho'ige'el g ahmoj k im hu hab i juh g wulshpadaj k dagito. <sup>28</sup>Kut am hih ihda o'odham.

“K eda hema g wehmaj pion al he'ekia pihsh ab ab e wulshch hegai mamt ab i s-ho'ige'el. Kut heg nam k g ba'ichuj be k hab si ah mat wo namkid.

<sup>29</sup>“Kut ihda wehmaj pion ab i gei wecho k ab i e sho'igchud wui mat ab wabsh wo i nenida. Kut wo wa uhpam namkid.

<sup>30</sup>“Kut wabshaba pi ab hu kaiham k wabsh ha chehani mamt ged hu wo si kuh am hugkam mat hekid wo i namkid.

<sup>31</sup>“Neh, t ha'i ehp g pion si pi ap e taht neidok mat has e juh k am hihim k am ahgid g e-ahmo wehs ha'ichu.

<sup>32</sup>“T g ha-ahmo ab i wai ihda e-pionag k hab kajj ab wui, ‘Ahipi si pi amkam ni-pionag, ab ant i si s-m-ho'ige'id k im hu hab i juh wehs hegai m-wulshpadag heg wa'i hekaj map ab si ni-tahni. <sup>33</sup>Kupt hab wa masma wo chum s-ho'ige'el g e-wehm pion mant has i masma

s-m-ho'ige'el.' <sup>34</sup>Neh, bo kajj ch si bagat k ged hu si kuh am hugkam mat hekid wehs wo i namkid.

<sup>35</sup>“Pegih, t hab wa masma am hab wo em-juh g ni-ohg Jiosh mamtp pi hab hu e-ihbdag amjed wo i s-ha ho'ige'el hegam mat ab em-wui pi ap wo chu'i.”

**Mash g Jesus pi hiwigid g wehm kihkam ohhoda**

*An g neid g Mark 10:1-12*

**19** Am ad i ha'asa ha mashcha g Jesus k am i dagito g Galilee chekshani. Kuchd gam hu aigo hihi Jordan akimel ha'abjed k am hihim k am dada Judea chekshani ch ed. <sup>2</sup>D mu'i hemajkam an oidahim g Jesus. Kud ha doajid.

<sup>3</sup>D am ha'i dada g Palasi hab chum ahgk mat ab wo ha'ichu kakke k hekaj wo heki himch. K g ha-kakkei hab chu'ig, “No hiwigidas an t-chehanig ed mat g o'odham wo s-ohhod g e-hohnig?”

<sup>4</sup>D hab kajj g Jesus, “An o hab chu'ig Jiosh o'ohana ed:

Ga hu i wehpeg at am ha nahto g Jiosh g cheoj ch uwi mat d wo e wehhejedkamk

<sup>5</sup>k hab kajj:

I'ajed at g o'odham wo ha dagito g e-ohg ch e-je'e k ab wo i wehmt g e-wehm kihkam.

T idam d haha wo hemakok.

*Genesis 1:27; 2:24*

<sup>6</sup>Neh, bo kajj g Jiosh. K pi hab chum mahs mas g o'odham ab a'ai wo i ha gawulkai hegam mat g Jiosh ab i ha hemakoch.”

<sup>7</sup>D hab kajj g Palasi ab wui, “K wabshaba an o'ohanas t-chehanig

ed matsh g o'odham wo mah g e-hohnig g ohhoda tapial k wo s-ohhod.”

<sup>8</sup>D hab kajj g Jesus, “Heu'u, bo chu'ig mamt wo ha mah g ohhoda tapial mamtp pi ab hu wo kaihamad g Jiosh ch pi wo pihk e elidad ha hekaj. K wa eda chum pi hab masma ga hu i wehpeg mat in ha nahto g Jiosh g hemajkam. <sup>9</sup>Kunt id hab wo em-ahgi mat d wo pi ap'ekamk mamt wo s-ohhod g e-wehm kihkam k hema ep wo hohnt, heg hi wa mamt wo s-mai am i chum hohnt matki heki hu ha wehm wo'iwua.”

<sup>10</sup>Kuchd hab kajj ab wui, “Kuki heg hekaj ba'ich i chum s-ap'e mat g o'odham pi wo ha hohnt.”

<sup>11</sup>D hab kajj g Jesus, “Pi at wehsijj wo e nako hab masma, heg hi wa mat g Jiosh am wo i ha wehmt.

<sup>12</sup>Ha'ijj at pi wo hohont no pi hab masma d mahsikam mo pi tatchua g hohnig ch ha'ijj d hegam mamt hab wabsh ha juh mat pi ap wo hohont. Ha'ijj o ep pi hohont heg hekaj mo g Jiosh kownaltalig ba'ich hab i elid. Kumt id am hab wo juh mamtp wo e nako.”

**Mash g Jesus ab s-ha ho'ige'id g al chu'uchum a'al**

*An g neid g Mark 10:13-16; Luke 18:15-17:*

<sup>13</sup>Kud ha'i am ha u'apa g e-a'aliga mat ab wo ha taht g Jesus k wo e ho'ige'idahu ha wehhejed. Kuchd chum s-ha keh'id mo hab e wua.

<sup>14</sup>D hab kajj g Jesus, “Ab g wabsh wo i ha hiwigid g a'al mat ab wo i hihi ni-wui k pi an hu wo sha'i ha shohbi. Am at wabsh s-moimam wo i wahp Jiosh kownaltalig ed ab

ni-hiwigch. Kumt hab wa'i masma am wo i wahp." <sup>15</sup>Neh, bad kaij ch ab hahawa ha tahtam k amjed gam hu hih.

**Mash am hema chum s-e do'ibiamk g s-kais o'odham**

*An g neid g Mark 10:17-31; Luke 18:18-30*

<sup>16</sup>D am hu hebai am hema jiwia g wechij o'odham Jesus wui k hab kaij, "Ha mashchamdham, shahchu ant am hab wo juh g s-ap'ekam mant ab wo bei g pi ha huhugedam doagak?"

<sup>17</sup>K hab kaij g Jesus, "Ab ap ni-kakke ab amjed g s-ap'ekam. K eda heg wa'i Jiosh d s-ap'ekam. Am g hab junihid g Jiosh chehanig maptp wo tatchuad mapt wo bei g pi ha huhugedam doagak."

<sup>18</sup>D hab kaij g o'odham, "Hedai hegam chehanig?"

D hab ep kaij g Jesus, "Idam mo hab chu'ig:

Pi g am hu ha mua'i g o'odham.

Pi g am hu ha ehsidad g ha-wehm kihkam.

Pi g am hu ha'ichu ha ehsidad.

Pi g am hu ha'ichu ha iattogidad.

<sup>19</sup>Ab g si has ha elidad g e-ohg ch e-je'e. *Exodus 20:13-16:12*

Ab g i pihk e elidad ha wui g hemajkam hab masma map hab masma hejel pihk e elid."

*Leviticus 19:18*

<sup>20</sup>D hab kaij g o'odham, "Wehs ani am hab wa chum ha junihim idam chehanig. Shahchu ant hab ep wo juh?"

<sup>21</sup>D hab kaij g Jesus ab wui, "Pegih, pt am wo him k wo gagda wehs ha'ichu map haschu i eniga k wo ha mah g namkigaj g sho'igkam

k ab wo i him k wo ni-oidad maptp woho s-behimk hegai map chum e gahgid."

<sup>22</sup>Kud si pi ap e taht am i kaiok k gam hu hih no pi d sha'i si s-kais ch si s-huwid g e-kaisdag.

<sup>23</sup>D hab hahawa ep kaij g Jesus ab t-wui, "Neh, nt wo si shel em-ahgi mat wo sha'i si s-hasigk mas g s-kakais am wo i wahp Jiosh kownaltalig ed. <sup>24</sup>Mam hig hab elid mat wo e nako g ka-mihyo mas am wo gahi wuhsh ho'ipad jeg ed? Pegih, t hab wa masma pi wo e nako hegam mo hiwig g ha'ichu e-eniga mas am wo i wahp Jiosh kownaltalig ed."

<sup>25</sup>Kuchd am wabsh i pi amichud k hab kaij ab wui, "A t hedai hig wo e do'ibia."

<sup>26</sup>D g Jesus ab si shel i t-neid k hab kaij, "Pi at wo e nako wabsh g o'odham. T wabshaba g Jiosh wo e nako mat wabsh chum haschu am hab wo juh."

<sup>27</sup>D g Peter hab kaij, "Neh'e, ahchim att wehs ha'ichu dagito k am i m-oi. Tt haschu ab wo bei heg hekaj?"

<sup>28</sup>D g Jesus hab kaij ab t-wui, "Woho o wa mamt ab si i ni-oi. Kunt am wo si shel em-ahgi mant an wo dahiwua s-kehg ni-kownal daikud ed ahni Jiosh si Kehsha. Kumt ahpim an hab wa'ap wo dadhaiwua gamai gohk kownal dadaikud an k d wo u'usagakamk am ha dahm hegam gamai gohk dakam e-wehm Tutuligo. <sup>29</sup>Matp hedai am wo i dagito g e-kih o g e-wepnag o g e-jehj o g e-a'aliga o g e-oidag at ab wo ui siant e dahm ba'ich i mu'i k ab wo bei g pi ha

huhugedam doakag. <sup>30</sup>Mu'ijj hegam mo d wehpegkam hemu at d wo si ha oidchkamk ch mu'ijj hegam mo ga hu si ha oidch hemu d wo wehpegkamk.

**Ha'ichu wepogida ab ha amjed g uhdwis oidag chikpandam**

**20** “Id ant am wo em-tashogi id hekaj mant wo ha'ichu wepogi g Jiosh kownaltalig. Heg o wepogidas mat g uhdwis oidag enigakam wabsh i si'alim am him k ha'i ha ui g o'odham mat am wo chikp oidaj ed. <sup>2</sup>T g ha-namkidadag d wo hegaik mo haschu i u'u g pion tash ab. T am ha hekaj hihim k chikp.

<sup>3</sup>“T am hahawa ep hih humukt ohla ch ed. K am ha'i gegok g o'odham ch pi ha'ichu has wua. <sup>4</sup>K hab ha ahg, ‘Nt wo s-ap em-namkid mamt wo chikp am ni-oidag ed.’ <sup>5</sup>Kut wa woho am chikpano idam. T hab wa masma hab ep e juh am i gamai gohk ohla ch ed ch waik ohla ch ed.

<sup>6</sup>“K am hu d i hetasp ohla. T am hih kahya wui. K am wabsh ha'i gegok. K hab kajj ab ha wui, ‘Shahchu am ahgch wabsh heki wua g tash pi ha'ichu has wuadch?’

<sup>7</sup>“K hab kajj idam, ‘Pi at hedai t-chikpanach.’

“K hab hahawa ep kajj ab ha wui, ‘Pegih, k am wo hihim k wo chikp am ni-oidag ed.’

<sup>8</sup>“Neh, t gam hu si i juh. Kut ihda oidag enigakam hab ah g e-pionag ha-ge'ejig, ‘Ab g i ha waid g pion k ab wo i ha namkidahi. T hegam wehpeg wo e namkid mant si ha oidch an ha ui k amjed hegam ehp

mant ep ha ui k hegam ga hu si ha oidk wo e namkid mant si wehpeg an ha ui.’

<sup>9</sup>“Kut hegam mat gam hu si i juhk chikp mo d i hetasp ohla ab ui g e-namkidadag ha'akia mo he'ekia u'u g pion tash ab ch amjed wehs g ha'i.

<sup>10</sup>“Kut ab ha ai hegam mat wabsh i si'alim chikp. K hab e ahg mat ba'ich i mu'i wo ui g e-namkidadag. Mt wabshaba ha'akia wa ha namkid. <sup>11</sup>T ab ui g e-lialiga k babgat ab wui g e-ahmo k ab wui hab kajj, <sup>12</sup>‘Neh, hegam o'odham mapt si oidk an ha ui al hemako ohla ab chikp. Kutt ahchim ge tash oidk chikp am s-toni k ed. Kupt eda am wo ha'akia t-namkid mapt hegam.’

<sup>13</sup>“K hab kajj g oidag enigakam ab wui hegai mo ha wehhejed neok, ‘Neh, ni-nawoj, pi ant sha'i em-iattogi namt pi am wa ap'ech mamt ha'akia k ab wo chikp ni-wehhejed. <sup>14</sup>Pegih, ab g wabsh wo uh'i g e-namkidadag k gam hu hihim uhpam no hig pi ab ni-ab ahni hejel mant ha'akia wo wa ha namkid hegam mant gam hu si i juhk ha ui mant ahpim he'ekia em-namkid. <sup>15</sup>Ab o ni-ab mant has masma wo hekaj g ni-lialiga. Aha nam wabsh s-ni-hehgamk mani s-hemajima?’”

<sup>16</sup>D hab hahawa ep kajj g Jesus, ‘Neh'e, t hekaj hab hegam mo gam hu si i ha oidch d wo wehpegkamk ch hegam mo d wehpegkam ga hu wo si ha oidchk.’”

**Mash g Jesus idani waikko am ahg g e-muhkig**

*An g neid g Mark 10:32-34; Luke 18:31-34*

<sup>17</sup>Am achd i t-nakog k gam hu hihi. Kud g Jesus am hejelko t-wai

ahchim gamai gohk <sup>18</sup>k hab kajj, “Neh, am att wo hihi Jerusalem wui. T hegam mo s-ni-keh'id am wo ni-dagito ha wui g u'ugchu papal ch chehanig em-mashchamdam. Kut idam ab wo ha'ichu ni-abch s-ni-mu'amk <sup>19</sup>k am wo ni-dagito ha wui g go'ol hemajkam. T idam wo nahnko ni-ahgad ch wo ni-gewittan k amjed ab wo ni-sisish kots t ab. Nt ab wo muh. T am wo him k d wo i waik tashk amjed. Nt ab wo uhpam i wuhsh muhkig amjed.”

**Mash g James ch John chum si e ha'ichuchud**

*An g neid g Mark 10:25-45*

<sup>20</sup>D eda am t-wehmaj g ha-je'e g James ch John. D idam am wehmaj hihi Jesus wui ab ha'ichu s-tahnimk. D g ha-je'e ab si has elid k ab wui hab kajj matsh ab wo ha'ichu tai.

<sup>21</sup>D hab kajj g Jesus, “Shahchu ap tatchua?”

D hab kajj ihda, “Pt hig wo i ha chuhcha idam gohk ni-mahmad mat am m-oidch d wo haha'ichuk mapt hekid am wo i himch g e-kownaltalig.”

<sup>22</sup>D hab kajj g Jesus ab ha wui, “Pi am sha'i ap mahch mam haschu ab ni-tahni. Wehpeg ant ab wo nako g ge'e sho'igdag. Kut hegam mat am ni-oidch d wo si haha'ichuk hab wa'ap wo e juh.”

D hab kajj idam, “Pegih, tt wo t-nako.”

<sup>23</sup>D hab hahawa ha ahg g Jesus, “Pegih, woho amt ab wo nako hegai hab mahs sho'igdag. K wabshaba pi ab hu ni-ab manis ahni am wo i ha

chuhcha mat hedai am ni-oidch d wo haha'ichuk. Hegam at am wo i e chuhcha mat hedai i ha wehhejed am ap'ech g Jiosh.”

<sup>24</sup>Kuchd ahchim ha'i babgat ab ha wui hegam gohk mad hab masma ab hejel chum e ha'ichuchud. <sup>25</sup>D g Jesus ab hahawa wehs i t-hemapad k hab kajj ab t-wui, “S-mahch am mo g ha-maliomig s-gewkam ha chehani g e-pionag ch g ha wanimeddam am ha himchudahim. <sup>26-27</sup>T wabshaba pi hab masma hab wo sha'i chum mahsk am em-shahgid. Mt wabsh si s-hemajim am wo i ha wehmtad g e-wehm wohochuddam hab sha masma mam d wabsh ha-pionag mamtp wo tatchuad mamt wo ha wanimedad. <sup>28</sup>Ahni ani hab wa masma si s-hemajim i em-wehmt ch pi ab hu ni-ha'ichuchud em-dahm, chum anis d Jiosh si Kehsha. Ab o em-wui him g s-ko'ok namkidadag heg hekaj pi ap em-chu'ijig. Nt wabshaba ahni em-wehhejed wo nako mamt wo e wupul'o.” Neh, bad kajj g Jesus.

**Matsh g Jesus ha doaj g gohk pi neneadam**

*An g neid g Mark 10:46-52; Luke 18:35-43*

<sup>29</sup>Kuchd gam hu i wuwaha ab Jerico t amjed. D mu'i hemajkam ab i t-oi.

<sup>30</sup>D am hu hebai wohg hugid an gohk am dadha g pi neneadam o'odham. Kuchd am hihim. D am i t-kah k s-mai mo an him g Jesus k si s-kaidam hab chech'e, “Ab g si i s-t-ho'ige'id, ahpi map d s-ap'ekam t-kownalig ch apsh d t-kownaligbad David amjedkam.”

<sup>31</sup>D hegam mo an ha wehgaj si s-ha keh'id ch hab ha ahg mat wo pi shahmunik.

D wabshaba ba'ich haha wabsh i s-kaidam hab kajj, “Ab g si i s-t-ho'ige'id, ahpi Davidbad amjedkam.”

<sup>32</sup>Kud am hahawa i kekiwua g Jesus k ab i ha waid k hab kajj, “Shahchu am tatchua mant hab wo em-juni?”

<sup>33</sup>D hab kajj idam, “Si g s-t-ho'ige'id k ab i t-nenchud.”

<sup>34</sup>Kud si s-ha ho'ige'el g Jesus k ab ha taht ha-wuhpui ab. D ha hekaj ha'ichu s-ap neid k ab i oi.

**Mash mu'ijj si s-hehgig ch ahg mo g  
Jesus d Jiosh si Kehsha**

*An g neid g Mark 11:1-11; Luke  
19:28-40; John 12:12-19*

**21** Kuchd amjed am hihim Jerusalem wui k am ai g Olive U'us Kawulk. D heg mia kihhimag ch hab chehgig Bethphage. <sup>2</sup>D g Jesus gohk hab ha ah g e-chuhchai, “Am g wo hihim k ga hu wo dada kihhim t am. Kut am hema wo wulshpik g wuhlu g e-mad wehm. Mt gam wo ha wul'o. <sup>3</sup>Kumt ab wo em-kakke mams has wo juh. Kumt hab wo ha ah mani ahni d em-mashchamdah ch tatchua. Kut ab wabsh wo i ha dagito mamt ab wo i ha wanim ni-wui.” Neh, bad kajj g Jesus.

<sup>4</sup>K eda heki hu wa'i o'ohanas matsh id am hab wo e juh. Hema atki wa an o'oha g kelibad Jiosh ha'ichu i tashogidam. K g o'ohanaj hab chu'ig:

<sup>5</sup>Am g wo ha ahgid g hemajkam am Jerusalem kihhim t am: Ab at wo hih g s-ap'ekam em-kownalig em-wui k ab wabsh wo si e sho'igchudch

ch hab g wechij wuhlu wo cheshajhid. *Zechariah 9:9*

<sup>6</sup>Kud am hihi idam gohk k am hab juh mo haschu hab ha ahg g Jesus <sup>7</sup>k am ha u'apa hegam wuplu. Kuchd an toa g t-liliwa ha ab. D an dahiwua heg an mo d wechij.

<sup>8</sup>Kud mu'i hemajkam an t-wehgaj ch am i tahtdahim g e-liliwa wohg ch ed. D ha'i g wechij u'us i'ibhonig an hikkumi'ak k am to'ahim wohg oidch.

<sup>9</sup>D hegam mu'i hemajkam mo an t-wehgaj hihim si s-kaidam hihnk ch hab kajj,

“T-do'ibiakam!

Dap amjedkamaj g t-kownaligbad David.

Jiosh atki ia i m-wuhshad k ab si s-m-ho'ige'id.

Kuch ab si has elid g Jiosh.”

*Psalms 118:25-26*

<sup>10</sup>Kuchd am i dada Jerusalem kihhim t am. D mu'ijj am wabsh i pi amich mo haschu has e wua k hab kajj, “Doh'o wud hegai?”

<sup>11</sup>D ha'ijj hab ep kajj, “Id oki d Jiosh ha'ichu i tashogiddam ch hab chehgig Jesus ch am d kihkam Nazareth t am am Galilee chekshani ch ed.”

**Matsh g Jesus gam hu si i ha  
wuwhas hegam mo am uamhun g  
ge'e cheopi**

*An g neid g Mark 11:15-19; Luke  
19:45-48; John 2:13-22*

<sup>12</sup>D am i wah g Jesus kolhai ch ed mo am kehk g ge'e cheopi. D eda am ha'i dadha mo am ha'ichu gagda ch ha'ichu ha nolawt cheopi miabidch. D g Jesus gam hu si ha shahmud k g ha-dadaikud kuhkpal ha shul. D

am ha'i ep dadha ch am kammialt g lial. Kud g ha-mimsa gam hu a'ai kuhkpal si ha shulig <sup>13</sup>k hab hahawa wehs ha ah, "Bo chu'ig an Jiosh o'ohana ed mo hab kajj g Jiosh:

Ahni o d ni-wehhejedkam ihda ge'e cheopi.

Kut id wui ab wo hihhimad g hemajkam mat ab wo ni-ihmad.

*Isaiah 56:7*

Neh, bo kajj g Jiosh. Kumt wabshaba ahpim an be k am eda hab wabsh wua g hejel e-tatchui ch chum hems ha'ichu s-a'agi ha ehsid ab ha wui ha'ichu gagdach."

<sup>14</sup>Kumd am wui ha u'apa am ge'e cheopi t am hegam mo d pi neneadam ch hegam mo pi a'apkodag. Kud ha dodaj. <sup>15</sup>D g a'al am si hihnk ge'e cheopi t am ch hab kajj, "Ab ach si has elid ihda mo d t-kownaligbad David amjedkam ch d Jiosh si Kehsha."

Kud g u'ugchu papal ch chehanig t-mashchamdand neid mo g s-hasig ha'ichu hab wua ch ha kah g a'al ch sha'i si babgat <sup>16</sup>k hab kajj ab Jesus wui, "Shahchu ap ahgch pi ha shohbid? Aha nap pi has sha'i elid mo has i kajj?"

D hab kajj g Jesus, "Am o wa s-ap'e. Jiosh at hab masma ha nahto g a'al mat si s-ap ab wo hehgchulidad mo hab masma an hab chu'ig Jiosh heki hu o'ohana ed." Neh, bad kajj g Jesus <sup>17</sup>ch am ha dagito. Kuchd gam hu hihi Bethany kihhim wui k am kohk.

### **Moki ha'ichu wepogid g pi bahidkam ha-asha**

*An g neid g Mark 11:12-14, 20-24*

<sup>18</sup>Ba'ich tash, chd gam hu hebai uhpam hihim Jerusalem wui. Tsh

bihugim g Jesus. <sup>19</sup>D eda am hu hema kehk g suhna uhs. Kuchd ab wui hihi no pi s-hahhagag ch ab wo chum bahidagk. D oi wa pi ab hu ha'ichu sha'i ihbdag. D hekaj hab kajj, "Pi at dahm ab hu ep wo bahidagt." Kudki wa woho gaksh.

<sup>20</sup>Kuchd am i neidok si has i elid k hab kajj, "S has masma sha'i si s-hohtam gaksh."

<sup>21</sup>D hab kajj g Jesus, "Nt wo si shel em-ahgi mamt ab wabsh wo hiwgad g Jiosh. Kut wabsh chum haschu hab wo em-juni. Mtp hems wo cheha ihda do'ag mat gam hu wo e wua ge shuhdagi ch ed. Kut wa woho hab wo e juh mamtp wo s-wohochudad mat hab wo e juh. <sup>22</sup>Ab g wo tahnid g Jiosh mamt haschu wo i tatchua. T heg hab wo em-junidad mamtp woho wo s-wohochudad mat hab wo e juh."

### **Mamsh ab kakke g Jesus mas hedai amjed u'ukch g e-gewkdag**

*An g neid g Mark 11:27-33; Luke 20:1-8*

<sup>23</sup>Kuchd ged hu uhpam dada mo am kehk g ge'e cheopi. D g Jesus am ha mashcham g hemajkam.

D am ha'i dada g u'ugchu papal ch ge'eged k ab kakke ch hab kajj, "Dohp amjed hab chum e elid map an u'ukch g e-gewkdag ch am hab ha'ichu wua? Oi g am t-ahgid."

<sup>24</sup>D hab kajj g Jesus ab ha wui, "Pegih, nt ahni wehpeg ab epai wo ha'ichu em-kakke. Mt am wo ni-ahgi. Nt am haha wo em-ahgi g em-kakkei. <sup>25</sup>Am g hig wo ni-ahgid mams hedai amjed hab elid mo wa g Johnbad ab u'ukch g e-gewkdag ch ha pahl wapkonahim. No ab Jiosh amjed aha no ab o'odham amjed?"

D idam am wabsh chum hejel si a'aga ch hab kajj, "Shahtt hig wo chei? T wo s-t-keh'id k ab wo t-kakke matt haschu ahgk pi ab hu wohoch g Johnbad mattp hab wo chei mo ab Jiosh amjed u'ukch g gewkdag. <sup>26</sup>T g hemajkam has wo t-juh mattp hab wo chei mo ab wabsh o'odham amjed u'ukch. Mu'ijj o hab elid mo d Jiosh ha'ichu i tashogidam."

<sup>27</sup>Neh, bad kajj ch ab hahawa uhpam i e nohnogi Jesus wui k hab kajj, "Pi ach sha'i mahch mas hedai amjed ab u'ukch g e-gewkdag."

D g Jesus hab epai kajj, "Pegih, nt ahni hab wa'ap pi wo sha'i em-ahgi mani hedai amjed u'ukch g ni-gewkdag ch hab wua wehs ihda."

#### Ha'ichu wepogida ab amjed g gohk ha-wihpiopga

<sup>28</sup>D hab ep kajj g Jesus, "Am g wo oidahim ihda mant wo em-ahgi. Matp hems hema g o'odham gohk wo a'alidagk ch hab wo ah g ge'e'echu, 'Ni-sulijga, am g hihm k chikpan am uhdwis oidag ch ed id i tashkaj.'

<sup>29</sup>"K hab kajj ihda, 'Pi ani tatchua mant am wo hih,' ch wabshaba am sha'i he'es gawul juh g e-chegitoidag k am hih oidag wui.

<sup>30</sup>"Kut ihda ohg am hahawa hih heg wui alichu e-alidag k hab wa'ap kajj ab wui.

"K hab kajj ihda, 'Heu'u, am ant wo wa hih,' ch wabshaba pi am hu hih.

<sup>31</sup>"Dohm hab elid mat ab s-wohog el g e-ohg?"

D hab kajj hegama, "Hegai mo d ge'e'echu."

D hab hahawa ep kajj g Jesus ab ha wui, "Nt wo si shel em-ahgi mat g em-uhwaida chechoj ch chechpa'awi u'uwi am wo i wahp Jiosh kownaltalig ed matp ab wo hiwgad g Jiosh. Mt wabshaba ahpim pi am hu wo i wahp mamtp pi ab hu wo hiwgad. <sup>32</sup>Ha pahl wapkondam John at wa ia jiwia em-wui k am chum em-chehgi g s-apkokam. Kumt pi ab hu wohoch. T wabshaba idam ab s-wohoch. Kumt wa chum nei ihda k eda wa pi gawul juh g pi ap e-chegitoidag mamt ab wo s-wohoch.

#### Ha'ichu wepogida ahga ab ha amjed g uhdwis oidag nuhkuddam

*An g neid g Mark 12:1-12; Luke 20:9-19*

<sup>33</sup>"Am g hema ep wo kaiham g ha'ichu wepogida," bad kajj g Jesus. "Neh, matp hems hema g jewed enigakam am wo ei g uhdwis e-oidag ed. T g piongaj an si kolhaidad k heg ep nahto mat hekaj am wo i wuhshad g wadgaj k am kei g uhgk kih mat heg amjed wo nuhkudad g eshaj.

"T gam hu hasko chihpia g enigakam k ha'i ha hiwigi g e-oidag.

<sup>34</sup>T am i e ai mat g uhdwis bai. T am ha'i ha cheha g e-pionag mat am wo hihim k ab wo bei hegai wadgaj mo ab d i chum wuikamaj g enigakam.

"T am hihim k am dada. <sup>35</sup>Kut idam nuhkuddam an ha u'u k hema gewittan k hema mu'a k hema ep ma'ichkwua.

<sup>36</sup>"Kut am hahawa ba'ich i mu'i ep ha cheha mat am wo hih. Kut am hihim k am dada. T am hab wa masma hab ep ha juh hegama nuhkuddam.



<sup>37</sup>“T g e-alidag am hahawa ep cheha gam hu si ha oidch no pi hab ha elid mat ab wo wa has el.

<sup>38</sup>“T wabshaba idam oidag nuhkuddam am i nei g alidaj k hab kajj ab a'ai e wui, ‘Id o d enigakam alidag. Oi g wo, tt wo mu'a k wehs wo bei g enigaj.’ <sup>39</sup>Neh, t wa woho an be k gam hu si i wuhshad ab amjed g uhdwis oidag k mua.

<sup>40</sup>“Pegih neh, shaht hig wo ha juh idam g enigakam hekid i jiwiak?”

<sup>41</sup>D ha'ijj hab kajj hegam, “Hemho wa at wo ha kokda hegam si pi ap chechoj k gam hu ba'ich ha'ijj ab wo ha nuhkudach mat idam ab hi wo mah hegai mo haschu ab d i wuikamaj.”

<sup>42</sup>D hab ep kajj g Jesus, “Heu'u, nat pi s-ohhod g enigakam alidag. Kumt hab wa masma wo s-ni-ohhod. Id o hab ahgch hab chu'ig g wepogida ahga Jiosh o'ohana ed:

Kihtdam at wo hema chum s-ohhodam g hodai.

T wabshaba id d wo si s-has ha'ichu hodaik am ha-kihta wehhejed.

Id o hab d ahga mat si s-kehg ha'ichu hab wo juh g Jiosh.

*Psalm 118:22*

<sup>43</sup>“Neh, bo chu'ig g Jiosh o'ohana. T g Jiosh wo em-wohppo'i g e-kownaltalig ahpim Tutuligo k hegam ab wo ha mah mat s-ap am wo i chikp. <sup>44</sup>Neh, t wo e sho'igch hegam mat pi wo ni-amich. Id at heg wo wa wepok mat ab wo e keiko hodai t ab. Kut hegam mat wo s-ni-ohhod wo bei g s-ko'ok e-namkidadag. Id at heg wo wa wepok mat g hodai ab ha ab wo gehsh k am wabsh wo s-ha wia.”

<sup>45</sup>D hegam u'ugchu papal ch Palasi s-mahch mo g Jesus ha wepogid hegam pi ap pion <sup>46</sup>ch heg hekaj an chum s-behim. D wabshaba g hemajkam hab elid mo g Jesus d hema Jiosh ha'ichu i tashogiddam. K hegam u'ukchu papal s-ha gihug.

**Ha'ichu wepogida ahga ab amjed g ge'e gegosig**

*An g neid g Luke 14:15-24*

**22** Jesus ad am hema ep ha ahgid g ha'ichu wepogida am neokch ha wui g hemajkam ch hab kajj, <sup>2</sup>“Bant masma am ep wo wepogi g Jiosh kownaltalig matp hems hema g kownal am wo i ap'ech g ge'e gegosig am wehhejed g e-alidag nat pi wo ha hohnt. <sup>3</sup>T am i e ai. Kut am ha cheha g e-pionag mat an wo ha ahgidahi hegam mam ab heki hu ha waid. Kut wabshaba idam pi ab hu i hihimim.

<sup>4</sup>“Kut am hahawa ha'i ep ha cheha g e-pionag mat an ep wo i ha ahgidahi. K idam an ha ahgidahim ch hab kajj, ‘Heki at hu e chuama g s-gihgim ch e gag'e g wipsilo ch wehs ha'ichu e nahtokch. Kumt ab wo i hihim k wo e gegos.’

<sup>5</sup>“T wabshaba idam mam ab ha waid pi ab hu sha'i kaiham k gam hu hab wabsh wua g hejel e-chikpan. Hema at gam hu hih e-oidag wui. T hema gam hu ep hih e-tiannaga wui. <sup>6</sup>Kut ha'ijj an ha ui idam pion k ha gewittan k ha kokda. <sup>7</sup>Kut sha'i si bagat hegai kownal k am ha cheha g e-shondalig mat am wo hihim k epai wo ha kokda hegam mat ha kokda g pion k wo

mehi g ha-kihchim. T wa woho hab juh.

<sup>8</sup>“T am hahawa i ha wai g e-pionag k hab kajj, ‘E at nahto g gegosig wehhejed g ni-alidag hohnta. T wabshaba hegam hemajkam mant ab i chum ha wai hab e juh mo pi d hahawa ha-wuikam. <sup>9</sup>Kumt am wo hihi wohg oidk k ab wo i ha wai gegosig wui mamtp he'ekia i hemajkam wo ha cheh.’

<sup>10</sup>“Kut am wa woho hihi g piongaj wohg oidk k ab wehs i ha wai hegam mat ha cheh, chum hems g pi ap hemajkam. T am hahawa mu'i dada. Kumt wehsijj ab ha mah g s-kehg eniga heg wehhejed k am i ha wahpki. Kut shuhd g kih.

<sup>11</sup>“Kut am i wah g kownal k am ha nei hegam mat am dada. K am hahawa wabsh hema daha g o'odham mo pi ab hu wahkch hegai s-kehg eniga. <sup>12</sup>K ab kakke ch hab kajj, ‘Ni-nawoj, shahpt masma ia i wah pi ab hu wahkch g s-kehg eniga id wehhejed?’

“T am wabsh i pi amich ihda o'odham mat has wo chei. <sup>13</sup>Kut ihda kownal am hahawa ha ahgi g e-pionag k hab kajj, ‘Am g wo si wulshp k gam hu wo da'ich s-chuhugam k ed. Kut am hu wo shoak k ga hu wabsh wo i si e ki'ishch nat pi wo sha'i si s-ko'ok ha'ichu nakogad.’

<sup>14</sup>“Pegih, nt wo em-ahgi mo mu'i ab ha waid g Jiosh. K wabshaba al he'ekia d i hemajkamgaj.”

**Ha'ichu kakkei ab amjed g kownal kowlanta**

*An g neid g Mark 12:13-17; Luke 20:19-26*

<sup>15</sup>Kutsh am i e hemapai g Palasi am i a'amich mat has masma wo

heki himch g Jesus ab ha'ichu kakkek. <sup>16</sup>Tki am ha'i i ha wehmt hegam mo ab si has elid g kownal Herod k am ha wehm hihi ha'i hegam Palasi k am dada k hab kajj, “Ha mashchamdham, s-mahch ach map s-ap d o'odham ch wabsh chum hedai ha mashcham g Jiosh himdag, chum as has wo chei hedai i. <sup>17</sup>Pegih, k am wo t-ahgi maps has elid g ge'e kownal lial kowlanta. No hig t-hiwgid g t-chehanig ahchim Tutuligo matt wo ha namkid aha no pi t-hiwgid?”

<sup>18</sup>D wabshaba g Jesus am wa s-ha amichud mo g pi ap'ekam hab elid ch hab ha ahg, “Ahpim s-chu i'attomkam am wabsh chum heki s-ni-himchudamk. <sup>19</sup>Ab g wo hema ni-chehgid hegai lial mam hekaj ha namkid.”

Kumd ab hema chehgi.

<sup>20</sup>D hab ha ahg, “Am g hig wo ni-ahgid mo hedai wuhiosha ch hedai chehgig ab o'ohadag id ab lial?”

<sup>21</sup>D hab kajj idam, “Hegai mo d uhgchu t-kownalig.”

D hab hahawa ep kajj g Jesus ab ha wui, “Pegih, ab g wo i dagito kownal wui hegai matp d enigaj k am epai wo i dagito Jiosh wui mo haschu d epai enigaj.”

<sup>22</sup>Kud si has i el hegam k gam hu hihi ab amjed.

**Mash am ha'i ne'owin g Jesus ab amjed g muhki g wuhshanig**

*An g neid g Mark 12:18-27; Luke 20:27-40*

<sup>23</sup>D heg wa'i tash ed am ha'i dada g Sajusi Jesus wui. Hegam mo d Sajusi o pi wohochud mat g muhki ab uhpam wo i wuhsh muhki g t

amjed. <sup>24</sup>D hab kaj idam, “Ha mashchamd, Mosesbad atki an o'oha hegai chehanigaj g Jiosh mo hab chu'ig matsh g am oidchkam wehngaj hegai mat wo muh pi ha a'alidagkch hemho wo wa bei g hohnigaj g e-wehnagbad. Tsh g ha-a'aliga hab masma wo e kuint mat d wo a'alidajk hegai mat muh.

<sup>25</sup>“Pegih, k am hu hebai wewa'ak d e-wepngam ch am t-wehm kih. Kut g si ge'echu ge hohnt k pi ab hu ha a'alidt k muh k an dagito g e-hohnig. T g am oidchkam nawojij an hahawa ep bei g hohnigaj <sup>26</sup>k hab wa'ap pi ab hu ha a'alidt k hab wa'ap muh. Kut ihda g oidchkam hab wa'ap hohnt k hab wa'ap muh pi ab hu ha a'alidtk. Neh, t hab masma i e oi idam wewa'ak k wehsijj ko'ok huhug. <sup>27</sup>K am hu'i hebai, t haha wabsh muh hab wa ehp ihda uwi. <sup>28</sup>Pegih, am g hig t-ahgid mas hedai d wo hohnigkad ihda matp ep wo e chegito g ko'i no pi wehsijj hohnigkahim.”

<sup>29</sup>D hab kaj g Jesus ab ha wui, “Pi am ap chegito nam pi pi sha'i mahch g Jiosh o'ohana ch ep pi sha'i mahch mo he'es i gewkdag.

<sup>30</sup>Woho at ab uhpam wo ha mah g ko'i g doakag. T wabshaba hahawa pi wo hohontad hab masma mo g anghil pi hohont. <sup>31</sup>Mosesbad atki an o'oha mash wa hab kaj g Jiosh:

<sup>32</sup>Ahni ani d ha-Jioshga hegam Abraham ch Isaac ch Jacob.

*Exodus 3:6*

Neh, id o hab kaj g Jiosh, chum as heki hu koi, no pi am e wehm ha nuhkud ch ab uhpam wo i ha wuwhas muhkig amjed. Pi amt woho wo i huhug am i ko'ok matp g Jiosh d em-Jioshga.”

<sup>33</sup>Kud am i kah ihda g hemajkam k si has i el g mashchamaj.

**Mash haschu d si ge'e chehanig**

*An g neid g Mark 12:28-34; Luke 10:25-28*

<sup>34</sup>Kud am ha'i dada g Palasi mat wo heki himch g Jesus am i kaiok mat ab si ha chehmo g Sajusi. <sup>35</sup>D hema hegam d Jiosh chehanig hudawogdam <sup>36</sup>ch hab kaj, “Ha mashchamd, shahchu o d si ba'iwechkim ge'e chehanigaj g Jiosh?”

<sup>37-38</sup>D hab kaj g Jesus, “Id o d si ge'e ch ba'ich i si s-has ha'ichu chehanig:

Hemho wa amt ab wo si tatchuad g e-kownalig Jiosh wehs e-ihbdagkaj ch id am wo chehgidch wehs e-doakagkaj ch wehs e-chegitoikaj.

*Deuteronomy 6:5*

<sup>39</sup>K id am oidch d si s-has ha'ichu chehanig ch wepo chu'ig:

Hemho wa amt ab wo tatchuad g hemajkam hab masma mam ab hejel e tatchua.

*Leviticus 19:18*

<sup>40</sup>Idam gohk chehanig o ab ab wehs shohshonas g Jiosh chehanig ch wehs hegai matki kekelibad Jiosh ha'ichu i tashogiddam an o'oha.”

**Ha'ichu kakkei ab amjed g Jiosh si Kehsha**

*An g neid g Mark 12:35-37; Luke 20:41-44*

<sup>41</sup>D am i e hemapai g Palasi. D g Jesus hab ha ahg, <sup>42</sup>“Am g wo ni-ahgid mam hedai hab elid mat g Jiosh si Kehsha ab d wo amjedkamk?” D hab kaj hegam, “Heg atsh d wo amjedkamk t-kownaligbad mash hab chehgid David.”

<sup>43</sup>D hab kaj g Jesus, “Pegih, sh wa eda g Davidbad hab a'aga, ‘ni-kownalig’ ch hab kaj g gewkdajkaj g Hekia S-ap'ekam Gewkdag:

<sup>44</sup>Bo kaj g Jiosh ab ni-kownalig wui:

In g dahiwua ni-wehm ni-kownal daikud ed.

Kunt wo ha gewito g m-obga mat ab wabsh wo m-wechok.

*Psalm 110:1*

<sup>45</sup>Neh, namt hig s-ap wo ah mat has masma d wo Davidbad amjedkamk ihda mash d ge'e kownaligaj?”

<sup>46</sup>Kud pi hedai e nako mas ab hu uhpam has wo chei Jesus wui nih hemako ne'oki. D heg i tashkaj amjed pi hedai e nako mas ab hu ha'ichu ep wo kakke.

**Mamtsh pi hab wabsh wo s-e junim mam d s-ap'ekam**

*An g neid g Mark 12:38-39;*

*Luke 11:43-46; 20:45-46*

**23** Mu'i hemajkam ad am ha'ichug t-wehm.

<sup>2</sup>Kud hab kaj g Jesus ab wehsijj t-wui, “Hegam chehanig em-mashchamdham ch Palasi o d hegam mo ab mahks g gewkdag mat am wo i tashogi g chehanig.

<sup>3</sup>Kumt heg hekaj ab wo s-ha wohog elidad. K wabshaba mu'ijj idam pi am hu hab junihim mo haschu em-mashcham. Kumt hekaj pi am hu ha oidk hab wo masmak.

<sup>4</sup>Neh, mu'i s-hasig ha'ichu o ab em-chehani. K id d s-wehch ha'ichu mohtoi am em-wehhejed. K eda pi ha'ichu hab sha'i wua mas hekaj em-wehm wo moht. <sup>5</sup>Wehs ha'ichu o heg wabsh hekaj am hab junihim

mamt wo ha neidad. An o u'a g Jiosh o'ohana heg wabsh hekaj mamt hab wo ha elidad mo ab wohog elid. <sup>6</sup>Si o s-hohho'id mat si s-apko wo dadhaiwua am ge'e gegosig ch ed ch am wa si hejelko dadaikud am cheopi ch ed. <sup>7</sup>Si o s-hohho'id mamt ab wo si has ha elidad am hemajkam ha-shahgid ch hab wo ha a'agad mo d ge ha mashchamdham.

<sup>8</sup>“Ahpim g pi wo sha'i tatchuad mams hab wo em-a'agad ‘ha mashchamdham’ nam pi d a'ai e-wepngam. Kuni ahni d wa'i em-mashchamdham. <sup>9</sup>Pi g hedai hab wo a'agad ‘ge ni-ohg’ id dahm jewed. Heg amt wa'i Jiosh hab wo a'agad mo d ge em-ohg. <sup>10</sup>Pi g hab wo e a'agad mam d ha wanimeddam. Ahni ani d wa'i em-wanimeddam Jiosh si Kehsha. <sup>11</sup>Bamt wa'i masma d wo si ha'ichuk mamt d wabsh wo ha-pionagk. <sup>12</sup>Kut d wabsh wo pi ha'ichuk hegai matp hedai hab wo chum e elidad mo d si ha'ichu. Heg at d wo si ha'ichuk matp hedai ab wabsh wo i pi e ha'ichuchudch.”

**Matsh si s-ko'okam wo e lodai hegam mat hab wabsh wo s-e junim mo d s-ap'ekam**

*An g neid g Mark 12:40; Luke*

*11:39-42, 52; 20:47*

<sup>13</sup>D hab hahawa ep kaj g Jesus, “Neh, mu'ijj ahpim chehanig ha mashchamdham ch ahpim Palasi am d wabsh s-chu i'attomkam. Ih, sho'ig! Jiosh at si s-ko'okam wo em-namkid heg hekaj. Pi am ha hiwigid hegam mo am i chum s-wahpkimk Jiosh kownaltalig

ed ch hab wa'ap hejel pi am hu i wahp. Heg o wa wepo mam ab si yawwidadch g kihjeg am Jiosh kownaltalig wui.

[<sup>14</sup>“Ha am iattogid g hehe'ejel wi'ikam u'uwi ch ha ehsid g ha-kihki ch eda am wabsh s-e chehgidamk mam si chew e ho'ige'idahun. Id at hekaj ba'ich wo i s-ko'okk g em-namkidadag.]

<sup>15</sup>“Am am si i e nakog mamt chum hems hemako am wo i wanchkwua pi wohokam e-himdag ed. T ihda ba'ich i s-gewkam wo wulshpik mam ahpim mat am wo gei Jiawul kih ed nat pi ba'ich i s-gewkam am wo oidad g pi wohokam em-himdag. T g Jiosh si s-ko'okkam wo em-namkid heg hekaj.

<sup>16</sup>“Neh, am am ha'i ep chum ha mashcham ch eda hab chech'e, 'Pi att hemho wa hab wo juh g t-ne'oki mattp wabsh wo gewkaj chehchegch g ge'e cheopi, heg hi wa matt wo chehcheg hegai ohla mo hekaj e heosid.' <sup>17</sup>K eda g ge'e cheopi ba'ich d i si ha'ichu mo hegai heosidakud.

<sup>18</sup>“Kum hab ep chech'e, 'Pi att hemho wa hab wo juh g t-ne'oki mattp wabsh wo gewkaj chehchegch hegai iagchulidakud mo am hab chu'ig ge'e cheopi t ab, heg hi wa matt wo chehcheg hegai mo an ab e iagchulid.' <sup>19</sup>K eda g iagchulidakud ba'ich d i si ha'ichu mo hi hegai mo an ab e iagchulid. <sup>20</sup>K heg wa wepo mam heg chehcheg iagchulidakud mam eda chehcheg g iagchulida. <sup>21</sup>Kum chehcheg g Jiosh mam eda chehcheg g ge'e cheopi no pi heg d Jiosh kih. <sup>22</sup>Kum hab

wa'ap chehcheg g Jiosh mam eda chehcheg g dahm kahchim.

<sup>23</sup>“Im am hu hab wabsh i juhkch hegai mo d chum si ha'ichu am Jiosh chehanig ed mamt hab wabsh wo juhkchid g al chum ha'ichu. Neh, wehs am ha'ichu hemako tahpani mahk g Jiosh mo wehst-mahm e tahpanch, chum hems g ha'ichu hahhag ch ha'ichu kai, ch wabshaba pi ap ha lodait ch pi ha ho'ige'id ch pi ab hu wohochud g Jiosh. T g Jiosh heg hekaj si s-ko'okkam wo em-namkid. <sup>24</sup>Am am wabsh s-nen'oid g al chu'uchum ha'ichu ch g ge'eged ha'ichu pi chegito. Id o heg wa wepo mamtp hems wo o'os g e-wasib mat am eda wo gei g al chukumug k wabshaba wabsh wo bah wehnadk g ka-mihyo matp heg am eda wo gei.

<sup>25</sup>“Ba'ich at wo i s-ko'okk g em-namkidadag nam pi hi wa chum si s-ap e chehgid. K wabshaba am em-eda ha'ichug g pi amdag ch s-chu da'adag. <sup>26</sup>Am g wo i e kegchud e-i'ibdag ed. T g ha'ichu hab em-juni am haha wo s-ap'ek.

<sup>27</sup>“Neh, nat hig pi wo i e kegch g hiha'ini an e dahm, chum as am eda wo wehchk g oh'o ch jewalig? Pegih, m ahpim hab sha masma mo g hiha'ini <sup>28</sup>nam pi ab chum e chehgidch mam d s-ap'ekam. K eda g em-chegittoi pi a'pe. Ih sho'ig! Jiosh at si s-ko'okkam wo em-namkid.

**Matsh g Jesus ha ahgi mo haschu d s-ko'ok ha-namkidadag**

*An g neid g Luke 11:47-51*

<sup>29-31</sup>“Em-shohshon at mu'i ha kokda g kekelibad Jiosh ha'ichu i

tashogiddam. Kum ahpim si s-kehg ha hehosid g ha-hiha'iniga hegam mamt ha kokda ch hab chech'e mamt ahpim hi pi wo chum ha kokda. Dam s-chu i'attomkam ch ha wepo masma mash wa g em-shohshon. Ih, sho'ig! Jiosh at si s-ko'okam wo em-namkid namt pi am ha oidk hab wo e juh.

<sup>32</sup>S-ap amt wo nahto hegai mat g em-shohshonbad i shonwuich.

<sup>33</sup>Damt wo ha mu'akamk hab masma mo g kohk'oi ch hekaj pi hab mahs mams wo e do'ibia.

<sup>34</sup>Pegih, nt wo em-ahgi mant am i ha wuwhas g ha'ichu i tashogiddam ch s-chu a'amichuddam ch ha mashchamdum am em-shahgid. Kumt ha'i wo ha gewitta am e-chechopi ed k ha'i an has wo ha shahmudahim k ha'i wo ha kokda, chum hems ab ha sisishpk kots t ab.

<sup>35-36</sup>T g s-ko'ok em-namkidadag ab em-ab wo gei hemu s-hohtam. Neh, Abelbad atsh wa wehpeg e muhkid. Tsh amjed mu'i ep e ko'ij. Tsh ga hu si ha oidch hegai Zecariabad mash d Barackiabad alidag e muhkid am ha shahgid g ge'e cheopi ch iagchulidakud, Kum ahpim ha wepo chu'ijig hegam matsh wa ha kokda ch ha wepo masma wo bei g s-ko'ok e-namkidadag mamtp hedai ha wepo elid ha'ichu."

**Mash g Jesus ab si ha tatchua g  
Jerusalem t am hemajkam**

*An g neid g Luke 13:34-35*

<sup>37-38</sup>K hab ep kajj g Jesus, "Ih, sho'ig, ahpim Jerusalem t am hemajkam, nat pi g Jiosh s-ap wo em-dagito. Em-shohshon ash wa ha ma'ichshulig ch mu'i ha kokda g

Jiosh ha'ichu i tashogiddam. Kumt ahpim am ha oidk hab wo e juh. Mu'ikko ani chum tatchua mant wo si s-ap em-nuhkud hab sha masma mat g chuchul g e-mahmad ab e wecho wo ha hemapai. M wabshaba pi ab hu tatchua manis hab wo em-juh. <sup>39</sup>K eda an hab chu'ig Jiosh o'ohana ed mamt ab wo chum ni-ihmad ch hab wo chech'ed mat g Jiosh am ni-kehsh k si s-ni-ho'ige'id. Kunt ia wo i s-ap em-dagito am hugkam mamt hab hahawa masma hab wo e juh."

**Matsh wo i e wua g Tutuligo ge'e  
ha-cheopi**

*An g neid g Mark 13:1-2; Luke 21:5-6*

**24** Kud gam hu hahawa i wuhsh g Jesus ab amjed g ge'e cheopi. Kuchd am i oid k am wui dada k am a'aga mo si s-kehg hab mahs g ge'e cheopi. <sup>2</sup>D hab kajj, "Heu'u, woho o hi wa si s-kehg hab mahs. Nt wabshaba si shel wo em-ahgi mo e aihim mat wehs wo i e shul ihda."

**Matsh g ge'e kudutalig wo i wuhsh**

*An g neid g Mark 13:3-13; Luke 21:7-19*

<sup>3</sup>Kuchd amjed gam hu hejelko hihi wehmaj g Jesus k ab i chehchsh k ab dadhaiwua Olive U'us Kawulk t ab. Kuchd hab ahg g Jesus, "Am g hig t-ahgid mas hekid hab wo i e juh hegai map am t-ahgid. Kut haschu d wo chehgidak matt heg ab wo s-mahchk mo e aihim mapt ep wo jiwia. T g jewed wo huhug."

<sup>4</sup>D hab kajj g Jesus, "Mt wo si s-e nen'oidad mat pi hedai wo em-iattogi. <sup>5</sup>Mu'i at an wo i wuwha

a'ahidag oidam k ni-wepo wo e chehcheg hab kaijch mo d Jiosh si Kehsha. Kut mu'ijj ab wo s-ha wohoch. <sup>6-7</sup>T g nahnko mahs hemajkam ch jejewed ab a'ai wo i e cheheggia. Mt wabshaba pi wo e totods. Hemho wa at hab wo e juh hab masma. K wabshaba pi hab d ahga mat e ai mat wo kuhgit. Bihugig at wo gehsh k g jewed wo u'ugij mu'ikpa. <sup>8</sup>Id at d wabsh wo shohshonajk g sho'igdag nat pi ba'ich wo i ge'eda.

**Mamtsh wo ha sho'igch hegama mat ab wo hiwgad g Jesus**

<sup>9</sup>"T wo e ai mamt am wo em-u'u k wo em-dagito mamt wo em-sho'igchud k wo em-kokda. Wehsko jejewed dakam hemajkam at wo s-em-keh'idad ni-hekaj. <sup>10</sup>Mu'ijj at wo ni-dagito heg hekaj k wo a'ai e gagda k wo s-e keh'idad. <sup>11</sup>Mu'i at an wo i wuwaha g s-chu i'attomkam k hab wo e a'agad mo d Jiosh ha'ichu i tashogiddam. T mu'i hemajkam ab wo s-ha wohoch. <sup>12</sup>Pi ap'ekam at wo i ge'eda. T mu'ijj wo huhug g pihk ha-elidadag ab a'ai e wui.

<sup>13</sup>"Mt wo sha e nakog k wo gahi wuwaha g e-sho'igdag. T g Jiosh am wo i em-wahpki e-kihdag ed. <sup>14</sup>Ihda s-kehg ha'ichu ahgaj g Jiosh ab amjed g kownaltaligaj at an wehsko wo e ah jewed dahm. T am haha wo e ai mat wo kuhgit.

**Matsh wo e uamhu g ge'e cheopi**

*An g neid g Mark 13:14-23; Luke 21:20-24*

<sup>15</sup>"Am g wo amichud ihda mam in ne'okchulid. Hegai Danielbad mash d Jiosh ha'ichu i tashogiddam

at an o'oha mat g em-obga am wo i kei g s-uam ha'ichu ged hu si eda g ge'e cheopi. <sup>16</sup>Kut hemho wa am wo ahho dohda'ag wui hegama mat hedai ia wo ha'ichugk Judea jewed ch ed. <sup>17-18</sup>Kut pi hedai am hu wo sha'i chum i wah e-kih ed mat am wo ha'ichu ui, chum as hems imhab wo wa'i oimmedad e-kih wehgaj o am wo chikpanad oidag ch ed. <sup>19</sup>S-ta at ehbidam wo mahsk am ha wehhejed hegama mat wo chu'uchum mahmadk ch hegama mat wabsh wo kia wo'ok g ali.

<sup>20</sup>"Mt ab wo tahnid g Jiosh mat pi eda hab wo e juh ihda em-mihshmda tash ed o g s-hehpich'ed. <sup>21</sup>Ba'ich at d wo i si ge'e sho'igdagk mo pi hekid g hemajkam sha'i neid ch pi hekid hab masma ep wo nei. <sup>22</sup>Pi at hedai wo e nako mas am gahi wo wuhsh hegai sho'igdag matp tash wo hih. T g Jiosh heg hekaj wo i shopolkai am ha wehhejed g e-hemajkamga.

<sup>23</sup>"Pi g wo sha'i ha wohochud matp hema hab wo sha chei mo am hebai ha'ichug g Jiosh si Kehsha.

<sup>24</sup>Mu'i at in wo i wuwahag k hab wo chei mo d ni-ahni Jiosh si Kehsha o d Jiosh ha'ichu i tashogiddam k am hab wo wuad g s-hasig ha'ichu mat hekaj wo i chum ha wanchshul g Jiosh hemajkamga matp wo e nako.

<sup>25</sup>Neh, ni heki hu am em-ahgid mamt hekaj wo s-e nen'oidk.

<sup>26</sup>"Tp hems ha'i hab wo chei mo am ha'ichug g Jiosh si Kehsha tohono jewed ch ed o am hebai e ehstokch. Kumt wabshaba pi wo ha wohochud k pi am hu wo chum hihi. <sup>27</sup>Wehsko ant wo ni-chehgi mant hekid ep wo jiwia jewed

dahm ahni Jiosh si Kehsha hab sha masma mat g wepgi s-masma an gahi wo kekiwua chewagi ch ed.

<sup>28</sup>“Neh, s-mahch am mat hebai wo wo'ok g ha'ichu muhkig an wabsh ha neidch g nunuwi mat am wo e chehm. Pegih, mt hab wa'ap s-ap wo s-mahchk mant hebai wo ha'ichugk.”

**Matsh ep wo jiwia g Jiosh alidag**

*An g neid g Mark 13:24-27; Luke 21:25-28*

<sup>29</sup>D hab ep kajj, “T am wabsh wo i chum kuhgi hegai jewed shuhdgim sho'igdag. T g tash tonlig wo huhug. T g mashad ep pi wo ha ton. T g dahm kahchim wo ugij. T g huhu'u wo i shul. <sup>30</sup>Nt ab haha wo i ni-chehgi ab dahm kahchim t amjed k wo jiwia. T wehs hemajkam wo si shoanid ab i ni-neidok. Nt si s-masma ab wo hudunihi chewagi ch ed. Kut am wo e maskogi g ni-gewkdag. <sup>31</sup>T ab si s-kaidam wo e kuhu g kuikud. Kunt wo ha cheha g ni-anghiliga mat ab wehs wo i ha hemapai hegama mant am i ha chuhcha mat wo e do'ibia. T am wo hihi imhab si'al tahgio ch imhab hudunig tahgio ch imhab wakolim tahgio ch imhab juhpin tahgio k wo ha hemapai.”

**Mamtsh has masma wo s-amich g jiwhiadaj**

*An g neid g Mark 13:28-31; Luke 21:29-33*

<sup>32</sup>“Nt wo ha'ichu em-mashcha heg hekaj suhna uhs. Mt wo s-mahchk mo g toniabkam e aihim mamt wo nei mat ab wo i i'iwgi. <sup>33</sup>Pegih, mt hab wa'ap wo s-mahchk mo e aihim mat wehs wo kuhgit mamt wo nei mat hab wo e juh hegai

mani em-ahgid. <sup>34</sup>Nt wo si shel em-ahgi mat d wabsh wo kia dodakamk hegama mat wo nei ihda mani em-ahgid mat hekid wehs wo kuhgit. <sup>35</sup>Neh, wehs at gam hu hab wo i e juh ihda Jiosh nahtoi mam in neid. T wabshaba g ni-ne'oki pi hekid gam hu hab wo i e juh.”

**Mash pi hedai s-ap mahch mas hekid ep wo jiwia g Jiosh alidag**

*An g neid g Mark 13:32-37;*

*Luke 17:26-30, 34-36*

<sup>36</sup>D hab ep kajj, “Heg o wa'i s-mahch ni-ohg Jiosh mant hekid ep wo jiwia. Pi o hedai ep s-mahch, chum hems g anghil nih ahni mani d hi wa chum alidaj. <sup>37</sup>Bat wo masmak ha'ichu mant hekid ep wo jiwia mash wa hab chu'ig mash eda g Noahbad in d doakam. <sup>38</sup>Hemajkam ash wa gam hu wabsh i si nenead ch e gegosid ch ih'ed ch e hohont ch gam hu wabsh i pi chegito g Jiosh. T haha wabsh e ai g tash mat hegama Noahbad am i wahp ge'e wahlko ch ed. <sup>39</sup>Kut wehs ha wi'in g hemajkam k ha hugio. Kut hab wo wa masmak mant hekid ep wo jiwia. <sup>40</sup>Neh, gohkajj at am wo chikpanad oidag ch ed. T hema gam hu wo i e be k hema am wo wa i e wuiok. <sup>41</sup>Gohk u'uwi at am wo ha'ichu chu'ad. T hema gam hu wo i e be k hema am wo wa i e wuiok.

<sup>42</sup>“Pegih, mt wo si s-e nen'oidad. Pi o ta machima am em-wehhejed mant haschu tash ed ep wo jiwia ahni em-kownalig. <sup>43</sup>Neh, pi o ta machima mas hekid hema wo jiwia g s-chu ehskam. Kum heg hekaj chum hekid nuhkud g e-kihdag.



<sup>44</sup>Pegih, k hab wa'ap pi ta machima em-wehhejed manis hekid wo uhpam jiwia jewed wui ahni Jiosh si Kehsha. Mt heg hekaj wo si e nahtokchid chum hekid.

**Mamtsh s-ap hab wo junihid g e-chikpan**

*An g neid g Luke 12:41-48*

<sup>45</sup>“Chum amt hedai wo e nahtokch mamtp wo s-wapagimak ch wo s-chu a'amichudad. S-mahch am mat g ha-ahmo hema wo e-gahgi g hab mahs pion k wo nuhkudach g e-kihdag. T heg s-ap wo ha chikpanchudad ch wo ha dagio'idad g e-wehm pion mat eda pi an hu wo ha'ichugk g ha-ahmo. <sup>46</sup>T am ep wo jiwia k wo cheh mo s-ap am hab junihim g e-chikpan. Kut d wo si ge'e s-hehgigk heg wehhejed pion. <sup>47</sup>Nt wo si shel em-ahgi mat g ahmoj am hahawa wehs dahm wo kei g e-kihdag.

<sup>48</sup>“T wabshaba pi ap d wo ha kehshak matp hedai hab wo i e ah, 'Pi at oi wo jiwia g ni-ahmo,' <sup>49</sup>k wo i ha sho'igch g e-wehm pion k g s-i'imkam ha wehm wo ih'ed ch wo e gegosidad. <sup>50</sup>T haha wabsh wo jiwia g ahmoj k wo cheh mo pi ap hab wua g e-chikpan <sup>51</sup>k wo si s-ko'okam namkid k gam hu hab wo i juh. Neh, bat wa masma hab wo e juh ha wehhejed hegam mat pi ab hu wo wohog elidad g Jiosh. Heg at s-ko'okam wo ha namkid. Kut heg hekaj wo shoakad ch ga hu wabsh wo i si e ki'ishch.”

**Mamtsh s-ap wo e nahtokchid matsh ep wo jiwia g Jesus**

**25** D hab ep kajj g Jesus, “Ba'ich ant am wo i

em-tashogi g Jiosh kownaltalig am wepogidch hegai kih mat hebai ha'i wo e hohont. Mt am ha'i ha wai wehst-mahm chetcha. T am hihi ha u'adch g e-lalampa k am wo i wahp g wo ha hohntam wehm mat hekid wo jiwia. <sup>2</sup>Hetasp idam o pi ha'ichu nen'oid <sup>3</sup>ch ep pi ha wa'igchug g a-saidi. <sup>4</sup>Hetasp o s-chu nen'oid ch ep ha wa'igchug g a-saidi. <sup>5</sup>Kut pi oi jiwia g wo ha hohntam. T wehsijj s-ha kohksimch idam chetcha. T gam hu kokh.

<sup>6</sup>“Neh, t am i e ai g eda hugkam g s-chuhugam. T ab kaida ihda, 'Ab o him g wo ha hohntam. Oi g wo i hihim k ab wo namkhi.' <sup>7</sup>T hegam wehst-mahm chetcha nehnem k i ha kegchud g e-lalampa.

<sup>8</sup>“K hab kajj hegam mo pi ha'ichu nen'oid, 'Ab g wo i ha t-mahki g e-a-saidiga. Chuhchkim o g t-lalampa.’

<sup>9</sup>“K hab kajj hegam mo s-chu nen'oid, 'Pi att wo t-nako. Am o wabsh i hejel t-wehhejed ahim am shuhdagi ch pi wo em-ai. Am amt wo hihi tianna wui k am hejel wo ha nolawt.’

<sup>10</sup>“T wa woho hab e juh hegam ha'i k gam hu hihi mat wo ha nolawt g a-saidi. Kut eda ia hu ha oidk jiwia g wo ha hohntam. Kut hegam hetasp mo e nahtokch gam hu wehmaj i wahp mat am wo e gegos wehmaj. T ab si e kuh g kihjeg.

<sup>11</sup>“T am i uhpam dada hegam ha'i k ab chum shoani ch hab kajj, 'Ab g si s-t-ho'ige'id k ab i kuhpi'oki matt am wo i wahp.’

“K hab kajj g wo ha hohntam, <sup>12</sup>“Nt wo si shel em-ahgi mani pi

sha'i em-mahch mams hedai wud,  
ch am hahawa si kuh g kihjeg.”

<sup>13</sup>Neh, d am i kuhgit g  
e-wepogida g Jesus hab kaijch,  
“Neh, mt wo s-e nen'oidad nam pi  
pi sha'i mahch mant hekid ep wo  
jiwia.

**Mamtsch wo s-ap hekaj hegai mo  
haschu ab em-mahk g Jiosh**

*An g neid g Luke 19:11-27*

<sup>14</sup>“Bant masma ep wo i wepogi  
g Jiosh kownaltalig matp hems g  
o'odham hema hasko wo him k  
ab i ha wai g e-pionag mat ab wo  
ha nuhkudach g ha'ichu e-eniga.

<sup>15</sup>Hema at mah g hetasp mihl pihsh  
k hema gohk mihl pihsh k hema ep  
g hemako mihl pihsh no pi s-mahch  
mat he'ekia i s-ap wo chikpanad k  
amjed gam hu mehk jewed wui hih.

<sup>16</sup>“Hegai piongaj mat g hetasp  
mihl pihsh ab ui at am ha hekaj  
i e nakog k hekaj ihda lial mat  
am dahm hetasp mihl pihsh ep  
nahto. <sup>17</sup>Kut hegai mat g gohk mihl  
pihsh ab ui hab wa'ap e juh k gohk  
mihl pihsh am dahm nahto. <sup>18</sup>T  
wabshaba hegai mat g hemako mihl  
pihsh ab ui gam hu him k am hebai  
wagt k am ehsto.

<sup>19</sup>“K mehk amjed mat jiwia g  
ha-ahmo idam k am ha ui mat wo  
s-mai mat has masma hekaj g lialigaj.

<sup>20</sup>“Hegai piongaj mat g hetasp  
mihl pihsh ab ui at ab i wah k ab i  
mah g hetasp mihl pihsh am dahm  
hegai mat ab ui k hab kaij, ‘Ab apt  
wa ni-mah g hetasp mihl pihsh. Neh,  
nt am ba'ich hetasp mihl pihsh ab ep  
wo m-mah mant nahto.’

<sup>21</sup>“K hab kaij g ahmoj, ‘S-ap aptki  
hab e juh, s-ap'ekam ni-pionag,

s-ap hekajk mant he'ekia ab i  
m-mah. Nt hekaj ab ba'ich i mu'i  
wo m-nuhkudach. Am g ni-wehm  
s-hehgikgad.’

<sup>22</sup>“T heg ab hahawa ep i wah  
piongaj mat g gohk mihl pihsh ab  
mah k hab kaij, ‘Neh, gohk mihl  
pihsh apt wa ab ni-mah. Kunt am  
ba'ich gohk mihl pihsh ab ep wo  
m-mah mant nahto.’

<sup>23</sup>“K hab kaij g ahmoj, ‘S-ap aptki  
hab e juh, s-ap'ekam ni-pionag,  
s-ap hekajk mant he'ekia ab i  
m-mah. Nt hekaj ab ba'ich i mu'i  
wo m-nuhkudach. Am g ni-wehm  
s-hehgikgad.’

<sup>24</sup>“T ab hahawa i wah hegai  
piongaj mat g hemako mihl pihsh  
ab mah k hab kaij, ‘Ni-ahmo,  
s-mahch ani map s-ta ke'idama ch  
s-beihimk hegai map haschu pi ab  
hu chikpan. <sup>25</sup>Kunt heg hekaj gam  
hu s-a'agko e'esto g m-lialiga. Neh,  
m ia wehch mo haschu d m-eniga.’

<sup>26</sup>“K hab kaij g ahmoj, ‘Si pi ap  
ch s-padmakam ni-pionag, kups wa  
chum s-mahch mani s-ta ke'idama  
ch s-beihimk hegai mani haschu  
pi ab hu chikpan. <sup>27</sup>Pegih neh, pt  
hems am hi wo wa chum toa g  
ni-lialiga wahnko ch ed. Kunt ab  
wehs uhpam wo ui wehnadk mat  
haschu ab wo i mahmادت.’

<sup>28</sup>“K hab hahawa ha ahg g ha'i  
ep e-pionag, ‘Mt wo wohppo'id k  
ab wo mah hegai mo wehst-mahm  
mihl pihsh edgid. <sup>29</sup>Ba'ich at ep  
wo nei g e-ap'edag hegam mat  
hedai s-ap wo hekaj. T wabshaba  
wo e wohppo'idach mo haschu al  
i edgid hegam mat pi ap wo hekaj.

<sup>30</sup>Mt gam hu wo da'ich hegai  
s-padmakam pion s-chuhugam k ed.

T am wo si shoakad ch ga hu wabsh wo i si e ki'ishch nat pi wo sha'i si s-ko'ok ha'ichu nakogad.'

**Matsh g Jiosh alidag wo  
ha lodai g hemajkam**

<sup>31</sup>"An ant wo dahiwua ni-kownal daikud an mant hekid wo i jiwia ha wehm g ni-anghiliga. <sup>32-33</sup>T wehs hemajkam am wo e hemapai ni-ba'ich. Nt ab wo i ha gawulkai hegam mo d wohokam ab ha amjed hegam mo pi d wohokam hab masma mamt am wo i ha gawulkai g kahwal ch siswat. <sup>34-36</sup>Bant wo ha ahgi hegam mant ab i ha gawulkai, 'Ab g wo i hihim. S-em-ho'ige'id o g Jiosh. Ni-gegos amt mani wa d bihugimkam k ni-wasibi mani wa d tonomkam k am i ni-wahki e-kih ed mani wa d wabsh ge o'odham k ni-enigadad mani wa pi ha'ichu edgid k ni-nuhkud mani wa mumku k am ni-chechga mani wa d lihso. K g Jiosh am nahtokch g kihdag em-wehhejed ga hu i amjed mat in i nahto g jewed. Ab g wo i wahpkid k wo edagi.'

<sup>37-39</sup>"Kut hab wo chei ab ni-wui, 'T-kownalig, kuchs hekid i m-gegosid k m-wasbid k ab i m-wahki t-kih ed k ab m-enigadad k m-nuhkud k am m-chechga?'

<sup>40</sup>"Nt hab wo chei, 'Nt wo si shel em-ahgi mam ahni am i ni-wehmt hekid am i ha wehmtch hegam mo d sho'igkam ch ab ni-hiwig.'

<sup>41-43</sup>"Kunt hab haha wo chei ab ha wui hegam mant pi ab hu i ha gawulkai, 'Gam g hu hab wo i e juhni. Ab o em-mohto'id g Jiosh g s-ko'ok namkidadag. Pi amt ni-gegos mani wa d bihugimkam k

pi ni-wasibi mani wa d tonomkam k pi am hu i ni-wahki e-kih ed mani wa d ge o'odham k pi ab hu ni-enigadad mani wa pi ha'ichu eniga k pi ni-nuhkud mani wa mumku k pi am hu ni-chechga mani wa d lihso. Neh, am amt wo e shul heg eda mehi mo d ha wuikam g jijawul.'

<sup>44</sup>"Kut hab wo chei hegam ab ni-wui, 'T-kownalig, ch hekid i m-neid maps d bihugimkam o d tonomkam o d ge o'odham o pi ha'ichu eniga o mumku o d lihso, kuchs pi am hu i m-wehmt.'

<sup>45</sup>"Nt hab wo chei, 'Nt wo si shel em-ahgi mam ahni pi am hu i ni-wehmt, hekid pi am hu i ha wehmtch hegam mo d sho'igkam ch ab ni-hiwig.'

<sup>46</sup>"Kut idam am wo e shul pi ha huhugedam s-ko'ok namkidadag ed. T g s-ap'ekam an wo i wahp anai mat an hahawa chum hekid wo edgidad g s-ap'ekam doakag."

**Mamtsh am i ap'ech mamtsh wo mua  
g Jesus**

*An g neid g Mark 14:1-2; Luke  
22:1-2; John 11:45-53*

**26** D am i ha'asa ha'ichu ha mashcha g Jesus k hab hahawa kaj ab t-wui, <sup>2</sup>"S-mahch am mo gohk tash am wi'is matt wo wuhshad mat g Jiosh ha do'ibia g t-shohshonbad. Kutki hab wo e juh mat an wo ni-bei hegam mo ab ni-wui gegok k ab wo ni-naggia kots t ab mat wo ni-mua." Neh, heg o hab wa'i kaj.

<sup>3</sup>Kumsh eda woho a'aga mamtsh has masma wo be k wo mua. Si uhgchu pahl atsh am i ha hemapai

hegam ha'i u'ugchu papal ch ge'eged. Kutsh ab kihj ab nam <sup>4</sup>k am ap'ech mat s-a'agi an wo bei g Jesus k wo mua, <sup>5</sup>ash am wabsh a'ai e ahgid, "Hi wa pi am hu heg eda mat ia wo e hemapadch g hemajkam id hekaj piast. T wo am hu e babgachud k wo t-cheggia."

**Mamtsh ab to'i g Jesus g s-ap uhw shuhdagikaj**

*An g neid g Mark 14:3-9; John 12:1-8*

<sup>6</sup>Kuchd am hu hebai am dada Bethany kihhim t am. D am d kihkam hegai mad hab chehgig Simon ch wa chum mumku heg hekaj mo g chuhkugaj wabsh muhkhim. <sup>7</sup>Id ad ab i t-waid k t-gegos. Kuchd am dadhak ch t-gegosid. T ab haha wabsh hema i wah g uwi g si s-namkig s-ap uhw shuhdagi wa'igchugch am al s-toa hodai ha'a ch ed k ab iawua Jesus mo'o ab.

<sup>8</sup>Kud ha'i si pi hohho'i g t-wehm e mashchamdak k hab kajj, "Ih, pt wabsh heki wua ihda s-namkig ha'ichu. <sup>9</sup>Eda atp hu'i mu'i lial wo nam sha e gagdak. T heg wo e hekaj ha wehhejed g sho'igkam."

<sup>10</sup>Kud s-mahch g Jesus mach haschu am a'aga ch hab kajj ab t-wui, "Pi g am wo sha'i keh'idad ihda uwi. Si at s-kehg ha'ichu hab juh am ni-wehhejed. <sup>11</sup>Mt wabsh chum hekid wo i ha wehmt g sho'igkam. Kunt ahni hi pi tash ia hu wo em-shahgidk. <sup>12</sup>Ab at iawua g uhw shuhdagi mat wo i nako g ni-honshpadag hiashpa. <sup>13</sup>Nt wo si shel em-ahgi mat am wo s-e chegitok mat haschu has juh ihda uwi mat hebai wo i e ahgachugad

g s-kehg ha'ichu ahgaj g Jiosh an wehsko jewed dahm."

**Matsh g Judas am ap'ech matsh wo gagda g Jesus**

*An g neid g Mark 14:10-11; Luke 22:3-6*

<sup>14</sup>D am ha hekaj t-dagito g Judas Iscariot k gam hu hih. Kuchd am i dahm s-mai matsh am hih u'ugchu papal ha wui <sup>15</sup>ash hab kajj, "He'ekia amt wo i ni-namkid mant an wo em-behi g Jesus?"

Kutsh am chehgid k kuint g waikko wehst-mahm plahda pihsh matsh id wo mah. <sup>16</sup>Tsh ab i amjed g Judas am i e nako matsh wo gagda g Jesus.

**Matsh am i e ai g ha-shohshonbad ha-do'ibiadag gegosig**

*An g neid g Mark 14:12-21; Luke 22:7-14, 21-23; John 13:21-30*

<sup>17</sup>D am hahawa s-ap i e ai hegai t-shohshonbad ha do'ibiadag piast. K id eda pi e ko'a hegai pahn mo jewajidas. Kud d wehpeg tash heg eda gegosig. Kuchd am dada Jesus wui k ab kakke machs hebai wo i ap'ech matt am wo huh g kahwal mad iagchulig gegosig.

<sup>18</sup>D gohkajj hab t-ahg, "Am amt wo hihi Jerusalem wui. K am hema d kihkam ch am wo e chehgi. Mt hab wo ah mani hab kajj mat e ai g ni-tashga. Kutt t-wehm wo huh g kahwal mad iagchulig gegosig am kihj am." <sup>19</sup>Kud am hab e juh mad hab ha ahg g Jesus k am i ap'ech g gegosig.

<sup>20</sup>D am i hud. Kuchd am dadhaiwua k am t-gegosid. <sup>21</sup>Kud hab haha wabsh kajj g Jesus, "Nt wo si shel em-ahgi mat has wo e

juh hemu. Hema amt wo ni-gagda ahpim mam ab si ni-wecho e mashcham.”

<sup>22</sup>Kuchd si pi ap t-taht k gan hu hab i che'iatahi, “Ih, hi wa pi ahni, ni-kownalig.”

<sup>23</sup>D hab kajj g Jesus, “Heg at hab wo juh mat hedai am ni-wehm wo wakch g chemait hidod ch ed. <sup>24</sup>Bant masma wo ni-muhkid mo has masma heki hu o'ohanas Jiosh o'ohana ed mat g si Kehshaj wo e muhkid. T wabshaba wo si s-ko'okam e namkid hegai mat wo ni-gagda. Ba'ich at wo i chum s-ap'ek heg wehhejed mat hems wabsh pi wo chum mahsi.”

<sup>25</sup>D hegai Judas matki gagda hab kajj, “Aha nap ahni hab ni-ahg, t-mashchamdam?”

D hab kajj g Jesus, “Dap ahpi.”

**Matsh g Jesus am i shonwuich g mihshmda chemait hugi**

*An g neid g Mark 14:22-26; Luke 22:15-20; 1Cor. 11:23-25*

<sup>26</sup>Chd am wabsh kia t-gegosid. D g Jesus am bei g chemait k ab ho'ige'el g Jiosh k am hahawa i hahain k ab t-mah k hab kajj, “Oi g wo huhgi ihda. Do ni-honshpadag.”

<sup>27</sup>D am hahawa bei g tahsa k ab ep ho'ige'el g Jiosh k ab t-mah g wasib k hab kajj, “Wehsijj g ab wo ih'e. <sup>28</sup>Id o d ni-eh'ed. Id ani hab ahgch hab kajj mant wo ni-muhkid em-wehhejed. T g ni-eh'ed wo e iawua. T g Jiosh heg hekaj am hab wo juh hegai mo wa hab kajj mat gam hu hab wo i juh g pi ap ha-chu'ijjig g hemajkam. <sup>29</sup>Ia o i s-ap'e. Kunt pi hekid em-wehm hab ep wo juh ihda k wabshaba

em-wehm wo si s-hehgigk Jiosh kihdag ed.”

<sup>30</sup>Neh, kuchd am hahawa kuhgit am hema ahgk g mihshmda ne'i k am wuwahg k gam hu hihi Olive U'us Kawulk wui.

**Matsh g Jesus am ah mat g Peter wo pi mahch k ah**

*An g neid g Mark 14:27-31; Luke 22:31-34; John 13:36-38*

<sup>31</sup>D hab t-ahg g Jesus, “An o o'ohanas mo hab kajj g Jiosh:

Nt wo hiwigi mamt wo mua g kahwal ha nuhkuddam.

T g kahwal wabsh a'ai wo wohp.  
*Zechariah 13:7*

K id hab d ahga mamt wehsijj wabsh wo ni-dagito k gam hu a'ai wo wohp mant hekid wo ni-muhkid.

<sup>32</sup>Kunt wabshaba ep wo ni-chegito k gam hu wo hih Galilee wui. Mt ab ha'ab wo ni-nei.” Neh, bad kajj g Jesus.

<sup>33</sup>D g Peter hab kajj, “Ahani ant hi pi hekid wo sha'i m-dagito, chum as wehsijj wo m-dagito idam.”

<sup>34</sup>D hab kajj g Jesus ab wui, “Nt wo si shel m-ahgi mat koi wo kuhu g keli chuchul id i chuhug ab. Kupt waikko hab wo wa'i chei map pi sha'i ni-mahch.”

<sup>35</sup>D hab kajj g Peter, “Pi ant hekid hab wo sha'i chei manis pi m-mahch, chum anis wo ni-muhkid m-wehm.” Kuchd wehsijj hab wa'ap kajj.

**Matsh g Jesus pi ap e taht k am e ho'ige'idahu Gethsemane t am**

*An g neid g Mark 14:32-42; Luke 22:39-46*

<sup>36</sup>Kuchd ged hu dada heg ab oidag mo hab e a'aga Gethsemane.

D pi am hu t-wehmaj g Judas Iscariot. D hab kajj g Jesus ab t-wui, "Ia g hu wo i dadhak. Nt ahni am ba'ich wo i him k wo ni-ho'ige'idahu." <sup>37</sup>Bad kajj ch am ha u'uk g Peter ch James ch John. T idam gam hu oi.

Kush s-masma si pi ap e tahtk g Jesus ch si e kudut <sup>38</sup>ch hab kajj ab ha wui, "Ab at wabsh i si ni-shuhd g pi ap tahhadkam ch si s-ni-mukima tahhadchud. Ia g wabsh wo dadk ch wo ha'ichu si nenashanad."

Kutsh am dadhaiwua.

<sup>39</sup>Tsh g Jesus ba'ich ep sha'i him k am i gei jewedo k hab kajj ab Jiosh wui, "Ni-ohg, matp am wo s-ap'ek, pt im hu hab wo i juh hegai si s-ko'ok sho'igdag mo ab ni-wui him. Kuni eda tatchua mat ahpi g m-tatchui hab wo e juh."

<sup>40</sup>Tsh am hahawa uhpam ep jiwia ha wui hegam waik. Kush am kohksh. Sh hab kajj ab ha wui, "Pi amtki sha'i e nako mamt wo ni-wehm nenead al hemako ohla ab. <sup>41</sup>Si g wo ha'ichu nenashanad ch ab wo tai g Jiosh g gewkdag mamt pi am hu wo shul pi ap'ekam ch ed. Chum am hi wa g s-ap'ekam hab elid ch eda pi e nakog."

<sup>42</sup>Bash kajj ch amjed gam hu hahawa ep him k hab kajj ab Jiosh wui, "Ni-ohg, am o wa s-ap'e ni-wehhejed matp d wo m-tatchuik mant hemho wa wo nako ihda si s-ko'ok sho'igdag." <sup>43</sup>Neh, k am hahawa uhpam ep jiwia ha wui. Kush ep kohksh no pi sha'i s-ha kohksimchud.

<sup>44</sup>Tsh gam hu hahawa ep hih g Jesus k heg hab kajj ab Jiosh wui matsh wehpeg <sup>45</sup>ch am hahawa

uhpam ep jiwia ha wui k hab kajj, "Kumtki ep kohk. T eda e ai mamt ni-gagda ahni Jiosh si Kehsha am ha wui g pi ap'ekam hemajkam. <sup>46</sup>Oi g wo wahpamigi. Tt wo hihi. Neh, ia at hu jiwia hegai mat ni-gagda."

### Mamtsh an bei g Jesus

*An g neid g Mark 14:43-50; Luke*

*22:47-53; John 18:3-12*

<sup>47</sup>Am ad wabsh kia neok. Kud am jiwia g Judas. D sha'i si mu'ijj wehmaj, ha'ijj g i'is-papayo uh'ukch ch ha'ijj g u'us. Idam atki g u'ugchu papal ch ge'eged am ha cheha matsh am wo hihim k wo bei.

<sup>48</sup>Kuki eda g Judas heki hu ha ahgid idam mo am wehmaj mat ab wo chintad g Jesus kahmaj ab. T hab masma wo s-mahchk mat hedai an wo bei. <sup>49</sup>D am wabsh i chum jiwia g Judas k wabsh shel i hih ab Jesus wui k hab kajj, "Jiosh at wo s-m-ho'ige'el, ni-mashchamd!" Neh, bad che'e k ab chintad.

<sup>50</sup>D hab kajj g Jesus ab wui, "Th, ni-nawoj, oi g s-hohtam am hab juhni hegai mapt haschu ahgk ia jiwia."

Kud ab ha'i hihim k an bei g Jesus k gan hu si s-wihnam u'ukch. <sup>51</sup>Kud hema g t-wehm e mashchamd am i wuhshad g e-is-pahyo k ab si gehg g nehologaj g uhgchu pahl k an si hikuch g nahkaj.

<sup>52</sup>D hab kajj g Jesus ab wui ihda, "Ga g hu uhpam kehsh g e-is-pahyo. Hegam mat wo hekaj g is-pahyo at heg hekaj hab wa'ap wo e muhkid. <sup>53</sup>Aha nap pi mahch mantp ab wo tai g ni-ohg, t ha hekaj wo ha cheha g sha'i si mu'i mihl anghil

mat ni-wehhejed wo ha cheggia.

<sup>54</sup>K wabshaba an hab chu'ig Jiosh o'ohana ed mat hemho wa am ni-tahgio hab wo e juh ihda mo hab e wua.”

<sup>55</sup>Neh, bad kajj g Jesus ch hab hahawa ha ahg hegam mat an bei, “Wehs tashkaj ani am dahiwap ch ha mashcham ge'e cheopi t am. Kumt pi an hu ni-be k wabshaba hahawa ia dada an uh'ukch g i'is-papayo ch u'us mamt wo ni-bei. <sup>56</sup>Pegih, bat wa masma an heki hu o'oha g kekelibad Jiosh ha'ichu i tashogiddam mant hab masma an wo ni-behij mat g pi ap hemajkam.” Neh, bad kajj g Jesus.

Kuchd am haha wabsh i dagito k gam hu si a'ai wohp.

### Mamtsh am u'apa g Jesus ha wui g e jehnigiddam

*An g neid g Mark 14:53-65; Luke 22:54-55, 63-71; John 18:13-14, 19-24*

<sup>57</sup>Kumtsh am i bei g Jesus heg kih wui uhgchu pahl mo hab chehgi Caiaphas. Tsh eda am heki hu i e hemapai g chehanig t-mashchamdahm ch ge'eged.

<sup>58</sup>Sh g Peter ga hu wabsh mehkjed ha oid ch am i wah kolhai ch ed. Sh am ha'i dadha g ha-pionag. Tsh g Peter am ha wehm i dahiwua s-neidamkch mams has wo juh g Jesus.

<sup>59</sup>Sh g uhgchu pahl ch hegama e jehnigiddam am chum i e nakog mat g iatlogi ha'ichu ab wo abch g Jesus mat heg hekaj wo mua.

<sup>60</sup>Kutsh mu'i ehp am i gegokiwua k ab ha'ichu chum abch. Sh wabshaba pi e wepot g ha'ichu ha-ahga.

Tsh am hahawa gohkajj i gegokiwua <sup>61</sup>k hab kajj, “Ihda o'odham o hab kajj matsh wo e nako mat wo i wua g Jiosh ge'e cheopiga. Tsh am d wo i waik tashk, tsh am uhpam ep wo kei.”

<sup>62</sup>Tsh am hahawa kekiwua g uhgchu pahl k hab kajj ab Jesus wui, “Napt pi am hu has wo chei heg amjed mam ab m-abchud?”

<sup>63</sup>Kush wabshaba g Jesus pi has sha'i kajj.

Tsh am ep neo g uhgchu pahl k hab kajj ab wui, “Am g t-ahgid g wohokam am tahgio g Jiosh. Nap hab e elid map ahpi d Jiosh alidag matp am t-dahm wo i e kei?”

<sup>64</sup>Sh hab kajj g Jesus, “Dani ahni. Kunt ab ep wo em-ahgi mat g Jiosh am wo e chehgi mo ab si has ni-elid an e-hugid an ni-dahshk e-kownal daikud ed. T am wo i e ai mant ab wo i hud chewagi ch ed k am ep wo jiwia jewed dahm. Kumt wehsijj wo s-mai mani d ahni.”

<sup>65</sup>Tsh g uhgchu pahl ab si wantsh g e-eniga no pi si pi hohho'id g ne'okij k hab kajj, “Pi ach hedai ep sha'i tatchua mas am wo ah g chu'ijigaj. Am am wa kah g pi kehge ne'okij. <sup>66</sup>Shahm i elid?”

Kush hab kajj g e jehnigiddam, “Ab at moht g chu'ijig am hugkam mat hemho wa wo e muhkid.”

<sup>67</sup>Tsh idam ab si siswua wuhioshaj ab k an si ma'ishk wuh g wuhpuij k ab si shonikkash <sup>68</sup>ch hab ahg, “Am g hig t-ahgid mas hedai ab m-shonikka, ahpi Jiosh si Kehsha e ahga.”

**Matsh g Peter pi mahch k e ah g Jesus***An g neid g Mark 14:66-72; Luke**22:52-62; John 18:15-18, 25-27*

<sup>69</sup>Sh eda g Peter am daha kih bahsho. Kutsh am hema jiwia g uwi piongaj g uhgchu pahl k hab kajj ab Peter wui, "Ahpi ap ep wehmaj hegai Jesus."

<sup>70</sup>Tsh wabshaba g Peter pi mahch k e ah g Jesus am ha tahgio hegam mo am dadha hab kajjch, "Pi ani sha'i mahch maps haschu hab ahg." <sup>71</sup>Bash kajj ch ha hekaj gam hu hih mash am ha'i gegok kolhai kihjeg t ab.

Kush hema hab ep kajj ab ha wui, "Id o ep wehmaj hegai Jesus."

<sup>72</sup>Kutsh ep pi e edagi g Peter hab kajjch, "Do si wohokam mani pi sha'i mahch hegai o'odham."

<sup>73</sup>Kutsh sha'i ha'as, tsh hegam chechoj mo am gegok am dada Peter wui k hab ahg, "Pi g sha'i pi e edgid. Dapki woho hema hegam Jesus. Ab ap wabsh e ahgch e-ne'oki ab map d ha wehm o'odham."

<sup>74</sup>Tsh g Peter am ha hekaj si ha ahgi, "Pi ani sha'i mahch ihda o'odham mam an a'aga. T g Jiosh wo si ni-jehka'ich mantp em-iattogid."

Tsh am hahawa hema si kuhu g keli chuchul. <sup>75</sup>Tsh am ha hekaj i chegito g Peter mo wa g Jesus ab wui hab kajj, "Pi at koi wo kuhu g keli chuchul. Kupt waikko hab wo wa'i chei map pi sha'i ni-mahch." Tsh gam hu wuhsh g Peter k si pi ap e tahtk ch shoak.

**Mamtsh am i bei g Jesus heg wui mash d kownal heg eda chekshani***An g neid g Mark 15:1; Luke**23:1-2; John 18:28-32*

**27** Tsh am wabsh i chum mahsi. Tsh am hahawa i

ap'ech g u'ugchu papal ch ge'eged mat wo e muhkid g Jesus. <sup>2</sup>Tsh am i e kuhgit g ha-namki. Kutsh am si i maniadad g nohnhoi g Jesus k gam hu i wanim matsh am wo i bei heg wui mo d kownal heg eda chekshani ch hab chehgig Pilate.

**Matsh g Judas hejel e mua***An g neid g Acts 1:18-19*

<sup>3</sup>Sh eda g Judas an himad ch ha neid. Sh am wanimed g Jesus kownal wui mat wo e muhkid. Kutsh si e tods g Judas k am him k am uhpam i ui hegai waikko wehst-mahm plahda pihsh ha wui g u'ugchu papal ch ge'eged <sup>4</sup>k hab kajj, "Tki wo e muhkid hegai mo pi ha chu'ijig. K d ni-chu'ijig nant pi ab em-wui gagda."

Sh hab kajj hegam haha'ichu, "Pi ach has sha'i elid hegai. Heg o ahpi ab m-ab."

<sup>5</sup>Tsh g Judas am si nehnich hegai lial k am shul ge'e cheopi ch ed k gam hu hahawa wuhsh jeg ed k wabsh hejel e naggia.

<sup>6</sup>Tsh g u'ugchu papal am ui hegai lial k hab kajj, "Id o d namkigaj mat hema wo e muhkid. K g t-chehanig pi t-hiwgid matt am wo toa ge'e cheopi wehhejed." <sup>7</sup>Bash kajj ch am ap'ech matsh heg hekaj wo hema ha nolawt g oidag mat d wo ha-simin-jihlok hegam mo d wabsh ge o'odham. Hegai mamt ha nolawt o heki hu hab e a'aga Haha'atdam Oidag <sup>8</sup>ch wabshaba hab hahawa e a'aga Eh'ed Oidag. <sup>9</sup>Neh, id atsh wa hab e juh hab masma mash wa g Jiosh heki hu wa'i hab kajj matsh hab masma hab wo e juh. Hegai kelibad Jiosh ha'ichu i tashogiddam



mash hab chehgi Jeremiah atki an o'oha mash hab kaj g Jiosh:

Tutuligo at wo hema nolawt g o'odham g waikko wehst-mahm plahda pihshkaj.

<sup>10</sup> Kumt id am haha wo ui namkigaj k wo ha nolawt g haha'atdam oidag.

**Mash g kownal Pilate ab ha'ichu kakke g Jesus**

*An g neid g Mark 15:2-5; Luke 23:3-5; John 18:33-38*

<sup>11</sup> Sh eda am kehk g Jesus kownal wui. Sh hegam mo s-mu'amk ab abchud mo chum e kownalchud. Sh g kownal ab kakke, “No wa woho mapsh hab chum e elid map d ha-kownalig idam Tutuligo?”

Sh hab kaj g Jesus, “Dani ahni.”

<sup>12</sup> Sh g u'ugchu papal ch ge'eged ab mu'i ha'ichu abchud. Sh pi am hu has sha'i kaj g Jesus. <sup>13</sup> Sh hekaj hab kaj g Pilate ab wui, “Neh, mu'i ha'ichu o ab m-abchud. Napt pi ab hu wo ha kaiha?” <sup>14</sup> Kush ep pi am hu has sha'i kaj g Jesus. Tsh heg hekaj si has i el g kownal.

**Mamtsh ab mohto'i g Jesus mat wo muh**

*An g neid g Mark 15:6-15; Luke 23:13-25; John 18:39-19:16*

<sup>15</sup> K am hab e wua ahid ab id eda gegosig mo g kownal hema dadagitod g lihso am ha wehhejed g hemajkam. <sup>16</sup> K am hema d lihso ch hab chehgi Barabbas. K wehsijj s-mahch ihda. <sup>17</sup> Tsh am i e hemapai g hemajkam amai mash am daha g Pilate ch hab wua g lodaita. Tsh ab ha kakke, “Nam hab elid mant wo dagito g Barabbas aha nam id hab

elid Jesus mo hab e a'aga Jiosh si Kehsha.” <sup>18</sup> Neh, bash kaj nash pi chum s-dagitoimk g Jesus ch hab ha elid mo hegam wa'i haha'ichu s-hehgamk ch s-mu'amk.

<sup>19</sup> Sh am daha g Pilate lodaita daikud ed. Kutsh eda g wehmaj kihkam heki hu hema cheha matsh am wo him k wo ahgi mo hab kaj, “Pi g am hu has sha'i juhni hegai o'odham no pi pi ha chu'ijig. Mu'i ant ha'ichu nako chuhug chehchkch ab amjed.”

<sup>20</sup> Sh eda hegam u'ugchu papal ch ge'eged ab ha chehani g hemajkam matsh ab wo tai g Pilate mat wo dagito g Barabbas k g Jesus hab wo juh mat wo e muhkid. <sup>21</sup> Pegih, sh g kownal ab ha kakke mas hedai am wo i dagito ha wui idam gohk.

Sh hab kaj g hemajkam, “Barabbas”.

<sup>22</sup> Sh hab hahawa ep kaj g Pilate mas has wo juh hegai Jesus mo hab e a'aga Jiosh si Kehsha.

Sh hab kaj g hemajkam, “Mu'ani ab kots t ab.”

<sup>23</sup> Kutsh hab chum chei g Pilate, “Haschu ahg? Shahchu at hig pi ap has juh?”

Kutsh oi wa wabsh ba'ich i si s-kaidam hab ge kaj mu'ikko, “Mu'ani! Mu'ani ab kots t ab!”

<sup>24</sup> Tsh am i nei g Pilate matki heki hu i babgat g hemajkam k am hu wo e cheggia. Tsh am ge was g shuhdagi k am hemajkam ha tahgio i ha wapko g e-nohnhoi k hab kaj ab ha wui, “Pi o ha'ichu d sha'i ni-chu'ijig matp wo e muhkid ihda o'odham. Ahpim o d em-chu'ijig.”

<sup>25</sup> Sh wehsijj hab kaj hegam mo am ha'ichug, “Ahchim g t-a'aliga

ha wehm att ab wo moht g s-ko'ok namkidadag id hekaj.”

<sup>26</sup>Tsh g Pilate am hahawa i dagito g Barabbas ha wui k am ha cheha g shondal mat wo gewitta g Jesus k am hahawa i dagito mat ab wo naggia kots t ab.

### **Mash g shondal wabsh nahnko wua g Jesus**

*An g neid g Mark 15:16-20; John 19:2-3*

<sup>27</sup>Tsh amjed g Pilate shondaliga am i bei g Jesus k gd hu u'apa kownal ge'e kih am k am wehs ha wai g e-wehm shondal. <sup>28</sup>Kutsh am i e hemapad k nahnko wua. Msh ab abchud mash chum e kownalchud. Pegih, tsh gam si wuashul g wehschugaj k g kownal eniga ab wahkid <sup>29</sup>k ge ho'i gihkot k ab wahki mo'oj ab k g uhs an behijel s-apko nowij an k wabsh nahnko ahg ch ab i tohtonwua wui k hab kaij, “Tash g d ha-kownaligk g Tutuligo.” <sup>30</sup>Sh ab si siswuimad k an si gewitta mo'oj an. <sup>31</sup>Tsh am i ha'asa nahnko juh k am wuahawua hegai kownal eniga k ab uhpam wahki g enigaj k gam hu hahawa i bei mat ab wo naggia kots t ab.

### **Mamtsh ab naggia g Jesus kots t ab**

*An g neid g Mark 15:21-32; Luke 23:26-43; John 19:17-27*

<sup>32</sup>Tsh ab hema i ha nam g o'odham mo ab Cyrene kihhim t ab d kihkam ch hab chehgig Simon. Id amtsh ab wabsh si kushwiotach hegai kots mamt ab ab wo naggia g Jesus. <sup>33</sup>Kumtsh gam hu i bei g Jesus mamtsh am wo naggia. K hab e a'aga amai Golgotha. K id hab d ahga Koshwak. <sup>34</sup>Kumtsh ab

chum i'ich g nawait mo g kulani am wehnags mat wo hehogi g s-ko'ok. Tsh ab chum jeh k pi ab hu ih.

<sup>35</sup>Kumtsh ab hahawa sisish kots t ab k am i kei g kots. Tsh am ha'i e chichwi g shondal k am a'ai e gehg g wehschugaj <sup>36</sup>k am hahawa i dadhaiwua k nuhkud.

<sup>37</sup>Kumtsh an o'oha mam haschu ab abchud k ab sihsh kots t ab ab dahm mo ab i mo'okch g Jesus. Sh hab chu'ig, “Id o d Jesus ch d Tutuligo ha-kownalig.” <sup>38</sup>Tsh gohk ab ep ha nahngia kokots t ab gan hu a'ai. Sh eda d s-chu e'eskam idam.

<sup>39</sup>Sh hegam mo an bihbimhim si gahi e mo'ogid ch ab si s-ko'okam has ahg g Jesus <sup>40</sup>hab kaijch, “Naptsh woho wo i wua g ge'e cheopi k am uhpam ep wo kei waik tash ab? Pegih, ab g hig i huduni kots t amjed k wo e do'ibia maptp woho d wo Jiosh alidagk.”

<sup>41</sup>Sh g u'ugchu papal ch chehanig ha mashchamdand ch ge'eged hab wa masma ep nahnko ahg hab kaijch, <sup>42</sup>“Id atsh ha'i ha do'ibia k atki wabshaba pi wo e nako mas wo hejel e do'ibia. Nash hig pi woho d t-kownalig? Pegih, tt ab wo s-wohoch matp ab wo i huduni k wo e do'ibia. <sup>43</sup>Ab o si hiwig g Jiosh ch hab e ahg mo d alidaj. Pegih, tt hig wo nei mas hu wo do'ibia g Jiosh hemu.” <sup>44</sup>Chum wa hema hegam s-chu e'eskam mamt ab hab wa'ap ha nahngia kots t ab hab wa'ap s-ko'okam has ahg.

### **Matsh muh g Jesus**

*An g neid g Mark 15:33-41; Luke 23:44-49; John 19:28-30*

<sup>45</sup>T am i dahm juh. T wehsko gei g s-chuhugam waik ohla ab.

<sup>46</sup>Kutsh am i e ai g waik ohla. Sh si s-kaidam hab kajj g Jesus, “Eli, Eli, lama sabaktani,” mo hab d ahga, “Ni-Jioshga, Ni-Jioshga, shahchu apt ahgk am wabsh i ni-dagito?”

<sup>47</sup>Sh ha'ijj hab kajj hegam mo am gegok, “Elijabad o ab chum waid.”

<sup>48</sup>Tsh ab hema ha hekaj i med k an ha'ichu usko mat am wakch nawait ch ed k am uhgk i be k ab chum i'ich g Jesus. <sup>49</sup>Kush ha'i hab kajj, “Kia koi, tt hig wo nei mas ia wo jiwia g Elijabad k wo do'ibia.”

<sup>50</sup>Kutsh am si s-kaidam hab ha'ichu ep chei g Jesus k am hahawa i muh.

<sup>51</sup>Kutsh hegai s-kowk ikus kuhpadag mash am s-tadnim naggia ged hu si eda g ge'e cheopi ab si shel e wantsh. T g jewed u'ugij k gam si e hahai g ge'eged hohodai. <sup>52</sup>Kutki g hiha'ini gam si e kuhkpi'o. T mu'ijj hegam mat heki hu koi ab s-wohochudch g Jesus ab i wuwha muhkig amjed <sup>53</sup>i dahm mat g Jesus i wuhsh k gam hu i wahp amai mo hab e a'aga Si Hekia S-ap'ekam Kihhim ch d Jerusalem. K mu'ijj ha neid amai.

<sup>54</sup>Tsh idam shondal g e-ge'ejig wehm am i nei mat g Jesus muh k taht g jewed u'ujig k sha'i si e totodsid k hab kajj, “Woho oki d Jiosh alidag.”

<sup>55</sup>Sh eda mu'ijj am ha'ichug hegam u'uwi mo ga hu amjed wehmaj g Jesus ab Galilee t amjed ch am ha'ichukaj i wehmaj. Idam ash ga hu wabsh mehk gegok ch ab neid. <sup>56</sup>Sh am ha wehmaj g Mary Magdalene ch hegai Mary mo d ha-je'e g James ch Joses ch heg ehp mo d Zebedeabad wehm kihkam ch d ha-je'e g James ch John.

### Matsh ged hu e cheh g Jesus

*An g neid g Mark 15:42-47; Luke*

*23:50-56; John 19:38-42*

<sup>57</sup>Tsh am hahawa jiwia ihda s-kais o'odham mo hab chehgig Joseph ch ab Arimathea t amjed ch ab s-wohochud mo g Jesus d Jiosh si Kehsha. K eda e aihim mat wo i hud. <sup>58</sup>Tsh heg hekaj gam hu hih ihda Joseph ab Pilate wui k ab tahni g Jesus honshpadag. Kush g Pilate am ha chehani mamt wo mah. <sup>59-60</sup>Tsh gam hu uhpam jiwia. Kumtsh am wehhejed ab i huduni g Jesus honshpadag. K am mia hab chu'ig g Joseph hiha'ini ch ab heki hu cheotas hodai ch ed. Kumtsh am i bei g honshpadag k am i hobino g si s-kehg ikuskaj k am cheh heg eda cheo k ab hahawa g ge ge'e hodai i himchud k ab hekaj kuh g hiha'ini. Tsh gam hu hahawa uhpam hihi hegam Joseph. <sup>61</sup>Kush am dadha g Mary Magdalene heg wehm hema Mary ch am neid mat hebai cheh.

### Mash si e nuhkud g hiha'ini

<sup>62</sup>Ba'ich tash o d shahwai. Tsh am dada g u'ugchu papal ch Palasi Pilate wui <sup>63</sup>k hab kajj, “T-kownalig, s-chegito ach mo wa ihda s-chu iattomkam hab kajj matsh uhpam wo e chegito matsh d wo waik i tashk. <sup>64</sup>Neh pt am wo ha cheha mat wo si e nuhkud g hiha'ini waik tash ab. T hekaj hab pi wo e nako g piongaj mas ab wo ha ehs g honshpadag k hab wo ha ahgi g hemajkam matki i wuhsh ab muhkig t amjed. Neh, ihda ha-iattogi at ba'ich wo i si pi ap'ek mo g wehpegkam.”

<sup>65</sup>Kush hab kajj g Pilate ab ha wui, “Am g ha'i wo ha u'uk g shondal k am has i masma ab wo nuhkud g hiha'ini.”

<sup>66</sup>Kutsh am ha oi g shondal. Kutsh gam hu hihim k ab si s-wihnam i kuh g hiha'ini k an bidsh g hodai k ab si chepos. Sh idam shondal am nuhkud g hiha'ini tash oidam ch chuhug oidam.

**Matsh ab uhpam i wuhsh g Jesus muhkig t amjed**

*An g neid g Mark 16:1-10; Luke 24:1-12; John 20:1-10*

**28** Sh am e aihim g domig tash. Tsh am hiha'ini wui hihi g Mary Magdalene heg wehm hema Mary.

<sup>2</sup>D am hahawa si u'ugij g jewed. Tsh g anghil ab i hud dahm kahchim t amjed k im hu hab i melch g hodai k an dahm dahiwua. <sup>3</sup>Sh g wuhioshaj si s-masma tonod hab masma mo g wepgi. Sh g wehschugaj hab masma s-toha mo g s-mohoni gew. <sup>4</sup>Kutsh wabsh woho'i totods hegam shondal mo ab nuhkud k si gigiwek ch amjed hab sha e juh mo d wabsh ko'i.

<sup>5</sup>Kush ab neok hegai anghil ch hab kajj ab ha wui hegam u'uwi, “Pi g am wo sha'i e totods. M ani wa s-mahch mam g Jesus chuhkug an chum gahghim. <sup>6</sup>Ab g wo i hihim k wo nei mo pi ia hu ha'ichug iia mat ia e cheh. Uhpam at ep i wuhsh muhkig amjed mo wa hab wa kajj. <sup>7</sup>Kumt am s-hohtam wo hihim k wo ha ahgi hegam mo am wehmajkahim mat uhpam e chegito k gam hu wo hih Galilee wui. Mt gam hu wo hihim k am ha'ab wo

nei. Neh, am ani em-ahgid mo has i kajj.” Bash kajj g anghil.

<sup>8</sup>Kutsh si e totods k si s-hohtam ga hu hihi ab amjed g hiha'ini k eda si s-hehgig ch ia hu chum wohp matsh wo t-ahgi.

<sup>9</sup>Tsh wabshaba haha wabsh ha nam g Jesus k hab kajj, “T wo s-em ho'ige'el g Jiosh.” Tsh ab si i shul wui k an ui tahtdaj an k ab si ihm.

<sup>10</sup>Sh hab kajj ab ha wui, “Pi g am wo ni-ehbenid. Am g wo hihim k wo ha ahgi g ni-wepnag mat am wo hihi Galilee wui k am ha'ab wo ni-nei.”

**Matsh haschu ged hu ha ahgi g shondal**

<sup>11</sup>Kutsh gam hu hihi hegam u'uwi. Tsh hegam shondal mash am nuhkud g hiha'ini am ha'i hihim k ged hu dada kihhim t am k am ha ahgi g u'ugchu papal wehs ha'ichu matsh haschu has i e juh.

<sup>12</sup>Tsh g u'ugchu papal am ha wehm e nam g ge'eged k am e a'aga k am hahawa mu'i ha mah g lial idam shondal <sup>13</sup>k hab ha ahg, “Bamt wo chei matki am dada g piongaj chuhug ch ed k am em-ehs g honshpadag mam kohksh. <sup>14</sup>Kutp wo sha kah g kownal mam has i kajj, tt wo wa em-do'ibia.”

<sup>15</sup>Kutsh am ui g lial hegam shondal k am hab e juh mam has i ha ahg. Ia o i idani hab masma am e a'aga am ha shahgid g Tutuligo.

**Matsh g Jesus am i e chehgi ha wui**

*An g neid g Mark 16:14-18; Luke 24:36-49; John 20:19-23; Acts 1:6-8*

<sup>16</sup>Kuchd ahchim gamai hemako am hihi heg wui do'ag am Galilee

ch ed mo wa hab kajj g Jesus  
 matt am wo hihi. <sup>17</sup>D g Jesus am  
 ha'ichug. Kuchd ab si ihm. D eda hi  
 wa ha'i sha pi wohoch.

<sup>18</sup>D ab si i t-miabi g Jesus k hab  
 kajj ab t-wui, "Jiosh at ab ni-mah  
 g gewkdag wehs ha'ichu dahm  
 an dahm kahchim ch ed ch id  
 dahm jewed. <sup>19</sup>Gamai g wo hihim  
 wehsko hemajkam ha wui k wo  
 i ha mashcha g ha'ichu ni-ahga

k ab wo i ha pahl wapko am  
 chehchegch g ni-ohg Jiosh ch ahni  
 ep ni-chehcheg mani d alidaj ch  
 heg ehp Hekia S-ap'ekam Gewkdag.  
<sup>20</sup>Ab ani em-chehani mamt has wo  
 masmak. Kunt ab wo i ha mashcha  
 g hemajkam mat ab wo s-wohog  
 elidad wehs ha'ichu mani haschu ab  
 em-chehani. Kunt chum hekid wo  
 em-wehmajk, chum as wo huhug g  
 jewed."